

# Tti Jian Joajné Jesucristo Que Dicjin Mateo

*Cain niñanĉhen de ixin Jesucristo  
(Lc. 3.23-38)*

<sup>1</sup> Jihi ná lista de cain niñanĉhen de ixin Jesucristo. Jehe Jesucristo joixin de ngain razé chojní David co de Abraham.

<sup>2</sup> Abraham cjoy ndodé Isaac, co Isaac cjoy ndodé Jacob, co Jacob cjoy ndodé Judá conixin cainxin xanchó Judá. <sup>3</sup> Judá cjoy ndodé Fares co Zara, co janné na cjoy Tamar. Fares cjoy ndodé Esrom, co Esrom cjoy ndodé Aram. <sup>4</sup> Aram cjoy ndodé Aminadab, co Aminadab cjoy ndodé Naasón, co Naasón cjoy ndodé Salmón. <sup>5</sup> Salmón cjoy ndodé Booz co janné Booz cjoy Rahab. Booz cjoy ndodé Obed co janné Obed cjoy Rut. Obed cjoy ndodé Isaí. <sup>6</sup> Isaí cjoy ndodé rey David, co rey David cjoy ndodé Salomón, co janné Salomón icha saho cjoy jan nĉhiĉhihi ná tattíta que vinhi Urías.

<sup>7</sup> Salomón cjoy ndodé Roboam, co Roboam cjoy ndodé Abías, co Abías cjoy ndodé Asa. <sup>8</sup> Asa cjoy ndodé Josafat, co Josafat cjoy ndodé Joram, co Joram cjoy ndodé Uzías. <sup>9</sup> Uzías cjoy ndodé Jotam, co Jotam cjoy ndodé Acaz, co Acaz cjoy ndodé Ezequías. <sup>10</sup> Ezequías cjoy ndodé Manasés, co Manasés cjoy ndodé Amón, co Amón cjoy ndodé Josías. <sup>11</sup> Josías cjoy ndodé Jeconías conixin cainxin

xanchó Jeconías. Co ngain tiempo mé chojni Babilonia savicao cain chojni Israel para ngain nont-tehe Babilonia de esclavo.

<sup>12</sup> Después de mé Jeconías cjoy ndodé Salatiel, co Salatiel cjoy ndodé Zorobabel. <sup>13</sup> Zorobabel cjoy ndodé Abiud, co Abiud cjoy ndodé Eliaquim, co Eliaquim cjoy ndodé Azor. <sup>14</sup> Azor cjoy ndodé Sadoc, co Sadoc cjoy ndodé Aquim, co Aquim cjoy ndodé Eliud. <sup>15</sup> Eliud cjoy ndodé Eleazar, co Eleazar cjoy ndodé Matán, co Matán cjoy ndodé Jacob. <sup>16</sup> Jacob cjoy ndodé José tti cjoy xixihi María, co María cjoy janné Jesús, que dinhi Cristo, tti Dios rroanha.

<sup>17</sup> Jañá cjoy catorce ndodaha desde Abraham hasta rey David co de rey David icatorce ndodaha hasta are chojni Israel cjoy na ngain Babilonia de esclavo, co iná catorce ndodaha de are mé hasta are concjiji Cristo.

### *Are concjiji Jesucristo*

*(Lc. 2.1-7)*

<sup>18</sup> Janhi conhe para concjiji Jesucristo: janné Jesús, María, ovechonda compromiso ngain José para rrocottehe. Co saho de rroguinttecao chó na, María oveyá chjan de ixin joachaxín Espíritu Santo. <sup>19</sup> José, tti joigoan xixihi María, cjoy ná xí jian de ngain Dios, co jehe joinaoha coequin chijni de ixin María. Jehe ijoinaoha rrogucao María. Mexinxin jehe xaxaon que irrocjanha ngain María. Jehe joinaoha conohe icha chojni que ixin jehe na ijeha novio na, mexinxin jehe xaxaon jañá. <sup>20</sup> Co are José jixaxaon jañá, ná ángel de Dios joí ngain cottačhin are tajijoa José co ángel mé ndačo:

—José, jaha tti razé David, x̄aonha que ixin María soan čhiha, ixin chjan que jehe rrochonda joixin xan de ngain Espíritu Santo. <sup>21</sup> Jehe sincheconcjihi ná xanxí, co jaha sincheguinhi xan JESÚS. Sinhi xan jañá ixin jehe xan tsjenga xan hna cainxin tti jianha que nchehe chojní xan.

<sup>22</sup> Cain yá conhe para que joiconhe tti dindačo Dios ngain profeta que nichja:

<sup>23</sup> Ná xannčí que x̄a x̄onhi xí catte, xan mé xan seyá chjan,

co are tsoncjihí chjan mé, sinhi xan Emanuel,  
co mé rročo: Dios jí ngayá na.

<sup>24</sup> Are José xingamehe de cottačhin, jehe joinchehe inchin coetonha ángel de Dios co vayé María para čihi. <sup>25</sup> Pero vintteha na junto hasta que María joincheconcjihi xenhe que veyá. Co joincheguinhi xan JESÚS.

## 2

### *Are tti ní xí sabio joitsjehe Jesús*

<sup>1</sup> Jesús concjixin ngain rajna Belén, ngain nonttehe Judea are Herodes vehe rey ngain nontte mé. De ngain iná nontte icha oriente vinttequixin ní xí para ngain ciudad de Jerusalén. Co canio xí mé de ixin conotse vagatsoanxin xa de ixin quehe siconhe ngataha nontte, <sup>2</sup> co nttiha joanchiangui xa:

—¿Quettinó jí tti rey de chojni judío que oconcjihí? Janha na desde ngain lado oriente viconxin na conotsé rey mé, co jai janha na joihi na nttihi para sinttasayá na rey mé.

<sup>3</sup> Are rey Herodes conohe jihi, jehe veva contento, jehe conixin cain chojni que te ngain Jerusalén. <sup>4</sup> Cottimeja jehe rey Herodes vayé cain xidána que vaquetonha ngain icha xidána, co cain ximaestro ley, co jehe rey joanchiangui ngain cain nimé ixin ttinó tsoncjixin Cristo, tti Dios rror-roanha. <sup>5</sup> Jehe na vinttendačo na:

—Ngain rajna Belén ngain nonttehe Judea, ixin profeta dicjin janhi:

<sup>6</sup> Co jaha, rajna Belén que rrihi ngain nonttehe Judá,  
jaha tti icha importante de cainxin rajna que tte-tonha nttiha,  
ixin de nganji sačhjexin ná xí que tsetonha,  
co xí mé tti senda chojnina Israel.

<sup>7</sup> Cottimeja Herodes jimao vayé canio xí que vinttequixin de lado oriente co joanchiangui Herodes ngain xa ixin quexehe nchanho mero xago conotse mé. <sup>8</sup> Cottimeja Herodes coetonhe canio xí mé para cjoí xa ngain rajna Belén co ndačo ngain xa:

—Ttji ra nttiha, co danchiangui ra jian ttinó jí chjan yá. Co are osinchí ra xan, nchenona ra para que janha cai tsji sinttasayá xan.

<sup>9</sup> Conixin tti ndačo rey jihi, canio xí mé savintteci xa. Co tti conotse que vintteguicon xa de ngain lado oriente jitaon va nttiha dirección de tti tettji xa hasta que tavehe va dirección de ngain lugar tti jí xanxichjan. <sup>10</sup> Are canio xí mé vintteguicon xa conotse mé, anto vintteché xa; <sup>11</sup> co are vintteguixinhi xa nchia tti jí xanxichjan ngain janné xan, María, canio jehe xa vinttettoxin nttajochjihi xa co joinchesayehe xa xanxichjan.

Cottimeja vanttjé xa canxion caja que joicao xa para joinchetoen xa xanxichjan oro, co tsjoca, co iná cosa que dinhi mirra, que chojni vanchegonda inchin perfume. <sup>12</sup> Cottimeja canio xí mé vitonhe xa ngain cottačhin que ixin irrocjanha xa ngain Herodes, mexinxin oje nttiha savinttecjanxin xa para ngain nacioen xa.

*Are María co José savicao na xanxichjan para Egipto*

<sup>13</sup> Después de savintteci jehe tti canio xí que vinttequixin de ngain lado oriente, are tajjioa José, ná ángel de Dios joí ngain cottačhín José co ndačo ángel mé:

—Dingattjen co sattingacoho xanxichjan conixin janné xan. Sattji ra para ngain nonttehe Egipto co tadintte ra nttiha hasta que janha rrondattjo ra, ixin Herodes tsjé xanxichjan para nasoenxon xan.

<sup>14</sup> Cottimeja vingattejen José conixin María para sajoicao na xanxichjan de ttie para Egipto.

<sup>15</sup> Nttiha vintte na hasta que ndavenhe Herodes. Jañá conhe para joiconhe tti dindačo Dios ngain profeta, co jehe profeta dicjin: “De ngain nonttehe Egipto vayaxin Xanhna.”

*Are coetonha Herodes para venhe cain xanxichjan*

<sup>16</sup> Are Herodes conohe ixin tti canio xí que vinttequixin de ngain lado oriente icjanha xa ngain inchin jehe coetonhe xa, jehe anto coñao co coetonhe xisoldadoe para nasoenxon xa cainxin xanxichjan que vinttechonda de yó nano para

nontte que vintte ngain rajna Belén conixin xanvintte ngain icha rajna ngandanji Belén inchin tti tiempo que vinttendačo canio xí que vinttequixin de ngain lado oriente. <sup>17</sup> Jañá joiconhe tti diquentaxin profeta Jeremías:

<sup>18</sup> Coinhi ni ná tté chojni de ngain ciudad de Ramá, que tsjanga co ta joachjaon.

Co mé Raquel tti vatsjangaxin xenhe, co vačhoja para que iná chojni rrogantsjehe joachjaon mé

ixin cain xenhe ondavintteguenhe xan.

<sup>19</sup> Pero después de ndavenhe Herodes, ná ángel de Dios jói ngain cottačhin are José tajjioa nttiha ngain Egipto, co ndačo ángel mé ngain José:

<sup>20</sup> —Dingattjen co sacjancho xanxichjan conixin janné xan para ngain nontte Israel ixin ondavintteguenhe tti chojni que joinao narrogoenxon xanxichjan.

<sup>21</sup> Cottimeja vingattjen José co sajoicao xanxichjan conixin janné xan para ngain nontte Israel.

<sup>22</sup> Pero are conohe José ixin Arquelao tti jittetonha ngain Judea en lugar de Herodes, ndodé jehe Arquelao, José xon para rrocji nttiha. Mexinxin jehe vitonhe ngain cottačhin para sacjoi ngain regioen Galilea. <sup>23</sup> Are jehe joihi nttiha, jehe sajoiguehe ngain rajna Nazaret. Jihi conhe para joiconhe tti vinttendačo profeta que Jesús sinhi nazareno.

### 3

*Juan ndache chojni ngagaha jna joajné Dios  
(Mr. 1.1-8; Lc. 3.1-9, 15-17; Jn. 1.19-28)*

<sup>1</sup> Ngain tiempo mé Juan, tti vancheguitte chojni, joí ngain regioen Judea, ngagaha jna tti jí joxon nchise para vandache chojni de ixin Dios, <sup>2</sup> co vandačo ngain na:

—Āo tenchehe ra jianha, incheha ra jamé. Tten-toxinhi ra vidá ra ixin tti ttetonha Dios ochian joí.

<sup>3</sup> Jehe Juan jihi tti diquentaxin profeta Isaías janhi:

Tsinhi na ná tté chojni que tsoyaoxin de ngagaha jna co rrondačo:

“Nchechjian ra nttiha para ixin jehe tti chonda cain joachaxin;

danttjehe ra ná nttiha nao.”

<sup>4</sup> Lontoe Juan diconchjian de xehe cocamello, co cinturoen de roa, co jehe vane ná tipo de coxoali que dinhi langosta, co tsjén cormena que jehe vaguittja ngagaha jna mé. <sup>5</sup> Vaquí chojni de ciudad de Jerusalén ngain Juan para vaquinhi na tti vandačo, co vaquí cainxin chojni de ngain nonttehe Judea co cai cain chojni que vintte ngain rajna que vintte chiaon de río Jordán.

<sup>6</sup> Co are vaquendoenhe ñao na de cain tti jianha que vanchehe na, cottimeja Juan vancheguitte na ngain río Jordán.

<sup>7</sup> Pero are Juan vicon que atto tsje xifariseo co xisaduceo cjoí xa ngain para rrojiguitte xa cai, jehe ndačo ngain xa:

—¡Jaha ra razé conché! ¿Quensen jointtanoha ra ixin nchao setanha ra tti castigo anto soji que jitonchian? <sup>8</sup> Chonda ra que sinchehe ra jian para que jamé sicon ni claro que jaha ra ocoentoxinhi ra vidá ra, <sup>9</sup> co ndacheha chó ra: “Ján na razé

Abraham na”; ixin janha rronhattjo ra que hasta xo jihi Dios nchao sinchechjian xo chojni de razé Abraham. <sup>10</sup> Hacha ojí listo para tsončhinji nttá, co cain nttá que danjoha jian ttochjoin rročhinji nttá mé co rroche nttá ngain xohi. <sup>11</sup> Ndoa que jai janha rrinttaguitte jaha ra conixin jinda, co mé jeho ná señal que ixin jaha ra ocoentoxinhi ra vidá ra; pero tti tsí después de janha, jehe sinttaguitte ra conixin Espíritu Santo co Espíritu mé tsiaho inchin xohi para sincheroa almá ra inchin oro toroaxin ngain xohi. Jehe mé chonda icha tsje joachaxin que janha, hasta que janha ni jiquininxinha na ni para tsjiá catté. <sup>12</sup> Co jehe mé ochonda palé ngá rá para tsjendoaxin trigo para sachjehe trigo paja. Jehe tsenchjinha trigoe ngain nchiandoha, co paja tsjaga ngain ná xohi que xonhi tiempo danga.

*Are joiguitte Jesús*

*(Mr. 1.9-11; Lc. 3.21-22)*

<sup>13</sup> Co Jesús joixin de Galilea para cjoí ngain río Jordán, tti vehe Juan para que Juan joincheguitte Jesús. <sup>14</sup> Pero Juan čoha para rrojincheguitte Jesús, co ndačo ngain Jesús:

—Jaha tti jiquininxin sincheguitte na janha; ¿quedonda janha sinttaguitte jaha?

<sup>15</sup> Pero Jesús ndačo:

—Pero jaxon sonttoha na jamé ixin ján na jiquininxin sonttoho na inchin rinao Dios.

Cottimeja Juan vitticaon. <sup>16</sup> Co are joexin joiguitte Jesús, vačhjenguixin de jinda. Co rato mé ngajni xiré, co Jesús vicon Espíritu Santo de Dios que xincanji inchin ná conttoanajni ngataha

Jesús. <sup>17</sup> Cottimeja coinhi na tté Dios de ngajni, que ndačo:

—Jehe jihi tti Xanhna que janha anto rinaho, co de ixin jehe Xan janha anto chahna.

## 4

*Are inchínji joinao rrojincheyehe Jesús*

*(Mr. 1.12-13; Lc. 4.1-13)*

<sup>1</sup> Cottimeja jehe Espíritu mé joicao Jesús para ngagaha jna tti jí joxon nchise para que inchínji rrojincheyehe Jesús.

<sup>2</sup> Nttiha vehe Jesús cuarenta nchanho co cuarenta ttie, co ngoixin tiempo mé jehe joinaha. Cottimeja jehe venhe jintta. <sup>3</sup> Cottimeja inchínji conchienne ngain Jesús para rrojincheyehe, co ndačo ngain Jesús:

—Si ndoa jaha Xenhe Dios, ttetonha que xo tehe rrocjan xo niottja.

<sup>4</sup> Pero Jesús ndačo:

—Tti jitaxin Palabré Dios ndačo: “Chojni sintechonxin na jeoha de tti jine na, sino cai de cain palabra que Dios ndačo.”

<sup>5</sup> Cottimeja jehe inchínji sajoicao Jesús para ngain ciudad de Jerusalén co nttiha inchínji joinchecani Jesús para ngataha tti nihngo icha importante <sup>6</sup> Co nttiha ndačo inchínji ngain Jesús:

—Si ndoa jaha Xenhe Dios, daritsingaxin de nttihi hasta tti nontte, ixin ndačo ngain tti jitaxin Palabré Dios:

Dios tsetonhe ángel de jehe para senda jaha.

Cain ángel mé rrocaha conixin rá

para que xonhi tti tsonihi rottea de ixin xo.

<sup>7</sup> Jesús ndačo:

—Cai ndačo ngain tti jitaxin Palabré Dios: “Daqueha prueba ngain Dios tti chonda joachaxin para ixin jaha.”

<sup>8</sup> Cottimeja jehe inchínji sajoicao Jesús para ngataha ná jna anto noi. Co de nttiha cjoagoexin inchínji Jesús cainxin nación que jí ngoixin mundo co cain tti čhjoin que jí ngain cain nación mé. <sup>9</sup> Co ndačo inchínji ngain Jesús:

—Janha rrochjaha jaha cain yá si jaha sarittoxin nttajochjiha co sinchesayana janha.

<sup>10</sup> Cottimeja Jesús ndačo ngain inchínji:

—Sattjixin de nganji janha, Satanás, ixin ndačo ngain tti jitaxin Palabré Dios: “Nchesayehe jehó Dios tti chonda joachaxin para ixin jaha, co jehó ngain jehe ditticaon jaha.”

<sup>11</sup> Cottimeja inchínji sacjoixin de ngain Jesús, co jói canxion ángel de Dios para joincheatendehe Jesús.

*Jesús coexinhi xé ngain Galilea  
(Mr. 1.14-15; Lc. 4.14-15)*

<sup>12</sup> Are Jesús conohe que Juan jiaxinhi ngain cárcel, jehe sacjoi para nonttehe Galilea. <sup>13</sup> Pero jehe taveha ngain rajna Nazaret, sino que jehe sacjoi joiguehe ngain rajna Capernaum, co mé ná rajna que jí ngandehé lago que dinhi Galilea ngain region Zabulón co Neftalí. <sup>14</sup> Jamé joiconhe tti dindačo profeta Isaías:

<sup>15</sup> Nonttehe Zabulón co nonttehe Neftalí que te ngaca jinda que dinhi Galilea toenxin río Jordán,  
nonttehe Galilea tti te chojni que jeha judío.

<sup>16</sup> Tti chojni que vintte inchin ngain tti naxin xehe, jai jehe na inchin ná xohi joinchengasañehe na.

Co tti chojni que inchin ondavenhe pero jai cjan xechon na iná.

<sup>17</sup> Desde are mé Jesús coexinhi ndache chojni de ixin Dios. Jehe vandačo ngain na:

—Ttentoxinhi ra de tti jianha que jaha ra tenchehe ra ixin Dios que ttjen ngajni otoiñ tsetonha nganji ra.

*Jesús nichjé nó xí que vatse copescado*

*(Mr. 1.16-20; Lc. 5.1-11)*

<sup>18</sup> Jesús mero jidatto ngandehe lago que dinhi Galilea are jehe vicon yó xí, co cayoi xí mé ichó xa. Ná xa vinhi xa Simón, co cai vinhi xa Pedro, co iná xa vinhi xa Andrés. Co cayoi xí mé vatse xa copescado, co rato mé tetjahngui xa nonchaha jinda. <sup>19</sup> Jesús ndačo ngain cayoi xí mé:

—Xacoi ra chjin na; jaha ra ttjejo ra copescado pero jai janha sinttacoanha ra quexén tsjejo ra chojni para ixin Dios.

<sup>20</sup> Co rato mé cointtohe na nonchaha co sajoicao na Jesús.

<sup>21</sup> Nchion icha ndaha Jesús vicon iyó xí, co cayoi xí mé ichó xa cai. Cayoi xí mé xenhe Zebedeo. Ná xa vinhi xa Jacobo co iná xa vinhi xa Juan. Cayoi xí jihi tate xa conixin ndodé xa Zebedeo ngá ná barco tatetteyehe na nonchaha. Jesús vayé na, <sup>22</sup> co ngain rato mé cointtohe na ndodé na nttiha ngain barco mé co sarroé na Jesús.

*Jesús joinchecoenhe tsje chojni de ixin Dios*

*(Lc. 6.17-19)*

<sup>23</sup> Jesús ngaria ngoixin nonttehe Galilea para joinchecoenhe chojni de ixin Dios ngain cain nihngo que te nttiha. Jehe ndache na tti jian joajna de ixin quexén ttetonha Dios co jehe vanchexingamehe cain chojni que vinttechonda quexeho chin. <sup>24</sup> Co hasta chojni de ngoixin regioen Siria conohe na tti jian que vanchehe Jesús co joiaho na ngain Jesús cain chojni que vinttechonda quexeho chin; tti vinttechonda dolor ngain cuerpoe, tti vinttechonda espíritu jianha, tti vinttechonda chin denda, co tti čhoha vaguinttequingui rioho cuerpoe. Co Jesús joinchexingamehe cain chojni mé. <sup>25</sup> Co ngain tiempo mé tsje chojni de tsje parte rroé na Jesús tti jehe savacji; chojni de Galilea, de ngoi regioen Decápolis, de ngain Jerusalén, de Judea, co de toenxin río Jordán.

## 5

### *Tsje nichja Jesús ngain chojni are ngain jna*

<sup>1</sup> Are Jesús vicon anto tsje chojni žatte ngain, jehe coani ngain ná jna para que jehe nchao ndache cain chojni mé de ixin Dios, co are jehe nttiha, cain chojni que vacao vintte na ngandanji jehe. <sup>2</sup> Cottimeja jehe coexinhi ndache na janhi:

### *Quexehe chojni tti chonda čhjoin vida*

*(Lc. 6.20-23)*

<sup>3</sup> —Anto čhjoin para ixin tti chojni que žaxaon ixin rrongondehe na que Dios tsjenguijna na, ixin chojni mé tequininxin na ngajni tti ttetonha Dios.

<sup>4</sup>'Anto ĉhjoin para ixin tti chojni que techín de ixin anto tsje cosa jianha jí ngataha nontte jihi, ixin Dios sincheconsolá chojni mé.

<sup>5</sup>'Anto ĉhjoin para ixin tti chojni que dintteha orgulloso, ixin jehe na nisayé tti nontte que Dios ndaĉho sanjo.

<sup>6</sup>'Anto ĉhjoin para ixin tti chojni que anto rinao sinchehe inchin ttetonha Dios, ixin jehe Dios tsjen-guijna chojni mé para sinchehe na jamé.

<sup>7</sup>'Anto ĉhjoin para ixin tti chojni que ttiacoehe icha chojni, ixin Dios tsiacoehe chojni mé.

<sup>8</sup>'Anto ĉhjoin para ixin tti chojni que iĉonhi jianha teca ixin chojni mé sicon na Dios.

<sup>9</sup>'Anto ĉhjoin para ixin tti chojni que ttjen-guijna icha chojni para tsetoha na, ixin Dios sincheguinho cain chojni mé xenhe jehe Dios.

<sup>10</sup>'Anto ĉhjoin para ixin tti chojni que anto tan-gui tonhe ixin jehe na tenchehe na inchin rinao Dios, ixin chojni mé tequininxin na ngajni tti tte-tonha Dios.

<sup>11</sup>'Co anto ĉhjoin para ixin jaha ra are chojni feo ndattjo ra na, co feo nchehe na nganji ra, co ndattjo ra na tsje cosa que jaha ndoa para rrongacoanxin ra na ixin jaha ra nichja ra joanjana janha. <sup>12</sup>Masqui jamé tsonha ra, jaha ra ĉhjoin tonoha ra co dintte ra contento, ixin jaha ra sayehe ra jie premio ngajni. Ixin cai jañá feo joinchehe chojni ngain cain profeta que jói icha saho que jaha ra.

*Chojni que ditticaon Jesús inchin xijntta co inchin joadingasán para ngain mundo jihi*  
(Mr. 9.50; Lc. 14.34-35)

<sup>13</sup> 'Jaha ra inchin xijntta para ngain chojni ngataha nontte jihi. Pero si xijntta mé ndarrocjan simple que ijeha xijntta, ¿queéén nchao sinchegonda chojni? Xijntta mé ixonhi xé, jeho para singo ndaha co tsingachje chojni.

<sup>14</sup> 'Co jaha ra inchin joadingasán para icha chojni de ngataha nontte jihi. Inchin ná ciudad que jí ngataha ná jna, cain chojni de cjin nchao siconxin na ciudad mé. <sup>15</sup> Ni ná lámpara are jinchen-gasán čoha sehe ngaxinhi ná cajón ixin lámpara mé chonda que sehe noi para sinchengasenhe cain chojni que te ngain nchia. <sup>16</sup> Jamé jaha ra cai, nchehe ra jian para que tti jian que jaha ra sinchehe ra, mé inchin joadingasán para ngatto con cain chojni para que are jehe na sicon na tti jian que jaha ra sinchehe ra, jehe na sinchecoanxinhi na Ndodá ra que ttjen ngajni.

*Jesús cjoagoe chojni quehe rročo ley que vayé Moisés*

<sup>17</sup> Co Jesús ndačo cai:

—Xaxaonha jaha ra que janha joihi para jointtaxante ley que vayé Moisés ni cain tti ndačo cain profeta are saho; janha joiha para jointtaxante cain mé, janha joihi para joindattjo ra tti mero ndoa quehe rročo cain mé. <sup>18</sup> Janha rrondattjo ra ndoa que cain tiempo que sehe ngajni co nontte, ley mé rroxantteha ni rioho ni ná letra sachjeha hasta tsoenja cain tti jitaxin ngain ley mé ixin cain mé chonda que tsonhe. <sup>19</sup> Mexinxin

tti chojni que ditticaonha quexeho parte que ley jiji ttetonha, masqui parte mé antoha importante, co si chojni mé tsjagoe icha chojni para sinchehe na xajeho, Dios rrondačo que chojni mé antoha importante ngajni, tti ttetonha Dios. Pero tti chojni que ditticaon cain tti ttetonha ley jiji, co jehe nchecoenhe icha chojni xajeho inchin jehe nchehe, Dios rrondačo que ixin chojni mé anto importante na ngajni tti ttetonha Dios. <sup>20</sup> Ixin janha rrindattjo ra, que si jaha ra sincheha ra icha jian que cain ximaestroey ley mé co tti nchehe cain xifariseo, jaha ra čhoha sintte ra ngajni tti ttetonha Dios.

*Are Jesús ndache chojni quehe tsonhe chojni que tsoñaohe chó*  
(Lc. 12.57-59)

<sup>21</sup> Jaha ra coinhi ra tti vitonhe nindogoelitoa ra xančhjen janhi: “Dantsjeha ra vidé iná chojni, ixin quexeho tti santsjehe vidé iná chojni, tti tjaya chonda que soenhe juzgado.” <sup>22</sup> Pero janha rrondattjo ra que quexeho tti tsoñaohe iná chojni, tti tsoñao mé chonda que soenhe juzgado. Co quexeho tti rrondache feo iná chojni, tti rronichja feo mé soenhe juzgado de ngain tti juzgado que chonda icha tsje joachaxin nttihi ngataha nontte. Co tti ncheguinhí iná chojni, tonto, tti ndačo mé chonda peligro de tsji ngacjan xoi infierno.

<sup>23</sup> Mexinxin are jaha tsjiho ofrenda ngain alté Dios para sanjo ngain, co rato mé jaha rrořaxaon que ixin iná chojni ningaconha jaha, <sup>24</sup> nttiha ttintohe ngaca altar tti jaha sanjo ngain Dios, co tti ngain tti chojni que ningaconha co nchetsenhe

ñao que itsoñaoha nganji ni jaha ngain jehe. Cottimeja cjan jaha para danjo tti jaha rridanjo ngain Dios.

<sup>25</sup> 'Si çhonja chojni siçho jie para ixin jaha, co tsjiho ngain juzgado, icha jian de ngatjao nttiha jaha nchetsenhe ñao chojni mé para que jehe sinttatjañaha cain tti rrica, para que jehe itsjioha ngain xijuez. Ixin si nahi, xijuez tsetonhe xa xipolicía para que tsiaxinha xa jaha. <sup>26</sup> Co ndoa tti janha rrindattjo, que nttiha siaxinha hasta que tsjengaja hna cainxin tomi que jaha rrica.

*Are Jesús ndache chojni que ixin jianha para ná xí sejoacaho xa iná nçhí*

<sup>27</sup> 'Jaha ra ocoinhi ra ixin ley que vayé Moisés tte-tonha janhi: “Dintteçhincoha ra iná nçhí que jeha nçhíçhiha ra.” <sup>28</sup> Pero janha rrindattjo ra que quexeho ná xí tsiacophe iná nçhí, xí mé rroçho que inchin ojoinchehe xa tti jehe xa çaxaon xa ngain nçhí mé de ngain ansén xa.

<sup>29</sup> 'Mexinxin si jmacon sinttaçaxaon para sinchehe jianha, ncheha cosa mé masqui hasta dantsjengui jmacon mé co danca ndaha, ixin icha jian sinchetján ná parte de cuerpoa co nahi ngoixin cuerpoa tsji ngain infierno. <sup>30</sup> Co si rá sinttaçaxaon de sinchehe jianha, ncheha cosa mé masqui hasta tonçhinji rá mé co danca ndaha, ixin icha jian sinchetján ná parte de cuerpoa co nahi ngoixin cuerpoa tsji ngain infierno.

*Are Jesús ndaçho de ixin tti chojni que daçhjendehe chó*

*(Mt. 19.9; Mr. 10.11-12; Lc. 16.18)*

<sup>31</sup> 'Cai ndačo ngain ley que vayé Moisés: “Tti rinao sačhjendehe nčhičhihi chonda que sinchechjienhe nča ná xón que setaxin que jehe ndoa ondavačhjendehe nča para ngoixin vidé.”

<sup>32</sup> Pero janha rrindattjo ra, que si ná xí sinao xa sačhjendehe xa nčhičhihi xa (co jeha ixin vittjaxin xa nča tajijoacaho nča iná xí,) xixihi nča tti culpé ngattoxon con Dios co por ixin tti sinchehe jehe xa, nčí sinchehe nča jianha cai. Co xí que jehe nča secoo nča después, sinchehe xa jianha cai ixin secoo xa nčí mé.

*Are Jesús ndache chojni ixin nchejuraha*

<sup>33</sup> Cai ndačo Jesús:

—Cai jaha ra ocoinhi ra ixin vitonhe nindo-goelitoa ra xančjen janhi: “Ttinttoeha de nchehe tti jaha joincheprometé conixin ná juramento de ixin nombré Dios.” <sup>34</sup> Pero janha rrindattjo ra que xonhi tiempo sinchejurá ra. Nchejuraha ra de ixin ngajni ixin nttiha tti ttjen Dios. <sup>35</sup> Ni nchejuraha ra de ixin ngataha nontte ixin nttihi tti nchejogaxin rotté Dios. Ni nchejuraha ra de ixin Jerusalén ixin mé tti ciudad de Dios, tti Rey de cainxin cosa. <sup>36</sup> Ni nchejuraha ra de ixin já ra ixin jaha ra čoha sinchettie ra ni sincheroa ra ni ná xajá ra. <sup>37</sup> Mexinxin icha jian jeho ndačo ra “ján” o “nahi” ixin si rrondačo ra icha, mé tsixin de ngain inchínji.

*Are Jesús ndačo ixin tsjengueyexinha ni iná chojni que joinchehe jianha ngain ni*

*(Lc. 6.29-30)*

<sup>38</sup> 'Jaha ra ocoinhi ra quehe ttetonha ley que vayé Moisés: “Tti tsončinga jmacon ná chojni,

cai jehe chonda que rročhinga jmacon. Co tti san-  
 qué neno ná chojni, cai jehe chonda que setsinga  
 neno.” <sup>39</sup> Pero janha rrindattjo ra que ncheha ra  
 jamé ngain tti chojni que sinchehe jamé nganji  
 ra. Sino que, si čhonja chojni rrožanguiha ra ná  
 manazo ngá con ra, dittoaxin ra para rrožanguiha  
 ra iná manazo. <sup>40</sup> Co si čhonja chojni sičo jie para  
 ixin jaha ra co sino na santsjaha ra na camisá ra,  
 jaha ra dittoaxin ra danjo ra hasta chamarrá ra  
 cai. <sup>41</sup> Si čhonja chojni tsetonha que jaha ra tsjiho  
 ra ná carga yó kilómetro, jaha ra dittoaxin ra ttjiho  
 ra carga mé hasta nó kilómetro. <sup>42</sup> Co quexeho  
 chojni que sanchiaha ra ná cosa, jaha ra chjehe ra;  
 co ndačho ha ra nahi ngain chojni mé.

*Are Jesús ndačo chonda que sino ni chojni que  
 ningaconhe ni*

*(Lc. 6.27-28, 32-36)*

<sup>43</sup> Cai jaha ra ocoinhi ra ixin ley que vayé Moisés  
 janhi ttetonha: “Rinao chojni amigoa co ninga-  
 conhe tti chojni que ningaconha jaha.” <sup>44</sup> Pero  
 janha rrindattjo ra que rinao ra tti chojni que  
 ningaconha ra, co nichja ra jian de ixin tti chojni  
 que nichja jianha de ixin jaha ra co nchehe ra  
 jian ngain tti chojni que ningaconha ra, co nchet-  
 senhe ra ñao Dios que jehe sinchehe jian ngain  
 tti chojni que feo ndattjo ra co nchehe feo nganji  
 ra. <sup>45</sup> Jañá sinchehe ra para que sintte ra ndoa  
 xenhe Ndodá ra que ttjen ngajni. Ixin jehe Ndo  
 mé tti rroanha nchanho para nchengasañehe cain  
 chojni, tti chojni que nchehe jian co tti chojni que  
 nchehe jianha, co jehe Ndo tti rroanha čhin para  
 cainxin chojni cai, tti nchehe jian co tti nchehe

jianha. <sup>46</sup> Ixin si jaha ra rinao ra jeha tti chojni que jehe rinao ra jaha ra, xonhi premio sayehe ra ixin hasta tti chojni que chonxinha de ixin Dios cai nchehe jamé, inchin cain xicobrador de impuesto. <sup>47</sup> Co si jeha amigoa ra rronichjehe ra, cai mé ¿quehe jian sinchehe ra? ixin hasta tti chojni que chonxinha de ixin Dios nchehe na jamé cai. <sup>48</sup> Nchehe ra de que dintte ra chojni jian, jañá inchin Ndodá ra que ttjen ngajni jehe Ndo jian Ndo.

## 6

*Are Jesús ndačho ixin chonda ni que tsjenguijna ni chojni noa*

<sup>1</sup> Nchehe ra tti jian jeoha are tatetsjehe icha chojni para que jehe na sicon ra na co rrořaxaon na ixin jaha ra anto jian ra. Si jamé sinchehe ra, Ndodá ra que ttjen ngajni xonhi tsjengaha ra Ndo hna. <sup>2</sup> Mexinxin are jaha ra tsjenguijna ra chojni noa, ttequinha ra ngain cainxin chojni inchin nchehe canxin chojni are ngain nihngo Israel co ngá nttiha. Chojni mé ndačho ixin nchehe na jañá para ixin Dios, pero ndoaha; chojni mé nchehe na jañá para que icha chojni rronichja na jian de ixin chojni mé. Pero janha rrindattjo ra que Dios xonhi tsjenguehe hna chojni mé ixin ojoacha de tti jian que nichja icha chojni por ixin jehe. <sup>3</sup> Mexinxin jaha ra are tsjenguijna ra chojni noa, xonhi chojni ttequinhi ra, ni chojni icha amigoa ra ndacheha ra. <sup>4</sup> Rročho que ttjenguijna ra chojni mé, pero jimao. Co Ndodá ra que ttjen ngajni sicon Ndo tti jaha ra sinchehe ra; co jehe Ndo tsjengaha ra Ndo hna.

*Jesús cjoago quexén sinchecoanxinhi ni Dios  
(Lc. 11.2-4)*

<sup>5</sup> Co Jesús ndačo cai:

—Are jaha ra sinchecoanxinhi ra Dios, ncheha ra inchin nchehe tti chojni que ncheřoxinhi na nchecoanxinhi na Dios tatengattjen na ngaxinhi nihngo co ngain esquiné nttiha, para que icha chojni sicon na. Chojni mé ndačo na ixin nchehe na jañá para ixin Dios, pero ndoaha. Janha rrindattjo ra que Dios tsjengueha hna chojni mé tti jehe na tenchehe na, ixin ochonda na tti sachá na. <sup>6</sup> Mexinxin are jaha ra sinchecoanxinhi ra Dios, dixinhi ra nchiandoi ra co ttejehe ra puerté nchia co nchecoanxinhi ra Dios Ndodá ra que ttjen nganji nttiha, jaho ra conixin jehe Ndo. Co Dios tti sicon tti jaha ra tenchehe ra, co jehe Ndo tsjengaha ra Ndo hna.

<sup>7</sup> 'Are jaha ra sinchecoanxinhi ra Dios cjan-taonha ra de nichja ra tti palabra que řonhi řé, inchin tti chojni que chonxinha de ixin Dios, ixin jehe na řaxaon na que Dios sinchehe caso cain tti jehe na tendačo na ixin anto tsje tenichja na. <sup>8</sup> Mexinxin jaha ra ncheha ra inchin nchehe jehe na, ixin Ndodá ra que ttjen ngajni onohé Ndo quehe rrogondaha ra icha saho que jaha ra sanchiehe ra Ndo. <sup>9</sup> Mexinxin jaha ra nchecoanxinhi ra Ndo janhi:

Padre soixin que ttjen ngajni,  
nombrea soixin jiquinixin tsosayehe.

<sup>10</sup> Siquetonha nttihi soixin.

Co tsonhe inchin soixin rinao nttihi ngataha nontte, jañá inchin tonhe nttiha ngajni.

<sup>11</sup> Chjana ra jai tti sine na que rrogondana na.

12 Nchetjañana ni ra tti jianha que jointtaha na, jañá inchin janha na jointtatjañá na tti chojni que joinchehe jianha nganji na.

13 Nchegattoha ni ra tangui; tančjandaha ni ra ngain tti jianha.

Ixin soixin tti ttetonha co soixin tti chonda cainxin joachaxin co gloria para cainxin tiempo. Amén.

14 'Ixin si jaha ra nchetjañehe ra tti chojni que nchehe jianha nganji ra, Nnodá ra que ttjen ngajni sinttatjañaha ra Ndo jaha ra cai. 15 Pero si jaha ra nchetjañeha ra chojni mé, Nnodá ra que ttjen ngajni cai čhoha sinttatjañaha ra Ndo cain tti jianha que jaha ra nchehe ra.

*Are Jesús ndačo que xén sinttecjáño ni*

16 Co Jesús ndačo cai:

—Are jaha ra sinttecjáño ra para ixin Dios, dinttechinha ra inchin tti chojni que ncheha inchin ndačo. Chojni mé ndačo na ixin tecjáño na para ixin Dios pero nahi, ixin chojni mé dinttechín na para que icha chojni dicon que ixin jehe na tecjáño na. Pero janha rrindattjo ra seguro que chojni mé Dios xonhi tsjenguehe na hna ixin ochonda na tti sachá na. 17 Pero jaha ra are sinttecjáño ra para ixin Dios, tontti ra jinda ngá con ra co nchejinji ra já ra jian, 18 para que icha chojni rroxaxaonha na que ixin jaha ra tecjáño ra para ixin Dios. Jeho Nnodá ra que ttjen nganji tsonohe Ndo, co jehe Ndo tsjengaha ra Ndo hna.

*Cosa rentte que rrochonda na ngajni  
(Lc. 12.33-34)*

19 Cai ndačo Jesús:

—Datseha ra tsje cosa nttihi ngataha nontte, nttihi tti ndattjehe cochí co nttihi tti cain cosa ndaditján, co nttihi tti jí tti chehe que tté cain cosa.  
<sup>20</sup> Icha jian datse ra tsje cosa para ngajni, nttiha tti xonhi cochí jí para tsjehe cain cosa, ni cain cosa diha chjín, ni tti chehe coha nttiha para tsé.  
<sup>21</sup> Ixin ngain lugar tti jaha ra rrochonda ra cosa icha importante para ixin jaha ra, cai nttiha sehe joarrixaoan ra co ansean ra.

*Jmacon ni, mé tti lamparé cuerpoe ni*  
*(Lc. 11.34-36)*

<sup>22</sup> Cai ndačo Jesús:

—Jmacon jí inchin ná lámpara ngain cuerpoa. Mexinxin si jmacon jian, cai ngoixin cuerpoa rrochonda joadingasán. Rročo si joadingasán que Dios rroanha jí ngain ansean, jaha ná chojni jian.  
<sup>23</sup> Pero si jmacon jianha, cai ngoixin cuerpoa jí ngain tti naxin xehe. Rročo que si coha nganji tti joadingasán que Dios rroanha, jaha inchin chojni chejo ixin čoha dicon nttié Dios. ¡Co tti naxin xehe mé anto jianha para ixin jaha!

*Chonda que icha sinao ni Dios que tomi*  
*(Lc. 16.13)*

<sup>24</sup> 'Xonhi chojni nchao sinchehe xé yó xinajni ngain nacoa tiempo, ixin icha sinao ná xinajni co rroningaconhe iná xinajni, o icha sitticaon ngain ná xinajni co ngain iná xa isincheha caso. Jañá cai čoha sinao ni tomi co sinao ni Dios ngain nacoa tiempo.

*Dios jinda cain xenhe*  
*(Lc. 12.22-31)*

25 Cai ndačho Jesús:

—Co janha rrindattjo ra que taha ra joachjaon de ixin tti sintte ra co de ixin tti sihi ra para sinttechonxin ra, ni taha ra joachjaon de ixin lontto para sinttengaha ra ixin icha rentte vidé ni que tti jine ni, co icha rentte cuerpoe ni que lonttoe ni. Ixin Dios chjá ra vida que techonxin ra, mexinxin jehe tti rrochjá ra cain cosa que rrogondaha ra ngain vida jihi. <sup>26</sup> Tsjehe ra que cain conttoa que tjanganga va ngataonhe čhintto; jehe va xonhi ttenga va ngataon jngui, co jamé xonhi cosecha tsín va, ni ttenchjianha va cosecha ngain ná nchia. Pero masqui jamé, Ndodá ra que ttjen ngajni danjo Ndo tti jine cainxin coxigochjan mé. Co jaha ra seguro que icha rentte ra que cain coxigochjan mé. <sup>27</sup> Co jaha ra masqui anto tsa ra joachjaon pero čhoha sahngui ra ni irioho metro icha de tti jininxin ra.

<sup>28</sup> ¿Quedonda jaha ra anto ta ra joachjaon de ixin lontto? xaxaon ra jian quexén dangui cain tsjo ngataon jngui que cain tsjo mé ncheha tsjo xa, ni tajinha tsjo chjon. <sup>29</sup> Co ni rey Salomón, que jehe anto čhjoin vaguitsá, pero xonhi tiempo jehe vetsá icha čhjoin que cain tsjo. <sup>30</sup> Si Dios jańá nchetsá cain ca que jehó jai jí ca ngataon jngui co ndoe ondarroxema ca co rroche ca ngain xohi, mexinxin Dios sinchehe icha jian nganji jaha ra masqui xa ditticaonha ra jian ngain Dios. <sup>31</sup> Mexinxin taha ra joachjaon ni tendačhoha ra: “¿Quehe sontte na? o ¿quehe sonho na? o ¿quehe lontto sitoxianxin na?” <sup>32</sup> Ixin cain icha chojni cain jihi tti taxin na joachjaon, pero jaha ra chonda ra ná Ndodá ra

que ttjen ngajni co jehe Ndo onohe Ndo que jaha ra ján rrogondaha ra cain cosa jihi. <sup>33</sup> Mexinxin cain tiempo ditticaon ra cain tti jehe Ndo ttetonha Ndo, co nchehe ra tti jehe Ndo rinao Ndo, co jamé sayehe ra cain cosa jihi. <sup>34</sup> Co taha ra joachjaon de ixin quexén sinchehe ra ndoe, ixin ndoe tsiaho ojé problema. Nchanho co nchanho chonda problemé, pero jaha ra chonda ra confianza ngain Dios ixin jehe tti sinttaxaon ra quehe sinchehe ra.

## 7

### *Ncheha ra juzgado iná chojni* (Lc. 6.37-38, 41-42)

<sup>1</sup> Ncheha ra juzgado iná chojni para que Dios sincheha juzgado nganji ra. <sup>2</sup> Ixin jehe sinttajuzgá jaha ra xajeho inchin jaha ra nchejuzguehe ra icha chojni, co jehe sinchehe nganji ra inchin nchehe jaha ra ngain icha chojni. <sup>3</sup> ¿Quexén nchao sicon ra tti anto nchín caxineno que jingangui jmacon iná chojni, co diconha ra tti caxineno anto jie que jingangui jmacon ra jaha ra? <sup>4</sup> Si jaha ra jingangui ná caxineno anto jie ngangui jmacon ra, ¿quexén nchao rronache ra iná chojni: “Tančhjanda na santsjenguiha caxineno que jingangui jmacon”? <sup>5</sup> ¡Jaha ra tti chojni que ncheha tti ndačo! Saho dantsjengui ra tti caxineno anto jie que tengangui con ra, co jamé nchao sicon ra jian para santsjengui ra tti caxineno nchín que jingangui jmacon iná chojni.

<sup>6</sup> Ncheha ra sigue ndačo ra joajné Dios ngain tti chojni que anto čhintto inchin conia ixin joajna

mé anto jian co jehe chojni mé puede rrocjan-coa na nasoenson ra na. Ni ncheha ra sigue ndačo ra joajné Dios ngain tti chojni que deporsín ncheřoxinhi nchehe jianha, ixin chojni mé te inchin cocochi co joajné Dios inchin perla que anto fino, co jehe na sincheha na caso, inchin are cocochi ttingachjexon va noa co jineha va.

*Queřén sanchia cosa de ngain Dios*

*(Lc. 11.9-13; 6.31)*

<sup>7</sup> Danchia ra co Dios rrochjá ra. Ttjé ra co sinchí ra. Dinga ra puerta co puerta mé rroxiré. <sup>8</sup> Ixin tti chojni que danchia dayé; co tti chojni que ttjé, jehe dittja; co tti chojni que dinga puerta, xiré puerta mé para ixin jehe.

<sup>9</sup> ¿Ixin apoco čhonja de jaha ra nchao rrochjehe ra xanha ra ná řo are sanchiaha ra xan niot-tja? <sup>10</sup> ¿O apoco nchao rrochjehe ra xan nntaohe conché are sanchiaha ra xan nntaohe copescado? <sup>11</sup> Jañá, si jaha ra que jeha jian ra noha ra danjo ra cosa jian ngain xanha ra, mexinxin Ndodá ra que ttjen ngaini seguro rrochjá ra Ndo cosa jian jaha ra řo sanchiehe ra Ndo.

<sup>12</sup> Mexinxin cainxin tiempo nchehe ra ngain icha chojni inchin jaha ra rinao ra sinchehe jehe na nganji ra, ixin jamé ttetonha ley que vayé Moisés co cain tti dicjin cainxin profeta are saho.

*Tti puerta jno*

*(Lc. 13.24)*

<sup>13</sup> Para tsji ra ngaini chonda que sixinxin ra de ngain tti puerta jno, ixin tti puerta ton co tti ntthiha ton, mé tti sattjixin tsje chojni ngain infierno.

<sup>14</sup> Pero tti puerta co tti nttiha que satsjixin chojni para ngajni, cayoi mé nojno, co tsjeha chojni chonxin puerta mé co nttiha mé.

*Nttattochjoin datsoan ni ntta de ixin ttochjoín ntta*

*(Lc. 6.43-44)*

<sup>15</sup> 'Ttjiho ra cuidado de ixin tti chojni mentiroso que ndačo na ixin jehe na nichja na de ixin Dios pero ndoaha. Jehe na ndačo na jańá de ngain rroha na pero de ngain ansén na jehe na jianha na inchin coxigo čhintto ngagaha jna.

<sup>16</sup> Jaha ra nchao satsoan ra chojni mé de ngain tti jehe na nchehe na ixin inchin nttanchaha čhoha sinchian ntta uva, ni canchaha čhoha sinchian ca higo, <sup>17</sup> jańá cai cain nttattochjoin jian danjo ntta ttochjoin jian, co tti nttattochjoin que xonhi xé danjo ntta ttochjoin que xonhi xé. <sup>18</sup> Nttattochjoin jian čhoha sanjo ntta ttochjoin que xonhi xé ni cai nttattochjoin que xonhi xé čhoha sanjo ntta ttochjoin jian. <sup>19</sup> Cain nttattochjoin que danjoha ttochjoin jian činji ntta mé co che ntta ngain xohi. <sup>20</sup> Co jamé jaha ra rrochonxin ra chojni mé de ngain tti jehe na nchehe na.

*Cainxinha chojni tsji na ngajni tti ttetonha Dios (Lc. 13.25-27)*

<sup>21</sup> 'Cainxinha chojni que ndachjenji na janha: "Soixin, Soixin", tsji na ngajni tti ttetonha Ndoana, sino que jeho tti chojni que nchehe cain tti rinao Ndodana que ttjen ngajni. <sup>22</sup> Are tsí nchanho mé, tsje chojni rrondachjenji na janha: "Soixin, Soixin, janha na ndattjan na chojni de ixin soixin, co ngain nombrea venguixin na

espíritu jianha de ngaxinhi cuerpoe tsje chojni, co de ixin nombrea jointtaxin na tsje milagro.”  
<sup>23</sup> Pero ngain nchanho mé janha rrondattjan na: “Janha xonhi tiempo joatsoan jaha ra inchin chojnina. Sattjixin ra de nganji janha, jaha ra xo joinchehe ra jianha.”

*Tti nchia que jingattjen ngataha ttjao co tti nchia que jingattjen ngataha nchise*

*(Lc. 6.47-49; Mr. 1.22)*

<sup>24</sup> 'Jañá mexinxin tti chojni que ditticaon na janha co nchehe tti janha ndačhjan, chojni mé inchin ná xí que xaxaon jian para joinchechjian nchiandoha ngataha ttjao. <sup>25</sup> Co are joí čhin, coyé jinda ngain río, co cjoa čhintto soji ngain nchia mé, pero nchia vetsingaha nchia ixin soji jingattjen nchia ngataha ttjao. <sup>26</sup> Pero tti chojni que ttinhi tti janha ndačhjan co ncheha jamé, chojni mé inchin tti ná xí que xonhi xé tti jehe xa xaxaon xa ixin dinchechjian xa nchiandoha xa ngataha nchise. <sup>27</sup> Co are joí čhin, coyé jinda ngain río, co cjoa čhintto soji, nchia mé cjamangui nchia. Co mé anto tangui para ixin xí mé.

<sup>28</sup> Are Jesús joexin nichja cain jihi, cain chojni que tettinhi nttiha vinttegoan na admirado de ixin tti ndačo Jesús, <sup>29</sup> ixin Jesús ndačo ngain na conixin anto tsje joachaxin, co jeha inchin cain ximaestroey ley.

## 8

*Jesús joinchexingamehe ná tti vechonda lepra*  
*(Mr. 1.40-45; Lc. 5.12-16)*

<sup>1</sup> Are Jesús vaniaxin de ngain jna mé, anto tsje chojni rroé. <sup>2</sup> Co conchienne ná xí que veninxin chin dinhi lepra. Xí mé vettoxin nttajochjihi xa ngattoxon con Jesús co ndačo xa:

—Si rinao soixin, nchao nchexingamana de ixin chin que janha rrichonda.

<sup>3</sup> Cottimeja Jesús catte xí mé co ndačo ngain xa: —Ján, rinaho. Co jaxon oxingamaha jaha.

Co are Jesús ndačo yá jehe tti venihi mé xingamehe de ixin tti chin que jehe vechonda. <sup>4</sup> Co Jesús ndačo ngain tti xí mé:

—Tsjenxin, xonhi chojni ndache. Jeho ttji co tonchienne ngain xidána para que jehe xa sicon xa ixin jaha oxingamaha, co danjo para ixin Dios inchin ttetonha ley que vayé Moisés, para que cain chojni nttaha tsonohe na que jaha oxingamaha de ixin tti chin que joarichonda.

*Jesús joinchexingamehe ná xanxí, xinchehe xé ná xicapitán romano*

*(Lc. 7.1-10)*

<sup>5</sup> Are joigaha Jesús rajna Capernaum, ná xisol-dado capitán romano conchienne xa co joinchet-senhe xa ñao Jesús, <sup>6</sup> co ndačo xa:

—Nttatsanha ñao soixin nchexingamehe ná xinchehe xana ixin nihi xa. Tajitsinga xa ngain nchia co čoha ttingui xa co cai anto jittín xa.

<sup>7</sup> Jesús ndačo:

—Janha tsji sinttaxingamá xí mé.

<sup>8</sup> Co xicapitán mé ndačo xa:

—Nttatsanha ñao soixin, janha ni jiquininxinha na para soixin sixinhi nchiania. Jeho rinaho janha que soixin ttetonha co xinchehe xana

orroxingamehe xa. <sup>9</sup> Janha nona jamé ixin janha ditticanho cain tti ttetonna xichonda icha tsje joachaxin que janha, co cai janha chonda joachaxin de ttetoan cain xisoldadona. Are janha ndattjan ná de jehe xa que tsji xa quexeho parte, jehe xa ttji xa. Co are ndattjan xa que tsí xa, jehe xa ttí xa. Co are ttetoan ná de xinchehe xana de sinchehe xa quexeho xa, jehe xa nchehe xa xa mé.

<sup>10</sup> Are Jesús coinhi jihi jehe goan admirado co ndačo ngain chojni que jidicao:

—Janha rrindattjo ra ndoa que cainxin rajna de Israel xonhi chojni vetan janha que anto jian ditticaon inchin xí jihi. <sup>11</sup> Janha rrondattjo ra que tsje chojni de icha nación inchin xisoldado romano jihi tsji na siguintte na ngain Abraham, co Isaac co Jacob nttiha ngajni tti ttetonha Dios. <sup>12</sup> Co tsje chojni Israel que tequininxin tsji nttiha, pero tsjiha na nttiha ixin Dios rrorroanha na ngain tti naxin xehe, nttiha tti puro rrotsjanga na, co hasta sinetaon neno na.

<sup>13</sup> Cottimeja Jesús ndačo ngain xicapitán mé:

—Sattji nchiandoi, co tsonhe inchin jaha ditti-caon.

Co xinchehe xé mé xingamehe xa ngain rato mé.

*Jesús joinchexingamehe jannché Pedro  
(Mr. 1.29-31; Lc. 4.38-39)*

<sup>14</sup> Jesús cjoí nchiandoha Pedro, co nttiha vicon Jesús jannché Pedro tajitsinga jan de ixin soa.

<sup>15</sup> Jesús jecho tsehe rá jan co ondavaçhehe jan soa que veyá jan, co vingattjen jan para joincheaten-dehe jan na.

*Jesús joinchexingamehe tsje chojni nihi*  
(Mr. 1.32-34; Lc. 4.40-41)

<sup>16</sup> Co are ondaconaxin xehe, tsje chojni joiaöhe na Jesús tsje chojni que chonda espíritu jianha, co jehe, conixin nacoa palabra que jehe nichja, vengui cain espíritu jianha mé. Co cai ngain rato mé jehe joinchexingamehe cainxin chojni nihi que conchienne ngain. <sup>17</sup> Jihi conhe para que joiconhe tti dindačo profeta Isaías are jehe dicjin: “Jehe mismo vayé chinha na co sajoicao tti anto ttín cuerpoa na.”

*Tti chojni que joinao rrogacao Jesús*  
(Lc. 9.57-62)

<sup>18</sup> Are Jesús vicon que anto tsje chojni xatte ngain, jehe coetonhe chojni que vacao para vatto na conixin jehe para toenixin lago. <sup>19</sup> Co ngain rato mé conchienne ná ximaestroe ley Israel ngain Jesús co ndačo xa:

—Maestro, janha rinaho sacjin na tti soixin sacji.

<sup>20</sup> Jesús ndačo:

—Cain condanixa chonda va cuevé va co cain conttoa chonda va caqué va; pero janha, tti Xí que joixin de ngajni, chondaha ni ttinó saričhin.

<sup>21</sup> Co iná de tti chojni que vacao Jesús ndačo:

—Janha ján sacjin na, pero chonna na hasta ndasenja ndodana para que janha tsjavá ndo.

<sup>22</sup> Co Jesús ndačo:

—Chjin na co tančhjanda tti chojni que ditti-caonha na janha tsjavá chó na.

*Jesús tajoaquehe čhintto conixin olé lago*  
(Mr. 4.35-41; Lc. 8.22-25)

<sup>23</sup> Cottimeja Jesús conixin chojni que vacao coani na ná barco co sacjoixin na de nttiha.

<sup>24</sup> Co are ongataonhe jinda mé, cjoa ná čhintto anto soji que tsín olé jinda que hasta cjoanotaon barco mé. Co Jesús tajijoa ngaxinhi barco hora mé. <sup>25</sup> Cottimeja cain chojni que joicao cjoí na joinchexingamehe na Jesús co ndačo na ngain:

—Nttatsanha na ñao soixin, tančhjandaha ni ra ndasenhe na ixin barco ndajixincanjingui jinda.

<sup>26</sup> Jesús ndačo ngain na:

—¿Quedonda anto žaon ra? ¡Jaha ra antoha jian ditticaon ra tti janha ndattjo ra!

Cottimeja vingattjen Jesús co nichjé čhintto conixin jinda, co ngain rato mé tavehe čhintto conixin jinda. <sup>27</sup> Co cain chojni mé vinttegoan na admirado, co vinttendačo na:

—¿Quehe joachaxin chonda xí jihi que hasta čhintto co jinda ditticaon tti ndačo xa?

*Xí de ngain nonttehe Gadara que vinttechonda espíritu jianha*

*(Mr. 5.1-20; Lc. 8.26-39)*

<sup>28</sup> Are Jesús joiji toenxin lago mé ongain nonttehe Gadara, yó xí vinttegačhjexin xa de ngaxinhi cueva tti vaguittohe cuerpoe chojni que ndavaguenhe ngain tiempo mé. Co xí mé vintteconchienhe xa ngain Jesús. Cayoi xí mé vinttechonda xa espíritu jianha ngaxinhi cuerpoe xa, co anto čhintto vintte xa que ni žonhi chojni nchao vagattoxin ngain lugar mé. <sup>29</sup> Co vinttendačo xa sén:

—¿Quedonda joihi nganji na, jaha Jesús, Xeneh Dios? ¡Xa jeha tiempo para que jaha sincheguetan ni ra tangui!

<sup>30</sup> Co nonttiha chiaon rridinttene anto tsje cocochi. <sup>31</sup> Co cain espíritu jianha joinchetsenhe ñao Jesús co ndaĉho:

—Si senguixin na de ngaxinhi cayoi cuerpo tehe, nttatsanha na ñao tanĉhanda na sixinhi na ngaxinhi cocochi taha.

<sup>32</sup> Cottimeja Jesús ndaĉho:

—Ján, diguixinhi ra nttiha remé.

Co cain espíritu jianha vaĉhjexin de ngaxinhi cayoi cuerpoe xí mé co savixinhi ngaxinhi cain cocochi mé. Cottimeja cain jehe va ndavinttecoloco va co coinga va xincanji va ngain ná lago nttiha, co nttiha joingui va jinda co nttiha ndavintteguenxin cainxin va ixin vinttecjonhe va jinda.

<sup>33</sup> Co tti chojni que vaquingaria cain cocochi mé vintteĉaon na co coinga na cjoí na ngain rajna que jí icha chian para joindaĉho na tti conhe cain cocochi, co tti conhe ngain cayoi xí que vinttechonda espíritu jianha. <sup>34</sup> Cottimeja cain chojni de ngain rajna mé vinttecji na tti jí Jesús. Co are vícon na Jesús, jehe na joinchetsenhe na ñao Jesús que satsjixin de ngain nonttehe na.

## 9

*Jesús joinchexingamehe ná xí que ĉhoĉa vacji  
(Mr. 2.1-12; Lc. 5.17-26)*

<sup>1</sup> Cottimeja Jesús coani barco iná co sacjoi para toenxin jinda ngain rajna Capernaum, rajné Jesús tiempo mé. <sup>2</sup> Nttiha joicaohé na Jesús ná tti xí

que čhoha vacji, tajitsingataha xa ná camilla. Are Jesús vicon que cain chojni que joicao tti nihi mé chonda seguro que Jesús sinchexingamehe jehe tti nihi mé, Jesús ndačo ngain tti nihi:

—Āaonha, janha ojointtatjañaha cain tti jianha que jaha rrica.

<sup>3</sup> Co cainxin ximaestroe ley Israel que te nttiha vintteřaxaon xa: “Nchaoha tti jinichja xí jihi; Dios tsoñaohe xa.” <sup>4</sup> Pero Jesús ovenohe tti teřaxaon xí mé, co jehe ndačo ngain xa:

—¿Quedonda anto jianha tti jaha ra řaxaon ra? <sup>5</sup> ¿Quexehe tti icha tanguiha rročhjan: “Ovitjañaha jaha cain tti jianha que joinchehe”, o rrondačhjan: “Dingattjen co sattjixin rottea”? <sup>6</sup> Nchao remé, janha tsjagoha ra que janha, tti Xí que joixin de ngajni, chonda joachaxin nttihi ngataha nontte para nttatjañá chojni tti jianha que nchehe na.

Cottimeja ndačo Jesús ngain tti čhoha vacji mé:

—Dingattjen co tsinhi camillá co sattjixin rottea para nchiandoi.

<sup>7</sup> Co ngain rato mé jehe tti čhoha vacji, vingattjen co sacjoi para nchiandoha. <sup>8</sup> Co cain chojni que te nttiha are vicon na milagro jihi, jehe na vintteřaon na co ndačo na que ixin Dios jian ixin joanjo joachaxin mé ngain chojni.

### *Jesús nichjé Mateo*

*(Mr. 2.13-17; Lc. 5.27-32)*

<sup>9</sup> Cottimeja Jesús sacjoixin de nttiha, co ngatja nttiha Jesús vicon Mateo tají ngaca mesa tti jinchexin cobro cain impuesto. Co Jesús ndačo ngain:

—Āacoi, chjin na.

Co ngain rato mé jehe Mateo vingattjen co sacjoi conixin Jesús.

<sup>10</sup> Co después Jesús tajine ngain nchiandoha Mateo. Co nttiha conchienne tsje xicobrador de impuesto, co icha chojni que nchehe jianha, co cain nimé joine na ngain mesa conixin Jesús conixin cain chojni que jehe vacao. <sup>11</sup> Pero canxion xifariseo vintteguicon xa jihi, co después vintte-janchiangui xa ngain tti chojni que vacao Jesús co vinttendačo xa:

—¿Quedonda ximaestrea ra jinecaho xa cain xicobrador de impuesto, co icha chojni que nchehe jianha?

<sup>12</sup> Jesús coinhi jihi, co jehe ndačo ngain xa:

—Chojni que niha, chojni mé rrogondeha xincheĥoan, jehó tti chojni nihi, mé tti rrogondehe xincheĥoan. <sup>13</sup> Sattji ra co diquinxin ra quehe rročo tti parte ngain Palabré Dios que jitaxin: “Janha rinaho que jaha ra tsiacnoehe ra chojni, co nahi ixin sonhe ra coxigo para tsín ra para ixin janha.” Mexinxin janha joiha para joinichjá chojni jian, sino que janha joihi para joinichjá chojni jianha para que tsentoxinhi na de tti jehe na tenchehe na.

*Are joanchianguihi na Jesús ixin quedonda chojni jehe dinttecjaño na*

*(Mr. 2.18-22; Lc. 5.33-39)*

<sup>14</sup> Cottimeja chojni que vacao Juan, tti vancheguitte chojni, conchienne na ngain Jesús co ndačo na:

—¿Quedonda janha na, conixin cain xifariseo anto dinttecjaño na para ixin Dios, co chojni que ĥjiho jaha dinttecjaño na?

15 Jesús ndačho ngain na:

—¿Apoco cain chojni que tti ngain ná vandango tti tottehe na nchao sinttecjáño na si xinovio xa jí xa ngayehe na? Pero, ján, tsí tiempo que xinovio satsjixin xa de ngain na, cottimeja jehe na sinttecjáño na.

16 'Xonhi chojni tteyehe lontto naroa ngain ri-oho lontto nttaxí, ixin lontto naroa ndadixehe co ndattinchje lontto nttaxí, co tti diguichje icha tojie.

17 Ni cai xonhi chojni ttequia xan que jidatsoxinhi ngá ná roanxan nttaxí ixin xan mé anto daca tsonchintaon xan roanxan mé, co cayoi cosa mé ndasitján. Mexinxin xan que jidatsoxinhi siquia xan ngain ná roanxan naroa para que sitjanha cayoi cosa mé, ixin roanxan mé sichjehe co xan mé singoha xan. Jañá tti costumbre que jaha ra chonda ra jiha de acuerdo ngain tti janha rrindat-tjo ra.

*Are xingamehe xannchichjenhe Jairo conixin tti nchí que catte lonttoe Jesús*

*(Mr. 5.21-43; Lc. 8.40-56)*

18 Jesús xa jindačho cain palabra yá are joí ná xí que ttetonha ngain nihngo nttiha. Vettoxin nttajochjihi xa ngain Jesús co ndačho xa:

—Ná xannchichjanhna jaxon joexin ndavenhe xan. Pero si soixin sihi co tsín rá ngataha xan, jehe xan rrocjan rroxechon xan iná.

19 Jesús vingattjen co sajoicao xí mé conixin tti chojni que vacao. 20 Co are ongatja nttiha conchienhe ná nchí que ovechonda tteyó nano que veguenguihi ncha jni. Jimao conchienhe ncha toenixin Jesús co catte ncha ngandehe tti manta

que jitsá, <sup>21</sup> ixin jehe ncha xaxaon ncha: “Conixin jehorrocatte lonttoe Jesús, janha rroxingamana.”

<sup>22</sup> Pero Jesús ngaria co jehe vicon nchí mé, co ndačo ngain ncha:

—Xaonha, jaha oxingamaha ixin vitticaon.

Co desde ngain rato mé, nchí mé ondaxingamehe ncha.

<sup>23</sup> Co después are Jesús joiji ngain nchian-doha xí que vaquetonha ngain nihngo, Jesús vicon que onttiha te ximusico para sasicjavá na xannchichjan mé. Co icha chojni anto tetsjanga na. <sup>24</sup> Jesús ndačo ngain na:

—Dačhjexin cain ra de nttihi, ixin xannchichjan yá jeha ndadiguenhe xan, jehotajijoa xan.

Cain chojni nttiha cjoanoa na Jesús ixin jehe ndačo jañá. <sup>25</sup> Pero jehe coetonhe na que vačhjexin na de nttiha, cottimeja jehe joixinhi co tsehe rá xannchichjan mé, co jehe xan vingattjen xan. <sup>26</sup> Co ngoixin región mé anto daca conohe chojni de ixin tti milagro jian que joinchehe Jesús.

### *Jesús joinchexingamehe yó xí que vaguiconha*

<sup>27</sup> Are Jesús sacjoixin de nttiha, rroé yó xí que vaguiconha co vinttendačo xa sén:

—¡Ttiaconoana ni ra soixin, tti razé David co tti chonda joachaxin que vechonda rey David!

<sup>28</sup> Co are Jesús joixinhi nchian-doha, jehe cayoi tti vaguiconha mé vintteconchienne ngaca Jesús co jehe joanchianguihi cayoi xí mé:

—¿Aditticaon ra que janha nchao sinttažoán jmacon ra?

Cayoi xí mé ndačo xa:

—Ján ditticanho na que soixin nchao sincheñoanna ni ra.

<sup>29</sup> Cottimeja Jesús catte ngataha jmacon cayoi xí mé co ndačo:

—Tsonhe inchin jaha ra ditticaon ra.

<sup>30</sup> Co ngain rato mé ndaxingamehe jmacon cayoi xí mé. Cottimeja Jesús anto coetonhe xa co ndačo ngain xa:

—Xonhi chojni ttequinhi ra quehe conha ra.

<sup>31</sup> Pero are sacjoixin xa de nttiha, jehe xa coexinhi xa coequín xa chojni ngoixin región mé tti joinchehe Jesús.

### *Jesús joincheñoenhe ná tti čoha vanichja*

<sup>32</sup> Are cayoi xí mé tedačhjexin xa de nttiha, canxion chojni joiaohe na Jesús iná xí que čoha vanichja ixin vechonda ná espíritu jianha. <sup>33</sup> Are Jesús joantsje espíritu jianha mé, jehe tti xí mé coexinhi nichja. Cain chojni que vicon nttiha vinttegoan na admirado co ndačo na:

—Nttihi Israel xonhi tiempo vocon na ná cosa inchin jiji.

<sup>34</sup> Pero xifariseo vinttendačo xa:

—Xí jiji nchao dengui xa espíritu jianha de ixin joachaxín Satanás ixin Satanás tti ttetonhe cain espíritu jianha.

### *Jesús ttiacnoehe cain chojni*

<sup>35</sup> Jesús vacji ngain cain ningoe cain rajna nttiha co ngain ningoe cain rajnanchjan para vandache chojni de ixin Dios. Jehe vandačo tti jian joajna de ixin quežén ttetonha Dios, co vanchexingamehe cain chojni que vinttechonda quexeho chin. <sup>36</sup> Are Jesús vicon cain chojni jiji,

jehe coiaconoehe na ixin jehe na chonda na joachjaon co tedoan na desanimado inchin coleco que chondaha va tti ttingaria va. <sup>37</sup> Cottimeja jehe ndačo ngain tti chojni que vacao:

—Ján ndoa, que cosecha atto tsje pero ninchehe xa tsjeha na. <sup>38</sup> Mexinxin ndache ra Xinajni que rrorroanha Xa icha ninchehe xa para que satse na cain cosecha jiji.

## 10

*Jesús coinchiehe tti tteyó chojni que vacao*  
(Mr. 3.13-19; Lc. 6.12-16)

<sup>1</sup> Cottimeja Jesús vayé tti tteyó chojni que vacao co joanjo joachaxin ngain na de nchao sengui na espíritu jianha de ngain chojni, co de nchao sinchexingamehe na cain chojni que ninxin quexeho chin.

<sup>2</sup> Jihí nombré tti tteyó chojni que vacao Jesús: tti saho vinhi Simón, co cai vinhi Pedro; Andrés xanchó jehe Pedro; Jacobo conixin Juan xanchó jehe Jacobo, co cayoi nimé xenhe Zebedeo. <sup>3</sup> Co Felipe; Bartolomé; Tomás; Mateo, tti cobrador de impuesto; Jacobo, xitsihi Alfeo; Lebeo, que cai vinhi Tadeo; <sup>4</sup> Simón, jehe ná de tti partidoe chojni politico que vaquetocaho chojni romano; co Judas Iscariote, tti joindačo para tse na Jesús.

*Jesús rroanha chojni que vacao para joinichja na de ixin Dios*  
(Mr. 6.7-13; Lc. 9.1-6)

<sup>5</sup> Jesús coetonhe tti tteyó chojni jiji janhi:  
—Ttjiha ra ngain región tti te chojni que jeha judío, ni ttjiha ra ngain nonttehe Samaria. <sup>6</sup> Ttji ra

jeho ngain chojni judío ixin jehe na te na inchin coleco que diguiçhoe. <sup>7</sup> Ttji ra co dindache ra chojni mé que oconchiaon tiempo para que Dios tsetonha ngain ansén jehe na. <sup>8</sup> Nchexingamehe ra chojni nihi, nchexechon ra chojni que ondadiguenhe, nchexingamehe ra tti chojni que techonda chin lepra, co dehngui ra espíritu jianha de ngain chojni. Jaha ra vittonha ra joachaxin jihi, mexinxin are sinchegonda ra joachaxin jihi ncheha ra cobro.

<sup>9</sup> 'Ttjioha ra tomi; ni de oro ni de plata ni de cobre. <sup>10</sup> Ni ttjioha ra tti sintte ra ngatja nttiha. Co ttjioha ra icha lontto ni icha catte que jeho catte que jaha ra techjanga ra co jeho lontto que jaha ra tengaha ra, ni ttjioha ra nttacotto ixin jaha ra chonda ra derecho de sayehe ra tti sintte ra co cain icha que sondaha ra de ngain tti chojni que tsji ra.

<sup>11</sup> 'Are saso ra ngain ná rajna o ngain ná rajnanchjan, ttjé ra nttiha ná chojni jian para dittoha ra nttiha ngain nchiandoha chojni mé hasta que jaha ra satsjixin ra de ngain rajna mé. <sup>12</sup> Are saso ra ngain nchia mé chjehe ra na joajna co nchetsenhe ra ñao Dios que jehe sinchenciaon chojni mé. <sup>13</sup> Si chojni de nchia mé jian na, ján, Dios sinchenciaon na. Pero si jehe na jianha na, Dios sinttanchaon jaha ra en lugar de jehe na. <sup>14</sup> Co si ngain ná nchia rroçhoha na sayaha ra na ni sincheha na caso tti jaha ra rrondache ra na, jaha ra daçhjexin ra de ngain nchia mé o de ngain rajna mé co tontsjenga ra rottea ra para que sinttji cain jinche que teyá rottea ra nttiha. Jamé para ná señal ixin vitticaonha na jaha ra. <sup>15</sup> Janha rrindattjo ra seguro que are ngain tti nchanho

que are Dios sinchejuzguehe cain chojni, rajna mé icha soji castigo sayé que tti castigo que vayé chojni ngain Sodoma co Gomorra.

*Jesús ndache tti tteyó chojni ixin icha chojni feo sinchehe ngain na*

<sup>16</sup> ¡Tsjenxin ra! Janha rrorroanha jaha ra inchin coleco ngayehe condanixa. Dittoaxinha ra para sinttayaha ra na inchin conché dittoexinha va para denhe va. Pero dintteha ra čhintto; sino que dintte ra inchin conttoanajni. <sup>17</sup> Pero ttjiho ra cuidado ixin rrotse ra na co sinttachianha ra na ngain juzgado, co tsaxin ra na nttá ngaxinhi nihngo. <sup>18</sup> Co hasta tsjiho ra na ngain tsje xigob-ernador co ngain tsje rey de ixin causananxin janha. Co jamé jaha ra rrochonda ra oportunidad de rronichja ra ngain cain xí mé de ixin janha, co hasta rronichja ra ngain icha chojni que jaha judío. <sup>19</sup> Pero are rrotse ra na co tsjiho ra na ngain juzgado, jaha ra taha ra joachjaon de ixin quexén rrondačo ra nttiha, ni taha ra joachjaon de ixin quehe palabra sinchegonda ra, ixin are mé Dios rrorroanha palabra que jaha ra rronichja ra. <sup>20</sup> Ixin jaha jaha ra tti rronichja ra, sino que Espíritu Santo que rrorroanha Ndodá ra que ttjen ngajni, mé tti rronichja.

<sup>21</sup> 'Chojni sičo jie para ixin xanchó para nasoenxon na xan. Co sehe ndodaha que jehó ndo sičo ndo jie para nasenxon xenhe ndo. Co sehe chjan que rroningaconhe xan ndodé xan co janné xan co jehó xan sičo xan jie para nasenxon nindoha xan. <sup>22</sup> Cainxin chojni ngoixin mundo rroningaconha ra na ixin causananxin janha.

Pero quexeho ra x̄o sitticaon ni ra co sinchehe ra cain tti janha coetonha ra hasta are ndasenne ra, jaha ra rrochonda ra iná vida naroaxin ngain Dios. <sup>23</sup> Are chojni de ngain ná rajna feo sinchehe na nganji ra jaha ra sattjixin ra de nttiha co sattji ra ngain iná rajna. Janha rrindattjo ra seguro que ni x̄a tsjaha ra tsingaria ra ngain cainxin rajna de chojni Israel are janha, tti Xí que joixin de ngajni, orrocjan na sihi iná.

<sup>24</sup> 'Ni ná tti jitangui jeha icha nohe que ximaestro, co ni ná tti nchehe x̄a jeha icha ttetonha que xinajní. <sup>25</sup> Tti jitangui, čhoha tsangui icha que jeho tti nohe ximaestro, co tti nchehe x̄a čhoha icha tsetonha que jeho inchin ttetonha xinajní. Jañá si janha tti inchin ndodá ra de ngain nchia co ncheguini na na Beelzebú, que rročho Satanás, seguro jeha na rronichja na icha feo de ixin jaha ra.

*Quensen jiquininxin rroxagoen ni  
(Lc. 12.2-9)*

<sup>26</sup> 'Pero x̄agoenha ra ni ná chojni ixin anto daca tsononxin cain tti ndoa de ixin Dios co x̄onhi cosa jima que tsononxinha. <sup>27</sup> Cain tti rrindattjo ra, nchenohe ra tsje chojni, co cain tti rrindattjo ra jimao, jaha ra nchenohe ra icha tsje chojni inchin rrocani ra ná nchia co de nttiha rronichjaxin ra. <sup>28</sup> x̄agoenha ra tti chojni que natjayaxon ixin mé čhoha nasoenson almé ni. x̄agoenhe ra jeho Dios ixin jeho mé tti nchao nasoenson cuerpoe ni co almé ni ngain infierno.

<sup>29</sup> ¿Quejanhi rentte yó conttoachjan? ¡Anto tsjeha tomi! Pero masqui jamé ni ná de jeha va denha va si Ndodá ra que ttjen ngajni danjoha joachaxin.

<sup>30</sup> Co jehe Ndo nohe Ndo hasta quejanhi xajá ra chonda ra. <sup>31</sup> Mexinxin jaha ra xaoanha ra, ixin para Dios, jaha ra icha rentte ra que tsje conttoa.

*Tti chojni que ndačho ngattoxon con icha chojni ixin Jesús jian*

*(Lc. 12.8-9)*

<sup>32</sup> 'Cain chojni que rrondačho ngattoxon con icha chojni que ixin janha jian na, cai janha rrondačhjan ngattoxon con Nnodana que ttjen ngajni que ixin chojni mé jian cai. <sup>33</sup> Pero tti chojni que ndačho ngattoxon con icha chojni que ixin janha jeha jian na, cai janha rrondačhjan ngattoxon con Nnodana que ttjen ngajni que ixin chojni mé jeha jian cai.

*Causexin Jesús chojni rrochjeya*

*(Lc. 12.51-53; 14.26-27)*

<sup>34</sup> 'Xaxaonha ra que janha joihi ngataha nontte jihi para que cain chojni sinao chó ixin tsoenha jamé, sino que cainxin chojni rrochjeya na ixin janha joihi. <sup>35</sup> Ixin ttoha chojni sitticaon na janha co ttoha na nahi, mexinxin ná xanxí co ndodé xan tsoñaöhe chó na co xannčí co janné xan tsoñaöhe chó na, co nčhidainda co jannché nčha tsoñaöhe chó na. <sup>36</sup> Jańá cada chojni rroningaonhe na jeho nindoha na.

<sup>37</sup> 'Chojni que rinao ndodé o janné icha que janha, chojni mé jiquininxinha soan chojnina, co tti chojni que rinao nčhichjehe o xitsihi icha que janha, chojni mé jiquininxinha soan chojnina, <sup>38</sup> co tti chojni que tsinha en peligro vidé na para ixin janha, chojni mé jiquininxinha soan chojnina. <sup>39</sup> Tti icha rinao vidé, mé sinchetján vidé. Pero

tti sinchetján vidé de ixin causananxin janha, mé rrochonda iná vida naroaxin.

*Tti chojni que rroxenguehe hna*

*(Mr. 9.41)*

<sup>40</sup> Tti chojni que jian sayaha jaha ra, chojni mé cai sayehna na janha, co tti chojni que sayehna janha, chojni mé cai sayé na jehe tti rroanha na janha. <sup>41</sup> Co tti chojni que sayé ná profeta ixin profeta nichja joajna que dayé de ngain Dios, chojni mé Dios tsjenguehe hna inchin xenguehe hna ná profeta. Co tti sayé ná xí jian ixin xí mé jian xa, chojni mé Dios tsjenguehe hna xajeho inchin xenguehe hna ná chojni jian. <sup>42</sup> Co quexeho chojni que sanjo masqui ná vaso de jinda quin ngain quexeho chojni que ditticaon na janha jeho ixin ditticaon na janha, chojni mé Dios tsjenguehe hna cai.

## 11

*Tti chojni que Juan rroanha*

*(Lc. 7.18-35)*

<sup>1</sup> Are Jesús joexin ndache cain cosa jiji tti tteyó chojni que vacao, sacjoixin de ntthiha para join-dache icha chojni de ixin Dios ngain icha rajna que vintte ngain región mé.

<sup>2</sup> Juan, tti vancheguitte chojni, ovehe ngaxinhi cárcel tiempo mé pero jehe conohe cain tti jian que jinchehe Jesucristo. Cottimeja jehe rroanha yó chojni que vacao para joiganchianguihi na Jesús <sup>3</sup> ixin quensen jehe, co ndačo na ngain Jesús:

—¿Ajaha tti Cristo tti chonda que tsí, o xa rrochonda na que rrochoan na iná chojni?

<sup>4</sup> Jesús ndaĉho:

—Ttji ra co dindache ra Juan tti jaha ra tedicon ra jaxon co tti jaha ra tettinhi ra. <sup>5</sup> Diquequinhi ra Juan ixin tti chojni que vaguiconha, jai onchao dicon, co ixin tti ĉhoha vacji, jai onchao ĉhji, co ixin oxingamehe tti chojni que veninxin tti chin que dinhi lepra, co ixin tti chojni que vaquinha, jai onchao ttinhi, co ixin tti chojni que ondavenhe, jai oxechon, co ixin tti chojni que ĉa vaquinha de ixin Dios, jai janha ndattjan. <sup>6</sup> Ćo anto ĉhjoin para ixin tti chojni que chonda seguro nganji na janha.

<sup>7</sup> Are cayoi tti chojni mé sacjoi na, Jesús coexinhi ndache icha chojni que te nttiha de ixin Juan, tti vanheguitte chojni, co Jesús ndaĉho:

—Are cjo ra ngagaha jna tti ĉonhi chojni te para joitsjehe ra Juan, ĉquehe ĉaxaon ra rroguicon ra jehe? ĉAĉaxaon ra ixin joarrixaoen seguroha inchin nttaxiji que nchequingui ĉhintto, <sup>8</sup> o ani ná xí que jingá lontto anto fino inchin ná rey? ĉApoco chonxinha ra ixin tti chojni que jingá lontto anto fino, jehe na te na ngain nchia anto fino? <sup>9</sup> Mexinxin ĉquehe ĉaxaon ra rroguicon ra? ĉA ná profeté Dios? Ján ndoa que Juan ná profeté Dios, co jehe icha rentte que ná profeta. <sup>10</sup> Juan, mé tti rroĉho ngain tti jitaxin Palabré Dios:

Icha saho que jaha tsji, janha rrorroanha ná tti sicao joajnana  
para que jehe mé sinchechjian nttiha para ixin jaha.

<sup>11</sup> Janha seguro rrindattjo ra que de cainxin chojni que concjixin ngataha nontte jihi hasta jai, ngattoxon con Dios ĉonhi chojni icha importante

que jeho Juan. Pero masqui jamé, tti chojni que icha importanteha de ngain tti parte que ttetonha Dios de ngain ansén chojni, chojni mé řa icha importante que Juan.

<sup>12</sup> 'Desde que Juan joí para joidache chojni de ixin Dios hasta jai, atto tsje chojni rinao na rrocayacoen na tti ttetonha Dios que ttjen ngajni, co chojni řhintto rinao na sinchexante na tti ttetonha Dios. <sup>13</sup> Cain profeté Dios que joí co ley que vayé Moisés jinchenohe chojni de ixin queřén tsetonha Dios ngain ansén chojni hasta que joí Juan para joinchenohe chojni que ixin otoiń tsí tiempo mé. <sup>14</sup> Co si jaha ra rinao ra sitticaon ra, ján, Juan mé tti profeta Elías que chonda que joí iná. <sup>15</sup> řo tsinxin ra, ttinhi ra jian.

<sup>16</sup> '¿Quehe sinttacaninxin chojni de ngain tiempo jiji? Jehé na inchin tti xannchinnchinchjan que tsontaon ngataon ndásin co toyaotte xan icha xan-compañeroe xan: <sup>17</sup> "Janha na jointtachjian na són conixin ná nttaxo pero jaha ra tteha ra, mexinxin janha na tsje na canto que ttiaho joachjaon pero jaha ra tsjangaha ra." <sup>18</sup> Rročho ixin joí Juan, tti vanheguitte chojni, co jehé vaguiha vino ni vajineha tsje. Co jaha ra ndařho ra que ixin jehé chonda ná espíritu jianha. <sup>19</sup> Cottimeja joihi janha, tti Xí que joixin de ngajni, que jinecaho chojni co dihi vino. Co jaha ra ndařho ra que ixin janha anto jine co anto dihi hasta coan na, co ixin janha amigoe cain chojni que tenchehe jianha, co xicobrador de impuesto. Pero tti nchecoenhe Dios chojni, mé anto jian ixin tti jian mé řago ngain tti nchehe chojni que ditticaon ngain jehé.

*Rajna que vintteguitticaonha  
(Lc. 10.13-15)*

<sup>20</sup> Cottimeja Jesús coexinhi joinchesattehe chojni de cain rajna tti jehe joinchehe icha tsje milagro, ixin cain chojni mé ꝥa coentoxinha na vidé na de tti jianha que tenchehe na. Mexinxin Jesús ndaĉho ngain na:

<sup>21</sup> —¡Anto tangui tsonha jaha ra de ngain rajna Corazín, co cai jaha ra de ngain rajna Betsaida! Ixin tti cain milagro que janha jointtaha ngayaha ra, si cain milagro mé rroconhe ngayehe chojni de ngain ciudad de Tiro co ciudad de Sidón, cain chojni mé osé rroquentoxinhi na vidé na de tti jianha que vanchehe na. Co para rrocjago na que ixin jehe na orroquentoxinhi na vidé na, jehe na rroquinttengá na lontto ttie co rrocjintjtitte na nntesoguihi já na. <sup>22</sup> Pero jaxon janha rrindattjo ra que para ngain tti nchanho que Dios sinchejuzguehe cain chojni, jaha ra tti sayehe ra ná castigo icha soji que chojni ngain ciudad de Tiro co Sidón. <sup>23</sup> Co jaha ra de ngain rajna Capernaum, ꝥaꝥaxaon ra que ixin anto importante ra para ngain Dios? Jeha jamé ixin jaha ra chonda ra que tsji ra ngain infierno. Ixin tti cain milagro que janha jointtaha ngayaha ra, si mé rroconhe ngayehe chojni de ngain ciudad de Sodoma, cain chojni mé seguro rroquentoxinhi na vidé na co ciudad mé ꝥa rroaguehe hasta jai. <sup>24</sup> Pero janha rrindattjo ra que para ngain tti nchanho que Dios sinchejuzguehe cainxin chojni, jaha ra tti sayehe ra ná castigo icha soji que cain chojni de ngain regioen Sodoma.

*Are Jesús ndaĉho: “Sihi ra nganji co nchejogaha ra”*

*(Lc. 10.21-22)*

<sup>25</sup> Ngain rato mé Jesús ndaĉho:

—Padre soixin que joinchechjian ngajni co nontte, janha chjaha gracias soixin ixin soixin coema tti ndoa para ngain tti chojni que anto chonxin co anto sé coangui na, co cjoago tti ndoa mé ngain tti chojni que tsjeha chonxin. <sup>26</sup> Ján, Padre, ixin soixin jañá rinao.

<sup>27</sup> ’Ndodana que ttjen ngajni chjana Ndo cain cosa. Ķonhi chojni chonxin cainxin de ixin Xenhe Ndo, sino que jeho jehe Ndo nohe Ndo de ixin Xenhe Ndo. Co Ķonhi chojni chonxin cainxin de ixin jehe Ndo, sino que jeho Xenhe Ndo conixin cain tti chojni que jehe Xan sino Xan sinchenohe Xan de ixin jehe Ndo. <sup>28</sup> Ķacoi ra nganji na, cain jaha ra Ķo atto conĉhjen ra de ngain Ķa co de joachjaon que techonda ra, co nganji na janha sinchejogaha ra. <sup>29</sup> Dittoaxin ra ditticaon ra nchehe ra tti janha rritetonha ra co tangui ra cain tti janha rrintacoanha ra, ixin janha jeha ĉhintto na, co anto nda ansenna, co jamé nchao sinchejogaha almá ra. <sup>30</sup> Tti janha rritetonha ra tanguiha para jaha ra sitticaon ra sinchehe ra.

## 12

*Chojni que vacao Jesús conĉhinji na trigo ngain nchanho que nchejogaha ni*

*(Mr. 2.23-28; Lc. 6.1-5)*

<sup>1</sup> Ngain tiempo mé ngain ná nchanho que nchejogaha ni, Jesús conixin tti chojni que vacao vatto na ngain canxion jngui que dinga trigo. Co

chojni mé venhe na jintta, mexinxin coexinhi na conchinji na canxion ninchjenhe trigo para joine na. <sup>2</sup> Co canxion xifariseo vintteguicon xa mé, co vinttendačo xa ngain Jesús:

—Tsjenxin, chojni que čhjiho tenchehe na řa co jiquininxinha sinchehe ni řa ngain tti nchanho que nchejogaha ni.

<sup>3</sup> Pero Jesús ndačo ngain xa:

—¿Ařa tsjeha ra tti jitaxin ngain Palabré Dios ixin quehe joinchehe David conixin cain xicompañeroe ná nchanho are vintteguenhe na jintta?

<sup>4</sup> David conixin cain xicompañeroe mé joixinhi na tti nihngo icha importante co joine na tti niottja que jiquininxinha para rrojine na jehe na, sino que jeha xidána vequininxin vane xa niottja mé.

<sup>5</sup> ¿O ani řa tsjeha ra tti jitaxin ley que vayé Moisés que ixin cain xidána de ngain nihngo icha importante řonhi tiempo nchejogaha xa ngain tti nchanho que nchejogaha ni, co mé jeha ná cosa jianha para ixin jehe xa? <sup>6</sup> Co janha rrindattjo ra que jí nganji ra jaxon ná tti icha importante que nihngo mé. <sup>7</sup> Jaha ra řa coinxinha ra tti ndačo Dios ngain tti jitaxin Palabré que ndačo:

“Janha rinaho que jaha ra tsiaconoehe ra chojni, co nahi ixin sonhe ra coxigo para tsín ra para ixin janha.” Si jaha ra orroquinxin ra mé irronichjaha ra jianha de ixin chojni que ncheha ni ná cosa jianha. <sup>8</sup> Janha, tti Xí que joixin de ngajni, cai chonda joachaxin para tti nchanho que nchejogaha ni.

*Ná xí que ndadixemadoho ná rá  
(Mr. 3.1-6; Lc. 6.6-11)*

<sup>9</sup> Cottimeja Jesús sacjoixin de nttiha, co sajoixinhi iná nihngo. <sup>10</sup> Co ngaxinhi nttiha tají ná xí que ndadixemadoho ná ra, co xifariseo techonhe xa quehe cosa nchaoha rrojinchehe Jesús para rrocjanguihi xa. Mexinxin joanchiangui xa ngain co ndačo xa:

—¿Ají joachaxin para que sinchexingamehe ni chojni nihi mero ngain tti nchanho que nchejogaha ni?

<sup>11</sup> Jesús ndačo:

—Si ná de jaha ra chonda ra ná coleco, co si setsingá va ná pozo ngain tti nchanho que nchejogaha ni, ¿atsjiha ra para sigantsjea ra va? ¡Seguro que ján! <sup>12</sup> Nchao, janché ndachjenji ni ra, ¿ajeha anto icha rentte ná chojni que ná coleco? Mexinxin jeha jianha para que jehe ni sinchehe ni ná cosa jian ngain tti nchanho que nchejogaha ni.

<sup>13</sup> Cottimeja ndačo Jesús ngain tti xí que dixemadoho rá:

—Ttinxe rá.

Co are jehe coinxe rá, ojian vittohe ra inchin ra jngo. <sup>14</sup> Cottimeja xifariseo mé vinttegačhjexin xa de nttiha co coexinhi xa cjoao chó xa ixin quežén sinchehe xa para nasoenxon xa Jesús.

### *Tti dindačo profeta Isaías de ixin Jesús*

<sup>15</sup> Are Jesús conohe cain mé, jehe sacjoixin de nttiha co anto tsje chojni rroé na Jesús. Co jehe joinchexingamehe cainxin chojni nihi que vetan.

<sup>16</sup> Co jehe vaquetonhe na que rrondacheha na icha chojni ixin quensen jehe. <sup>17</sup> Jamé, para que joiconhe tti dicjin profeta Isaías que ndačo:

<sup>18</sup> Yá chonda ra tti nchehe žana, tti janha coinchiá,

titi janha anto rinaho, co de ixin jehe, janha anto chahna.

Co sanjo Espíritu Santo ngain jehe, co jehe tti rrondache cain chojni de cainxin nación quehe jiquininxin sinchehe na.

<sup>19</sup> Jehe xonhi chojni tsetocaho, ni tsoyaotteha chojni,

ni jehe rronichjaha soji ngain chojni ngá nttiha.

<sup>20</sup> Jehe sincheanimá tti chojni que anto tangui tonhe na

co jion sinchecoenhe chojni que ditticaon nchion, hasta que cainxin chojni sinchehe na jian inchin jehe tsetonha.

<sup>21</sup> Co cainxin nación satsoan que ixin jehe tti ttjen-guijna chojni.

*Are ndačo chojni ixin Jesús chonda joachaxín Satanás*

*(Mr. 3.19-30; Lc. 11.14-23; 12.10)*

<sup>22</sup> Cottimeja joicaöhe na Jesús ná xí que čhoha vaguicon ni vanichja ixin vechonda xa ná espíritu jianha. Co Jesús joinchexingamehe xí mé para que jehe xa onchao vicon xa co onchao nichja xa.

<sup>23</sup> Cainxin chojni goan na admirado ngain rato mé, co vinttendačo na:

—Puede jiji tti razé David que rrochonda xajeho joachaxin que vechonda rey David.

<sup>24</sup> Pero are xifariseo vinttequinhi xa jiji, vinttendačo xa:

—Xí jiji dengui xa espíritu jianha pero de ixin joachaxín Satanás, tti rey de cain espíritu mé co tti dinhi Beelzebú cai.

<sup>25</sup> Jesús oconohe quehe tendačo xifariseo mé, mexinxin jehe ndačo ngain xa:

—Si chojni ngain ná nación chjea na para tte-  
tocaho chó na, nación mé tsončhjenha sé, co si ná  
rajna o ná nindoha anto tteto na, cai tsončhjenha  
chojni mé sé. <sup>26</sup> Jamé cai si Satanás dengui chó  
jeho, rročo que jeho ttetocaho chó co joachaxín  
tsončhjenha sé, toin ndatsjexin. <sup>27</sup> Mexinxin,  
si inchin ndačo ra jaha ra que janha dehngui  
espíritu jianha de ixin joachaxín Satanás, si jamé  
¿quensen danjo joachaxin ngain chojnia ra para  
que jehe na dengui na espíritu jianha? Mexinxin  
jeho chojnia ra tjago que jaha ra jeha ndoa tti jaha  
ra řaxaon ra. <sup>28</sup> Pero janha dehngui espíritu jianha  
de ixin joachaxín Espíritu Santo de Dios, co mé  
rročo que tti ttetonha Dios ojí nganji ra.

<sup>29</sup> 'Ixin si ná chojni rinao santsjehe cosé iná xí  
tsanga de ngaxinhi nchiandoha xa, saho chonda  
que tsia xa.

<sup>30</sup> 'Tti chojni que ncheřoxinha tti janha rrint-  
taha, chojni mé ningaonna janha, co tti čhjiha  
nganji na janha para ttjejo na chojni, mé icha  
tonchjequé na.

<sup>31</sup> 'Mexinxin janha rrindattjo ra que cain chojni  
nchao sitjañehe na cain tti jianha que nchehe na co  
cain tti jianha que nichja na, pero si rronichja na  
jianha de ixin Espíritu Santo, Dios sinchetjañeha  
na palabra mé. <sup>32</sup> Co quexeho tti rronichja palabra  
jianha de ixin janha, tti Xí que joixin de ngajni,  
nchao sitjañehe chojni mé, pero tti chojni que  
rronichja palabra jianha de ixin Espíritu Santo,  
Dios řonhi tiempo sinchetjañehe chojni mé, ni  
jaxon ni después que jehe ndasenhe.

*Nttattochjoin datsoan ni ntta de ixin ttochjoín ntta*

*(Lc. 6.43-45)*

<sup>33</sup> 'Si nttattochjoin jian ntta, cai ttochjoin que nchechjian ntta jian tto; co tti nttá xonhi xé, cai ttochjoin que nchechjian ntta xonhi xé tto. Mexinxin cada nttattochjoin datsoan ni ntta de ixin ttochjoín ntta. <sup>34</sup> ¡Jaha ra inchin xenhe conché! ¿Quexén nchao rronichja ra cosa jian si jaha ra jianha ra? Rroha ni nichja cain tti jí ngain ansén ni. <sup>35</sup> Ná chojni jian jehe nichja cosa jian ixin tti jian jí ngain ansén; co ná chojni jianha jehe nichja cosa jianha ixin tti jianha mé jí ngain ansén. <sup>36</sup> Co janha rrindattjo ra que are ngain tti nchanho que Dios sinchejuzguehe cainxin chojni, are mé cainxin na chonda que tsjenga na hna de ixin cain palabra que xonhi xé ndačo na. <sup>37</sup> Ixin inchin rronichja jaha, jamé Dios sinchejuzgá nganji. Co are mé tsonoha si ján rrica o ni xonhi rrica.

*Are chojni jianha joanchia na ná milagro*

*(Mr. 8.12; Lc. 11.29-32)*

<sup>38</sup> Cottimeja canxion xifariseo co canxion xi-maestroe ley Israel vinttendačo xa ngain Jesús:

—Maestro, janha na rinaho na sicon na que jaha sinchehe ná milagro.

<sup>39</sup> Jesús ndačo ngain xa:

—Chojni jianha que ditticaonha na Dios rinao na sicon na ná milagro, pero chojni mé Dios tsjagoeha na icha milagro que jeho inchin tti conhe profeta Jonás. <sup>40</sup> Ixin jamé inchin Jonás vehe ní nchanho co ní ttie ngaxinhi tsehe copescado jie, jamé janha cai, tti Xí que joixin de nganji, sarihi ngadoho nontte ní nchanho co ní ttie.

<sup>41</sup> Cain chojni que vintte ngain ciudad de Nínive, jehe na singattjen na ngain tti nchanho are Dios sinchejuzguehe cainxin chojni para rrocho na jie para ixin cain chojni de ngain tiempo jihi, ixin jehe na coentoxinhi na vidé na are Jonás join-dache na joajné Dios. Co nttihi nganji ra jaxon jí ná tti icha importante que Jonás, pero jaha ra čoha ra ditticaon ra. <sup>42</sup> Cai tti reina que joixin de ngain nontte Sabá icha sur, singattjen ngain tti nchanho are Dios sinchejuzguehe cainxin chojni de ngain tiempo jihi para que reina mé rrocho jie para ixin jehe na ixin jehe reina mé joixin anto cjin para joiquinhi tti venohe Salomón, co nttihi nganji ra jaxon jí ná tti icha importante que Salomón.

*Tti espíritu jianha que cjan*  
(Lc. 11.24-26)

<sup>43</sup> Co Jesús ndačo cai:

—Are ná espíritu jianha dačhjexin de ngain cuerpoe ná chojni, espíritu mé sattji ngain tsje lugar xema para dicjé ttinó sinchejogaha, co are jehe idittjaha lugar mé, jehe řaxaon: <sup>44</sup> “Janha rrocjan na ngain nchiania tti vačhjexin.” Co are jehe espíritu jianha mé cjan, dittja ngain cuerpoe chojni mé inchin ná nchia que řonhi chojni te, tti diganjo na jian, co cain roa ngaxinhi nchia mé. <sup>45</sup> Cottimeja jehe espíritu jianha mé dirroé iyáto espíritu icha jianha que jehe para que dintte cain espíritu mé ngaxinhi cuerpoe chojni mé, co chojni mé cjan icha tanguí tonhe que are saho. Co jamé tsonhe ngain chojni jianha tehe cai.

*Janné Jesús co xanchó*  
(Mr. 3.31-35; Lc. 8.19-21)

<sup>46</sup> Jesús ꝥa jinichja cain yá ngain chojni are joí janné conixin xanchó Jesús ixin joinao na rronichjé na Jesús, pero ndoja tavintte na ixin tsje chojni sinxinhi nchia tti jí Jesús. <sup>47</sup> Ná chojni ndačo ngain Jesús:

—Janná co xanchó ndoja nttihi te na co rinao na rronichja na nganji.

<sup>48</sup> Pero Jesús ndačo ngain chojni mé:

—¿Quensen jannana, co quecá xanchian?

<sup>49</sup> Cottimeja jehe cjoago ngain chojni que vacao co ndačo:

—Chojni tehe tti inchin jannana co jehe na tti inchin xanchian, <sup>50</sup> ixin quexeho chojni que nchehe inchin rinao Ndodana que ttjen ngajni, chojni mé tti xanchian co chojni mé tti jannana.

## 13

### *Ejemploe tti joiquenga trigo ngataon jngui (Mr. 4.1-9; Lc. 8.4-8)*

<sup>1</sup> Ngain nchanho mé Jesús vačhjexin de nchia mé co sacjoi para ngandehe lago. <sup>2</sup> Pero anto daca ꝥatte anto tsje chojni ngain jehe, mexinxin jehe coani ná barco para ngataonhe jinda mé co de nttiha ndachexin cain chojni mé de ixin Dios. Cain jehe na tavintte na ngandehe jinda mé. <sup>3</sup> Ngain rato mé jehe joinchegonda tsje ejemplo para joinchecoenhe na tsje cosa. Saho jehe ndačo:

—Ná xí cjoi xa joiquenga xa trigo ngataon jngui. <sup>4</sup> Co are coexinhi xa cjoa xa trigo ngataon jngui, canxion noanchjan de trigo vinttji ngá nttiha, co joí conttoa ndajoine va trigo mé. <sup>5</sup> Co icha noanchjan de trigo vinttji ngataha tti jí ttjao

tti ttinha jinche jí, co trigo mé anto daca činhi ixin tsjeha jinche xanotaon. <sup>6</sup> Pero are činhi nchanho, ndaxehntte catrigo mé, co ixin xonhi noehe ca vechonda ca, anto daca ndaxema ca. <sup>7</sup> Co icha noanchjan de trigo vinttji ngacjan canchaha, co canchaha mé icha daca vangui ca co coanchjandaha ca trigo para vangui. <sup>8</sup> Pero icha noanchjan de trigo vinttji tti jí jian jinche, co mé joanjo jian cosecha. Canxion nihi trigo mé joanjo de cien noanchjan cada trigo, icanxin trigo joanjo de sesenta noanchjan, co icanxin trigo joanjo de treinta noanchjan, cada trigo. <sup>9</sup> Si jaha ra ttinxin ra, ttinhi ra jian.

*Quedonda Jesús joinchegonda tsje ejemplo  
(Mr. 4.10-12; Lc. 8.9-10)*

<sup>10</sup> Cottimeja tti chojni que vacao Jesús conchienne na ngain co ndačo na:

—¿Quedonda ndache chojni conixin ejemplo?

<sup>11</sup> Jesús ndačo ngain na:

—Jaha ra Dios ndačo para que tsonoha ra quexen ttetonha jehe ngain ansén chojni, pero jehe na čoha tsonohe na. <sup>12</sup> Tti ttinxin, Dios sinchequinxin icha para que jehe icha tsinxin; pero tti xonhi ttinxin, Dios santsjehe hasta tti nchion que jehe ttinxin. <sup>13</sup> Mexinxin janha ndatjan na de ixin ejemplo ixin jehe na dicon na pero inchin rroguiconha na, co jehe na ttinhi na pero inchin rroquina na ixin ttinxinha na tti jehe na ttinhi na. <sup>14</sup> Jañá tti jehe na tenchehe na yá joiconhe tti dindačo Dios ngain profeta Isaías are Isaías dicjin:

Jaha ra seguro tsinhi ra, pero tsinxinha ra;

sicon ra, pero satsoanha ra.

<sup>15</sup> Ixin ansean ra atto ndaconcha,  
co ndatsjoan ra ttjenguijnaha ra para daca tsinxin  
ra,

co masqui tonoha ra que jmacon ra teṅangué,  
pero ttejé,

para que rrochonxinha ra tti jaha ra dicon ra,

ni tsinxinha ra tti jaha ra ttinhi ra,

ni ansean ra tsinxinha,

ni rroṅaxaonha ra sihi ra nganji na janha para que  
janha tsjenguijna ra.

<sup>16</sup> Cottimeja Jesús cjan ndaḅho ngain chojni que  
vacao:

—Pero janha ndaḅhjan que anto ḅhjoin para  
ixin jaha ra ixin chonxin ra tti dicon ra, co ttinxin  
ra tti ttinhi ra de ngain ndatsjoan ra. <sup>17</sup> Janha se-  
guro rrindattjo ra que are icha saho tsje profeta co  
tsje chojni jian de ngain ansén joinao na rroguicon  
na cain tti jaha ra tedicon ra jaxon, pero jehe na  
iviconha na. Co cai joinao na rroquinhi na cain tti  
jaha ra tettinhi ra jaxon, pero jehe na icoinha na.

*Jesús ndaḅho quehe rroḅho ejemploe tti  
joiquenga trigo*

*(Mr. 4.13-20; Lc. 8.11-15)*

<sup>18</sup> 'Ttinhi ra quehe rroḅho ejemploe tti  
joiquenga trigo ngataon jngui. <sup>19</sup> Tti chojni que  
ttinhi tti joajna de ixin queṅén siquetonha Dios  
ngain ansén na, co jehe na ttinxinha na joajna  
mé, chojni mé inchin tti trigo que vinttji ngá  
nttiha. Co ttí inchínji co jehe ndanchetjanji na  
joajné Dios que vittohe ngain ansén na. <sup>20</sup> Co tti  
trigo que vinttji ngataha tti jí ttjao, mé rroḅho tti  
chojni que ttinhi joajné Dios co jehe na anto ḅhjoin

tonohe na dayé na joajna mé. <sup>21</sup> Pero inchin trigo mé chondaha tsje noehe seha tončhenhe trigo, jamé jehe chojni mé cai are tangui tonhe na co icha chojni feo nchehe ngain na ixin ditticaon na joajné Dios, cottimeja jehe na ndadoan na desanimado. <sup>22</sup> Co tti trigo que vinttji ngacjan canchaha, mé rročo tti chojni que ttinhi joajné Dios, pero jehe na icha řaxaon na cain cosa que jí ngataha nontte jiji co tomi, mé tti ncheyehe na, co cain mé tti ndanchetjañehe na joajné Dios co incheha na inchin ttetonha joajna jiji. <sup>23</sup> Pero tti trigo que vinttji ngain tti jian jinche, mé rročo tti chojni que ttinhi joajné Dios co ttinxin na, co jehe na inchin tti trigo que anto tsje noa joinchechjian. Canxion jehe na inchin tti trigo que joinchechjian cien noa ngain nacoa ninchjan, co icanxin na inchin tti trigo que joinchechjian sesenta co de treinta noa ngain nacoa ninchjan.

### *Ejemploe ca řonhi řé ngagaha trigo*

<sup>24</sup> Cottimeja Jesús ndačo ngain na iná ejemplo jiji:

—Rrondattjo ra queřén ttetonha Dios que ttjen ngajni. Mé inchin ná xí que coenga jian trigo ngain jnguihi. <sup>25</sup> Pero ttie are cain chojni tatejoa na, cjoí ná chojni nttiha que ningaconhe jehe tti jnguihi mé co coenga anto tsje tsehe ca que řonhi řé ngain jngui mé, co sacjoi. <sup>26</sup> Are trigo mé vangui, ocoexinhi joinchechjian ninchjan, hasta are mé conoxin quehe clase de ca jí nttiha. <sup>27</sup> Cottimeja ninchehe řé tti jnguihi mé cjoí na joindačo na ngain: “Si tti trigo que soixin coenga ngataon jngui cjoí joxon trigo jian, řquettinó joixin ca jiji que

xonhi xé?” <sup>28</sup> Tti jnguihi mé ndačo ngain na: “chonja chojni que ningaonna joinchehe jihi.” Cottimeja ninchehe xa joanchiangui na co ndačo na: “¿Arinao tsji na janha na sigantsjengui na cain ca mé?” <sup>29</sup> Pero tti jnguihi ndačo ngain na: “Nahi, ixin are santsjengui ra ca mé, santsjengui ra trigo cai. <sup>30</sup> Icha jian tančhanda ra ca sanguicaho ca trigo hasta are cosecha, cottimeja janha rror-roanha ninchehe xana para que saho santsjegaha na ca yá, co tsia na ca para rroche ca, cottimeja tsenchjinha na joxon trigo ngain nchiania.”

*Ejemploe ná tsé que dinhi mostaza*

*(Mr. 4.30-32; Lc. 13.18-19)*

<sup>31</sup> Cai ndačo Jesús ngain na ejemplo jihi:

—Tti ttetonha Dios ngain ansén chojni, mé inchin ná tsé de ca que dinhi mostaza que ná xí ttenga ngataon jnguihi xa. <sup>32</sup> Tsé mé anto icha nchinnchin tse que cainxin tsehe icha ca; pero qué tsé mé anto dangui ca hasta icha jie diji ca que cain icha ca. Co dangui ca inchin ná nttá jie que hasta conttoa nchechjian va caqué va ngagaha ramé ca mé.

*Ejemploe levadura*

*(Lc. 13.20-21)*

<sup>33</sup> Cai ndačo Jesús ngain na ejemplo jihi:

—Tti ttetonha Dios ngain ansén chojni, mé inchin levadura que ná chojni ttinttjecjan ngain hariné niottja para que nchegangui nchoho.

*Quexén vanchegonda Jesús cain ejemplo*

*(Mr. 4.33-34)*

<sup>34</sup> Jesús ndačo cain jihi ngain chojni de ixin ejemplo, co si jeha de ixin ejemplo, jehé xonhi

vandačo ngain na. <sup>35</sup> Jañá conhe para joiconhe tti dindačo Dios ngain profeta are jehe dicjin janhi:

Janha rronichja de ixin ejemplo;  
janha rrondačhjan cosa que vinttema desde que are nontte conchjian nontte.

*Jesús ndačo quehe rročo ejemploe tti ca que činhi ngagaha trigo*

<sup>36</sup> Jesús joanjo joajna ngain cain chojni mé, cottimeja jehe conixin chojni que vacao sacjan na para ngain tti nchia que vinte na are mé. Are ongain nchia mé cain chojni que vacao conchienne na co ndačo na ngain:

—Ndanchenji ni ra quehe rročo ejemploe tti ca que činhi ngagaha trigo ngataon jngui.

<sup>37</sup> Cottimeja Jesús ndačo:

—Tti ttenga jian trigo, mé janha, tti Xí que joixin de ngajni. <sup>38</sup> Co jngui rročo mundo jihi. Co tti jian trigo, mé rročo tti cain chojni que chonda parte ngain tti ttetonha Dios, co tti ca que činhi ngagaha trigo, mé rročo tti cain chojni que nchehe inchin ttetonha inchínji. <sup>39</sup> Co tti coenga ca, mé tti ningaonna, co mé rročo mero inchínji. Co cosecha rročo are ondatsjexin mundo. Co tti satse cosecha jihi, mé cain ángel de Dios. <sup>40</sup> Jamé inchin ca que činhi ngagaha trigo žatse ca para che ca ngacjan žohi, cai jamé tsonhe chojni inchínji are ondatsjexin mundo jihi. <sup>41</sup> Janha, tti Xí que joixin de ngajni, rrorroanha tsje ángel para sigantsjeyexin de ngain chojni que ditticaon na janha tti cain chojni que ncheyehe

icha chojni para nchehe na jianha, co cain chojni que nchehe jianha, <sup>42</sup> para siguinttjiate na ngacjan xohi. Nttiha tti rrotsjanga na co sine-taon neno na. <sup>43</sup> Cottimeja cain tti chojni que nchehe inchin rinao Dios, chojni mé tsonguixima na inchin nchanho ngain lugar tti ttetonha Ndodá na que ttjen ngajni. ¡Si jaha ra ttinxin ra, ttinhi ra jian!

*Ejemploe tti tesoro que jiřavá*

<sup>44</sup> Jesús ndařho iná ejemplo jiji:

—Tti ttetonha Dios ngain ansén chojni, mé inchin ná tesoro que jiřavá ngataon ná jngui. Are ná xí dittja xa tesoro mé, cjan xa tjavá xa nttiha iná. Cottimeja anto ché xa sacjan xa nchiandoha xa, nhecji xa cainxin cosa que chonda xa co ttehna xa jehe tti nontte que jiřavá tesoro mé.

*Ejemploe tti perla que anto rentte*

<sup>45</sup> Co cai tti ttetonha Dios ngain ansén chojni, mé inchin tti perla que anto rentte. Co xitachji perla, <sup>46</sup> are dittja xa perla mé, jehe xa ttji xa co nhecji xa cainxin cosa que chonda xa para ttenanxin xa perla mé.

*Ejemploe ná nonchaha*

<sup>47</sup> Co cai tti ttetonha Dios ngain ansén chojni, mé inchin ná nonchaha que tja na ngangui jinda co tse cain clase de copescado. <sup>48</sup> Are ondacaon nonchaha mé de copescado, xitse va dantsjengui xa nonchaha mé hasta tti ngandehe jinda. Co nttiha ttinchiehe xa cain copescado; tti copescado jian ttenga xa va ngain ntařa co copescado que řonhi řé jehe xa ttinttji xa va. <sup>49</sup> Jamé tsonhe

are ondatsjexin mundo jiji; tsí tsje ángel de Dios para santsjenda cain chojni que nchehe jianha de ngayehe chojni que nchehe jian. <sup>50</sup> Co ángel mé rrorroanha cain chojni que nchehe jianha para ngacjan xóhi, nttiha tti jehe na rrotsjanga na co sinetaon neno na.

*Tti tesoro naroaxin co tti tesoro onttaxí*

<sup>51</sup> Cottimeja Jesús joanchiangui ngain chojni que vacao, co ndačo:

—¿Attinxin jaha ra cain jiji?

Jehe na vinttendačo na:

—Ján.

<sup>52</sup> Cottimeja Jesús ndačo:

—Mexinxin cain jiji rročo que are ná ximaestroey ley Israel ditticaon xa tti janha ndačhjan, jehe xa inchin ná chojni que diquenchjinha yó tesoro ngaxinhi nchiandoha co jehe nchao dantsje tesoro naroaxin co tesoro nttaxí. Ixin ximaestroey ley mé nchao nchecoehenhe xa chojni quehe tte-tonha ley mé co jai cai nchao ndache xa chojni tti ndačhjan janha. Mexinxin rročo que chonda xa yó tesoro, tti nttaxí co tti naroaxin.

*Jesús ngain Nazaret*

*(Mr. 6.1-6; Lc. 4.16-30)*

<sup>53</sup> Are Jesús joexin ndačo cain ejemplo jiji, jehe sacjoixin de nttiha. <sup>54</sup> Co sacjoi para Nazaret, tti jehe vanguixin. Nttiha coexinhi joinchecoehenhe chojni de ixin Dios ngain ningoe na, co cain chojni nttiha vagoan na admirado co ndačo na:

—¿Quexén coanguixin xí jiji? Ixin anto nohe xa jai. ¿Quexén nchao nchehe xa cain milagro jiji? <sup>55</sup> Ixin xí jiji xitsihi tti carpintero co janné

xa María, co xanchó xa Jacobo, co José, co Simón, co Judas. <sup>56</sup> Co cai xanchó xa xannchí nttihi te xan ngain rajná na jihi. ¿Queñén coanguixin xa cain tti nohe xa yá?

<sup>57</sup> Mexinxin jehe na čhoha na joinchehe na caso tti ndačo Jesús. Pero Jesús ndačo ngain na:

—Cain chojni nchesayehe na ná profeta pero nahi profeta que ttixin de ngain řajeho rajné na o profeta que ttixin de ngain řajeho nindoha na.

<sup>58</sup> Co tsjeha milagro joinchehe Jesús nttiha ixin chojni nttiha vitticaonha na Jesús.

## 14

*Queñén ndavenhe Juan, tti vancheguitte chojni  
(Mr. 6.14-29; Lc. 9.7-9)*

<sup>1</sup> Ngain tiempo mé Herodes, tti vehe gobernador nttiha Galilea, jehe cai conohe tti vanchehe Jesús.

<sup>2</sup> Co jehe mé ndačo ngain chojni:

—Jehe xí yá, mé Juan, tti vancheguitte chojni, que xechon. Mexinxin chondaxin joachaxin de nchehe milagro yá.

<sup>3</sup> Ixin Herodes tti coetonhe xisoldadoe para tse xa Juan co coia xa co joiquixinhi xa ngain cárcel. Herodes joinchehe jañá ixin causexin ná nchí que vinhi Herodías tti cjoí nchichihi ná xichó jehe Herodes que vinhi Felipe. <sup>4</sup> Juan vandačo ngain Herodes:

—Jianha ixin rricoho nchí yá.

<sup>5</sup> Herodes desde are mé joinao narrogoenxon Juan, pero vařaoncoa ngain chojni ixin cainxin na vaguitticaon na que Juan vanichja joajné Dios que jehe vagayé. <sup>6</sup> Pero are quié Herodes, ná

nñhichjehe jehe Herodías joí ncha co tte ncha són ngattoxon con cain chojni que te ngain Herodes rato mé. Co Herodes anto joincheꝑoxinhi queꝑén tte xannchí mé, <sup>7</sup> hasta que joinchejurá Herodes que jehe sanjo ngain xan quexeho ná cosa que jehe xan sanchia xan ngain jehe. <sup>8</sup> Co jehe xan ocoá xan consejo de ngain janné xan, mexinxin ndačo xan ngain Herodes:

—Chjana ngá na láto já Juan, tti ncheguitte chojni.

<sup>9</sup> Co rey Herodes are coinhi jihi, jehe anto vechín, pero ixin jehe ondačo que seguro sanjo quexeho cosa que jehe xannchí mé sanchia xan, co ixin coinhi cain chojni que tate ngain Herodes rato mé, mexinxin jehe coetonha que sayé xannchí mé tti jehe xan joanchia xan. <sup>10</sup> Herodes coetonha para joicončhinjhi na já Juan ngain cárcel. <sup>11</sup> Cottimeja joiaho na já Juan ngá ná láto, joanjo na ngain xannchí mé, co jehe xan joanjo xan ngain janné xan.

<sup>12</sup> Cottimeja vinttequí chojni que vacao Juan para sajoicao na cuerpoe Juan co joicjavá na. Cottimeja cjoí na para joinchenohe na Jesús.

*Are Jesús joanjo joine naho mil xí  
(Mr. 6.30-44; Lc. 9.10-17; Jn. 6.1-14)*

<sup>13</sup> Are Jesus conohe yá, jehe coani ná barco co sacjoi jehó ngain ná lugar tti ꝑonhi chojni te. Pero chojni vicon na para ttinó sacjoi, co tsje chojni de ngain rajna nttiha rroé na conixin rotté na.

<sup>14</sup> Mexinxin are Jesús joiji nttiha co vačhjexin de barco mé, vicon anto tsje chojni sinchonhe nttiha, co jehe coiaconoehé na co joinchexingamehe cain

chojni nihi que joicao na. <sup>15</sup> Co ixin ocoexinhi conaxin xehe, chojni que vacao Jesús conchienne na co ndaço na ngain jehe:

—Otsocjin co xonhi nchia jí ngain lugar jiji. Ndache cain chojni que onchao, para que jehe na sasinttecji na ngain rajna para siquehna na tti sine na.

<sup>16</sup> Jesús ndaço:

—Chondaha na que sasinttecji na; danjo ra jaha ra tti sine na.

<sup>17</sup> Jehe na ndaço na:

—Janha na nttihi xonhi chonda na, jeho naho niottja co yó copescado.

<sup>18</sup> Jesús ndaço:

—Sicohna ra cain yá nttihi.

<sup>19</sup> Cottimeja jehe coetonhe cainxin chojni para tavintte na ngataha ca ngataha nontte. Cottimeja jehe coá tti naho niottja ngá rá co tti yó copescado co tsjehe para ngajni, joanjo gracias ngain Dios co váña niottja mé co joanjo nio ngain chojni que jehe vacao para que jehe na conchjea na nio ngain cainxin chojni mé. <sup>20</sup> Cainxin chojni mé joine na, co cojehe na jian, co después xa joinchecaon na tteyó ntaña de pedazo que xexin joine na. <sup>21</sup> Tti chojni que joine niottja mé cjoí inchin naho mil xí, aparte nchí co icha xannchinnchinchjan.

*Jesús cjoixin rotté ngataonhe jinda*

*(Mr. 6.45-52; Jn. 6.16-21)*

<sup>22</sup> Cottimeja Jesús coetonhe tti chojni que vacao para coani na barco co satto na toenxin jinda mé icha saho que jehe ixin jehe xa vittohe nttiha ixin jidoan despedido de ngain cain chojni mé. <sup>23</sup> Co después de goan despedido de ngain cain chojni

mé, jehó coani ná jnanchjan para joinchecoanx-inhi Dios. Co are ondacontie Jesús nttiha tají jehó. <sup>24</sup> Co barco que sajoicao tti chojni que vacao ojoiji barco ngosine jinda mé. Co olé nda coexinhi cjoinhi nganito barco mé ixin čhintto anto soji joixin čhintto de tti satettji na. <sup>25</sup> Co are ochiaon vingasán Jesús conchienne ngain na jittjixin rotté ngataonhe jinda. <sup>26</sup> Co are tti chojni que vacao vicon na que jehe jittjixin rotté ngataonhe jinda, jehe na vintteħaon na, co de joħaon jehe na vinttecoyao na sén co ndaħo na:

—¡Yá ná nttanchanha!

<sup>27</sup> Pero Jesús nichjé na co ndaħo ngain na:

—¡ħaonha ra, ixin janha joihi!

<sup>28</sup> Cottimeja Pedro nichja ngain co ndaħo:

—Si ndoa soixin, ttetonna tsjixin rotnena ngataonhe jinda hasta tti ttjen soixin.

<sup>29</sup> Co Jesús ndaħo ngain:

—ħacoi remé.

Cottimeja Pedro vanianxin de barco mé co coexinhi cjoixin rotté ngataonhe jinda para sarrocji ngain tti jí Jesús. <sup>30</sup> Pero are jehe conohe ixin anto soji čhintto, jehe ħaon co ixin jehe coexinhi ndaxincanjingui jinda, jehe ndaħo sén:

—¡Tančhjangaha na rroxincanjingui na jinda!

<sup>31</sup> Ngain rato mé Jesús tsehe rá co ndaħo ngain:

—¡Jaha tantoha ditticaon! ¿Quedonda joidoho joħaon?

<sup>32</sup> Co are cayoi jehe na coani na barco mé, otavehe chintto. <sup>33</sup> Cottimeja nidiguittohe ngax-inhi barco mé vinttetoxin nttajochjihi na ngain Jesús, co vinttendaħo na:

—Ján ndoa, soixin Xenhe Dios.

*Jesús joinchexingamehe tsje chojni nihi ngain nonttehe Genesaret*  
(Mr. 6.53-56)

<sup>34</sup> Coattoa na jinda mé, co joiji na ngain nonttehe Genesaret. <sup>35</sup> Are chojni de ngain lugar mé joatsoan na que jehe Jesús, jehe na joinchenohe na chojni de ngoixin región mé, co joiaho na cain chojni nihi ngain Jesús. <sup>36</sup> Co vanchetsenhe na ñao Jesús ixin sanjo joachaxin ngain cain tti nihi mé de rrocatte na masqui jeho rioho ngandehe lonttoe, co cainxin chojni que catte lonttoe Jesús, xingamehe na de ixin tti chin que vinttechonda na.

## 15

*Tti nchejianha chojni*  
(Mr. 7.1-23)

<sup>1</sup> Cottimeja vintteconchiehe ngain Jesús canxion xifariseo co canxion ximaestroey ley Israel que vinttequixin xa de ngain ciudad de Jerusalén, co joanchiangui xa ngain Jesús co ndačo xa:

<sup>2</sup> —¿Quedonda chojni que čjiho ncheha na tti costumbre que coetonha nigoelitona řančhen? Ixin jehe na tonttiha na jinda rá na tsje nttiha saho que sine na.

<sup>3</sup> Pero Jesús joanchiangui ngain xa co ndačo:

—¿Quedonda jaha ra ncheha ra tti ttetonha Dios co jeho nchehe ra inchin costumbre que jaha ra chonda ra? <sup>4</sup> Ixin Dios coetonha: “Ttjiho ra respeto ngain ndodá ra co ngain janná ra”, co “Tti rronichja jianha de ixin ndodé o janné, chojni mé jiquininxin nasenxon.” <sup>5</sup> Pero jaha ra ndačo ra

que ná chojni nchao rrondache ndodé o janné: “Janha čhoha tsjenguijna soixin ixin cain cosa que janha chonda, ojoanjo ngain Dios.” <sup>6</sup> Co jaha ra ndačo ra que quexeho chojni que rrondačo jañá, irrochondaha na que tsjenguijna na ndodé na o janné na. Jañá jaha ra incheha ra caso tti coetonha Dios co nchehe ra inchin costumbre que jaha ra chonda ra. <sup>7</sup> ¡Jaha ra ncheha ra tti ndačo ra! Jian dindačo profeta Isaías de ixin jaha ra, are jehe dicjin:

<sup>8</sup> Chojni tehe nchesayana na de ngain rroha na, pero de ngain ansén na xa icjin te na para sino na na janha.

<sup>9</sup> Mexinxin xonhi xé masqui tenchecoanxinna na; ixin tti jehe na tenchecoenhe na chojni joxon tti ttetonha xí nttihi ngataha nontte.

<sup>10</sup> Cottimeja Jesús vayé cainxin chojni que vintte nttiha co ndačo ngain na:

—Ttinhí ra tti rrondattjo ra co ttinxin ra jian:

<sup>11</sup> Jeha tti jine co tti dihi chojni nchejianha na, sino que cain palabra jianha que dačhjexin de rroha na, mé tti nchejianha na.

<sup>12</sup> Cottimeja tti chojni que vacao Jesús conchienhe na ngain co ndačo na:

—¿Anoaha soixin ixin xifariseo yá feo vintte-conohe xa are vinttequinhi xa tti soixin ndačo?

<sup>13</sup> Pero Jesús ndačo ngain na:

—Quexeho nttattochjoin que Nnodana que ttjen ngajni cjoengaha, nttá mé chonda que sachjenguinoa ntta. <sup>14</sup> Tančhjanda ra xa ncheha ra xa caso ixin jehe xa inchin tti diconha que dicao iná tti diconha. Co jañá si ná tti diconha sicao iná

tti diconha, cayoi chojni mé sinttjia na ngain ná ttoe.

<sup>15</sup> Cottimeja Pedro ndačo ngain Jesús:

—Ndachjenji na quehe rročo ejemplo yá.

<sup>16</sup> Jesús ndačo:

—¿Acai jaha ra ttinxinha ra? <sup>17</sup> ¿Attinxinha ra que cain tti jine ni sattji para ngaxinhi tsehe ni, cottimeja dačhjexin de ngain cuerpoe ni? <sup>18</sup> Pero tti palabra que dačhjexin de ngain rroha ni ttixin de ngain ansén ni, co palabra mé tti nchejianha ni. <sup>19</sup> Ixin de ngain ansén chojni ttixin cain cosa jianha que jehe na řaxaon na, co jehe na řaxaon na para santsjehe na vidé iná chojni, co jehe na dinttejoacaho na iná nčhí que jeha nčhichihi na, jehe na tté na cosé iná chojni, jehe na nichja na ndoaha de ná cosa, co jehe na ncheřoxinhi na nichja na cuentoe iná chojni que jeha ndoa. <sup>20</sup> Cain cosa yá tti nchejianha chojni, pero tti tonttiha na jinda tsje nttiha saho que sine na, jeha mé tti nchejianha na.

*Ná nčhí de iná nacion que vitticaon nčha Jesús  
(Mr. 7.24-30)*

<sup>21</sup> Jesús vačhjexin de nttiha co sacjoi para regionen ciudad de Tiro co Sidón. <sup>22</sup> Co ná nčhí que joixin de ngain nacioen Canaán tiempo mé vehe nčha ngain región mé, co joí nčha ngain Jesús co ndačo nčha sén:

—¡Soixin tti razé David, nttatsanha ñao ttiaconoana na! Ná xanhna xannčhí chonda xan ná espíritu jianha co anto tanguí tonhe xan.

<sup>23</sup> Pero Jesús joincheha caso nčhí mé. Cottimeja tti chojni que vacao joí na ngain co joinchetsenhe na ñao Jesús co ndačo na:

—Ndache nchí jiha satsji ncha ixin atto sén jinichja ncha jirroá na ncha.

<sup>24</sup> Cottimeja ndacho Jesús ngain ncha:

—Dios rroanha na janha pero jecho para ngain chojni de nacioen Israél que ndadiguitján inchin coleco.

<sup>25</sup> Pero nchí mé conchienne ncha co vettoxin nttajochjihi ncha ngain Jesús co ndacho ncha:

—¡Nttatsanha ñao ttjenguijna na soixin!

<sup>26</sup> Jesús ndacho ngain nchí mé:

—Nchaoha jí si ná chojni santsjehe xenhe niot-tja para rrochjé conia nio.

<sup>27</sup> Pero jehe nchí mé ndacho ncha:

—Ján ndoa, pero hasta conia nchao jine va tti nchoe niottja que dinttjixin de ngataha mesé nindoha va.

<sup>28</sup> Cottimeja Jesús ndacho ngain nchí mé:

—¡Jaha anto jian ditticaon! Tsonhe inchin jaha rinao.

Co ngain rato mé xenhe tti nchí mé ndaxingamehe xan.

### *Are Jesús joinchexingameje tsje chojni nihi*

<sup>29</sup> Jesús sacjoixin de nttiha co vatto ngandehe lago de Galilea, cottimeja coani ngataha ná jna co tavehe nttiha. <sup>30</sup> Tsje chojni joí ngain Jesús tti jehe tají, co joiaho na ngain Jesús tsje chojni nihi; tti rrengo, tti chejo, tti ttao, tti chonda rá que xonhi xé ra, co icha ninihi. Cain chojni mé coín na ngandaxinhi Jesús, co jehe joinchexingamehe cainxin na. <sup>31</sup> Co cainxin chojni que te nttiha goan na admirado are jehe na vicon na que tti chojni ttao onchao nichja, co tti vaquín rá ondaxingamehe, co tti rrengo onchao sacjoixin rotté, co tti chejo

onchao vicon. Co cainxin chojni mé coexinhi na joinchecoanxinhi na Dios de chojni Israel.

*Are Jesús joanjo joine nó mil xí  
(Mr. 8.1-10)*

<sup>32</sup> Cottimeja Jesús vayé tti chojni que vacao co ndačo ngain na:

—Janha ttiaconoá cain chojni tehe ixin ochonda ní nchanho que te na nttihi nganji na, co xonhi chonda na para sine na. Janha rinaoha rror-roanha na para nchiandoha na si sineha na ixin puede ndatsonchjenxin na jintta ngatja nttiha.

<sup>33</sup> Cottimeja tti chojni que vacao Jesús ndačo na ngain:

—Pero ¿que xén sonttó na tti sine na jehe na? Ixin anto tsje na, co nttihi ngain lugar jihi xonhi nchia jí.

<sup>34</sup> Jesús joanchiangui ngain jehe tti chojni que vacao co ndačo:

—¿Quejanhi niottja chonda ra?

Co jehe na ndačo na:

—Yáto niottja co nchion copescadochjan.

<sup>35</sup> Cottimeja Jesús coetonhe cain chojni mé que tasintte na ngataha nontte. <sup>36</sup> Co jehe cóá tti yáto niottja mé co copescado co joanjo gracias ngain Dios. Cottimeja váña nio co copescado co joanjo ngain tti chojni que vacao, co jehe na conchjea na nio conixin copescado ngain cainxin chojni mé.

<sup>37</sup> Cainxin na joine na co cojehe na jian. Cottimeja xa joinchecaon na yáto nntaža de tti xexin joine na.

<sup>38</sup> Cain chojni que joine mé cjoí nó mil xí co icha nchí co chjan. <sup>39</sup> Cottimeja Jesús goan despedido

de ngain cainxin chojni mé, co joixinhi barco co sacjoi para regioen Magdala.

## 16

*Xifariseo co xisaduceo joanchia xa ixin Jesús rrojinchehe ná milagro*

*(Mr. 8.11-13; Lc. 12.54-56)*

<sup>1</sup> Xifariseo co xisaduceo cjoi xa vintteguitsjehe xa Jesús, co para que rroguicon xa que Jesús rrojinchehe ná cosa nchaoha, jehe xa ndačo xa ngain que jehe rrojinchehe ná señal de milagro que rroquixin de ngajni. <sup>2</sup> Pero Jesús ndačo ngain xa:

—Are totsocjin jaha ra ndačo ra: “Anto čhjoin tsí nchanho ndoe ixin ngajni jatse.” <sup>3</sup> Co are ndoyo ndačo ra: “Jai čhjoinha sehe nchanho ixin jatse ngajni co jiá ttjoi.” ¡Jaha ra ncheha ra tti ndačo ra! Jaha ra noha ra datsoenhe ra quežén sehe tiempo are tsjehe ra ngajni, pero noaha ra datsoenhe ra quehe rročo señal de ngain tiempo jihi. <sup>4</sup> Jaha ra chojni jianha de ngain tiempo jihi que ditticaonha ra co tedanchia ra ná señal de milagro. Pero xonhi icha señal sayehe ra que jeho inchin señal que conhe Jonás.

Jañá čo Jesús ngain xa, co cointtohe xa nttiha co jehe sacjoi.

*Tti levaduré xifariseo*

*(Mr. 8.14-21)*

<sup>5</sup> Are tti chojni que vacao Jesús vatto na toenxin lago mé, jehe na tjañehe na de joicao na niottja para rrojine na. <sup>6</sup> Cottimeja Jesús ndačo ngain na:

—Tsjenxin ra, ttijho ra cuidado de ixin levaduré xifariseo co levaduré xisaduceo.

<sup>7</sup> Co tti chojni que vacao Jesús coexinhi na ndache chó na:

—Jañá ndattjo na na ixin ján na joicoha na niottja para sontte na.

<sup>8</sup> Jesús conohe quehe tetjao na co jehe ndačo ngain na:

—¿Quedonda ndačo ra ixin chondaha ra niottja? ¡Jaha ra seguro que tantoa ditticaon ni ra! <sup>9</sup> ¿Axa ttinxinha ra, ni xaxaonha ra de tti naho niottja que janha conchjeyá tti naho mil xí, co ixin tsje nntaşa joinchecaon ra de tti niottja que xexin joine na? <sup>10</sup> ¿Ani xaxaonha ra de tti yáto niottja que conchjeyá tti nó mil xí, co ixin tsje nntaşa joinchecaon ra de tti niottja que xexin joine na? <sup>11</sup> ¿Queñén xaxaonxin ra que janha rrindačhjan de ixin tti sintte ra are ndačhjan ixin tsjiho ra cuidado de ixin levaduré xifariseo, co levaduré xisaduceo?

<sup>12</sup> Cottimeja jehe na coinxin na que Jesús jeha jindache na ixin sicao na cuidado de ixin levaduré niottja, sino que tti tenchecoenhe xifariseo icha chojni co tti tenchecoenhe xisaduceo icha chojni.

*Pedro ndačo que Jesús, mé tti Cristo*

*(Mr. 8.27-30; Lc. 9.18-21)*

<sup>13</sup> Are Jesús joihi ngain regioen Cesarea de Filipo, jehe joanchiangui ngain tti chojni que vacao co ndačo:

—¿Quehe ndačo chojni ixin quensen na janha, tti Xí que joixin de ngajni?

<sup>14</sup> Jehe na ndačo na:

—Canxion chojni ndačo na que jaha Juan tti vancheguitte chojni, icanxin na ndačo na que

jaha Elías, co icanxin na ndačo na que jaha Jeremías o iná profeta.

<sup>15</sup> Cottimeja ndačo Jesús ngain tti chojni que vacao:

—Co jaha ra, ¿quehe ndačo ra ixin quensen na janha?

<sup>16</sup> Cottimeja ndačo Simón Pedro:

—Soixin tti Cristo, tti Xenhe Dios que jichon.

<sup>17</sup> Jesús ndačo ngain Pedro:

—Anto çhjoin para ixin jaha, Pedro, tti xenhe Jonás, ixin ni ná chojni ndattjoha yá, sino que Ndo-dana que ttjen ngajni tti ndattjo yá. <sup>18</sup> Co janha rrindattjo que jaha dinhi Pedro, co nombre jihi rročo x̄o. Co ngataha x̄o jihi sinttachjian ningona; co ni joachaxín infierno tsixinha ngain nihngo jihi. <sup>19</sup> Janha rrochjaha jaha cain joachaxin de tsinxin quehe rinao Dios nttiha ngajni; inchin janha rrochjaha jaha llave de ngajni. Co tti jaha tsiatte nttihi ngataha nontte, Dios ocoiatte nttiha ngajni; co tti tsonxindanguehe jaha nttihi ngataha nontte, Dios oconxindanguehe mé nttiha ngajni.

<sup>20</sup> Cottimeja Jesús coetonhe jehe tti chojni que vacao que x̄onhi chojni rrondache na ixin jehe tti Cristo.

*Jesús ndačo ixin jehe ndasenhe*

*(Mr. 8.31—9.1; Lc. 9.22-27)*

<sup>21</sup> Desde are mé Jesús coexinhi ndache jehe tti chojni que vacao que ixin jehe chonda que tsji para ciudad de Jerusalén co nttiha anto tangui tsonhe jehe ngain cain xittetonha ngain nihngo nttiha, co ngain cain xidána que vaquetonha ngain icha xidána, co ngain cain ximaestroe ley Israel. Co ndačo que cain xí mé nasoexon xa

jehe, pero ngain nchanho ninxin jehe rroxechon.

<sup>22</sup> Cottimeja jehe Pedro joantsjenda Jesús co coex-inhi Pedro ndache Jesús:

—¡Nichjaha jamé ixin Dios sicao cuidado de ixin soixin que ñonhi tiempo tsonha jihi!

<sup>23</sup> Pero Jesús ngaria co ndaño ngain Pedro:

—¡Sattjixin de nganji na, Satanás! ixin jaha rinao rrocayaconhna na janha. Jaha ñaxaonha inchin ñaxaon Dios, sino inchin ñaxaon chojni que te ngataha nontte.

<sup>24</sup> Cottimeja Jesús ndaño ngain tti chojni que vacao:

—Si ñhonja de jaha ra rinao ra sacjin na, pero chonda ra que rrotjañaha ra cain tti chonda ra co masqui anto tangui tsonha ra co hasta nasenxon ra.

<sup>25</sup> Ixin tti rinao que vidé ñonhi tsonhe, mé sinchetján vidé; pero tti sinchetján vidé de ixin causananxin janha, mé sechon para cainxin tiempo.

<sup>26</sup> Ixin ñonhi ñé que ná chojni sachá cainxin que jí ngain mundo jihi co ndasinchetján almé, ¿o quejanhi tsenanxin chojni almé?

<sup>27</sup> Ixin janha, tti Xí que joixin de ngajni, sihi iná conixin gloria que rrochjana Ndodana conixin cain angelna, cottimeja cada chojni tsjengá na hna inchin jehe na joinchehe na.

<sup>28</sup> Co atto seguro rrindattjo ra, que toha ra ño te ra nganji na jaixon, ña senha ra hasta que siconja ni ra janha, tti Xí que joixin de ngajni, rrocjan na sihi conixin joachaxin para siquetonha cain cosa.

## 17

*Are vicon na Jesús anto ojé  
(Mr. 9.2-13; Lc. 9.28-36)*

<sup>1</sup> Vatto incjaon nchanho, cottimeja Jesús joicao Pedro co Jacobo co Juan, xanchó Jacobo, co Jesús cjoí conixin jehe na ngataha ná jna anto noi, <sup>2</sup> co nttiha vicon na Jesús anto ojé. Ngá con Jesús anto conguixian inchin tté nchanho, co lonttoe anto coroa lontto hasta conguixima lontto. <sup>3</sup> Co ngain rato mé jehe na vicon na Moisés co Elías, tatetjao na Jesús nttiha. <sup>4</sup> Cottimeja Pedro ndačo ngain Jesús:

—Soixin, ¡Atto nchao ixin janha na te na nttihi! Si rinao, janha na sinttachjian na ní nchiachjan: ná nchiachjan para ixin soixin, ná nchiachjan para ixin Moisés, co iná nchiachjan para ixin Elías.

<sup>5</sup> Pedro xa jinichja jañá are joí ná ttjoí anto roa hasta jitonguixima ttjoí, co ttjoí mé ndacjoanotaon na, co de ngacjan ttjoí mé coinhi na tté Dios que ndačo:

—Jihi tti Xanhna que janha anto rinaho, co de ixin jehe Xan janha anto chahna. Ditticaon ra tti rrondačo Xan.

<sup>6</sup> Cottimeja tti canio chojni que joicao Jesús nttiha are coinhi na yá, canio na vinttettoxin na co visé na ngataha nontte, co anto xaon na.

<sup>7</sup> Cottimeja Jesús conchienne ngain na, catte na co ndačo ngain na:

—Dingattjen ra, co xaonha ra.

<sup>8</sup> Co are jehe na tsjehe na, ixonhi chojni vicon na, más que jehó Jesús.

<sup>9</sup> Are tedania na de ngataha jna mé, Jesús cetonhe na co ndačo:

—Xonhi chojni ttequinhi ra tti jaha ra vicon ra, hasta que janha, tti Xí que joixin de ngajni, rroxechon na.

<sup>10</sup> Cottimeja jehe tti canio chojni que joicao Jesús joanchiangui na ngain Jesús co ndačo na:

—¿Quedonda ndačo ximaestroe ley Israel ixin Elías chonda que tsí icha saho que jaha?

<sup>11</sup> Jesús ndačo ngain na:

—Ján ndoa que Elías tti tsí icha saho que janha co jehe tti siquentonxinhi vidé chojni para que nchao sayehna na janha. <sup>12</sup> Pero janha rrindattjo ra que Elías ojoí co jehe na joatsoanha na, sino que joinchehe na ngain inchin jehe na joinao na. Jamé janha cai, tti Xí que joixin de nganji, tangui tsonna de ngain rá jehe na.

<sup>13</sup> Cottimeja jehe tti canio chojni que joicao Jesús xaxaon na que Jesús jindačo de ixin Juan, tti vancheguitte chojni.

*Jesús joinchexingamehe ná xanxí que vechonda chin denda*

*(Mr. 9.14-29; Lc. 9.37-43)*

<sup>14</sup> Are joiiji na ngain tti vittohe icha chojni que vacao Jesús, nttiha anto tsje chojni sinchonhe na Jesús. Are conchienne ná xí ngain Jesús co vettoxin nttajochjihi xa co ndačo xa:

<sup>15</sup> —Nttatsanha ñao soixin, ttiaconoehe xanhna ixin chonda xan chin denda co anto tangui tonhe xan. Tsje nttiha detsingatte xan xohi o ngangui jinda. <sup>16</sup> Nttihi joiquinha xan ngain chojni que çjiho tehe, pero çhoha nchexingamehe na xan.

<sup>17</sup> Jesús ndačo:

—¡Jaha ra chojni que ditticaonha ra co jianha ra! ¿Hasta quesa janha chonda que sarihi nganji ra? ¿Hasta quesa janha chonda que tsixinna nganji ra? Sicohna ra chjan yá nttihi.

18 Cottimeja Jesús joinchesattehe tti espíritu jianha que vechonda chjan mé, co venguixin espíritu mé de ngaxinhi cuerpoe xan. Co desde ngain rato mé jehe xan ndaxingamehe xan.

19 Cottimeja are jeho Jesús nttiha conixin chojni que vacao, jehe na joanchiangui na ngain co ndačo na:

—¿Quedonda janha na čoha vehngui na espíritu jianha yá?

20 Jesús ndačo ngain na:

—Ixin jaha ra antoha jian ditticaon ni ra janha. Co janha atto seguro rrindattjo ra que si tti ditticaon ra jiexin rrogehe inchin ná tsehe ca dinhi mostaza, nchao rrondache ra jna jiha: “Sattjixin de nttihi co sattji iná lugar”, co jna yá satsjixin jna de tti jí jna. xonhi cosa que čoha sinchehe ra si ndoa ditticaon ra. 21 Pero clase de espíritu jianha yá jeho nchao dengui ni are nchecoanxinhi ni Dios co dinttecjáño ni saho.

*Jesús ndačo iná ixin jehe ndasenhe  
(Mr. 9.30-32; Lc. 9.43-45)*

22 Ná nchanho are xa vintte na ngain regioen Galilea, Jesús ndache tti chojni que vacao ixin chojni sinchechienhe na jehe, tti Xí que joixin de ngajni, para ngain chojni jianha. 23 Co ixin nasonxon na jehe Jesús, pero ngain nchanho ninxin jehe rroxechon iná. Co chojni que vacao anto vinttechín na are coinhi na yá.

*Are Jesús cjoenga hna impuesto ngain nihngo*

24 Are Jesús conixin chojni que vacao joiji na ngain rajna Capernaum, tti xí que vanchehe cobro

impuestoe nihngo cjoí xa ngain Pedro co joanchi-  
anguihi xa co ndačo xa:

—¿Attjenga hna ximaestrea ra impuesto para  
ixin nihngo?

<sup>25</sup> Pedro ndačo:

—Ján.

Cottimeja Pedro are cjoí ngaxinhi nchia para  
rrojindačo tti ndačo xicobrador, pero Jesús  
saho ndačo ngain jehe:

—Pedro, ¿quensen xaxaon jaha nchehe cobro im-  
puesto xittetonha ngataha nontte nttihi? ¿Achojni  
de ngain nacioen xa o ni chojni que ttixin cjin?

<sup>26</sup> Pedro ndačo:

—Tti chojni que ttixin cjin.

Jesús ndačo:

—Mexinxin chojni xa chondaha na que tsjenga  
na hna. <sup>27</sup> Pero para que xonhi chojni sont-  
toñao na, ttji jaha ngain lago, dancanguihi anzuelo  
co dantsjengui tti saho copescado que rrotse  
anzuelo. Co ngaxinhi rroha copescado mé sinchí  
ná tomi. Tomi mé sittja para tsjengaxin na hna  
impuestona janha co impuestoa jaha. Ttjiho tomi  
mé co ttjenga hna cain.

## 18

*¿Quensen tti icha importante?*

*(Mr. 9.33-37; Lc. 9.46-48)*

<sup>1</sup> Ngain rato mé chojni que vacao Jesús  
conchienne na ngain Jesús co ndačo na:

—¿Quensen icha importante ngajni?

<sup>2</sup> Cottimeja Jesús vayé ná xannchinchjan co coín  
xan ngayehe na, <sup>3</sup> co ndačo:

—Atto seguro rrindattjo ra que si jaha ra tsen-toxinha ra vidá ra co rrocjan ra inchin xannchinchinchjan, čhoha rrochonda ra parte ngain tti ttetonha Dios. <sup>4</sup> Mexinxin quexeho chojni que jeha orgulloso co cjan inchin chjan jihi, chojni mé tti sehe icha importante nttiha ngajni. <sup>5</sup> Co tti chojni que sayé ná tti inchin xannchinchjan jihi ixin ditticaon na janha, cai chojni mé sayehna na janha.

*Tti sinchenchehe ni cosa jianha*  
(Mr. 9.42-48; Lc. 17.1-2)

<sup>6</sup> Quexeho chojni que sincheyehe ná chojni mé que řa antoha jian ditticaon na janha, icha jian sečhianito ná řočin ngain ttosin chojni mé para rroxincanjingui ndachaon. <sup>7</sup> Atto nchaoha ixin jí cosa ngataha nontte nttihi que tenchenchehe chojni tti jianha. Cosa mé cainxin tiempo sehe nttihi, pero janto tangui tsonhe tti chojni que sincheyehe iná chojni para sinchehe jamé!

<sup>8</sup> Mexinxin si ná rá o ná rottea sinttařaxaon para sinchehe jianha, ncheha cosa mé, masqui hasta tončhinji rá o rottea co tja cjin, ixin icha jian rrochonda vida naroaxin masqui coha ná rá o ná rottea, co nahi tsji conixin yoixin rá o yoixin rottea ngain infierno tti řonhi tiempo danga řohi. <sup>9</sup> Co si jmacon sinttařaxaon para sinchehe jianha, ncheha cosa mé, masqui hasta dantsjengui jmacon co tja cjin, ixin icha jian rrochonda vida naroaxin masqui nacoa jmacon, co nahi tsji conixin cayoixin jmacon ngain infierno tti řonhi tiempo danga řohi.

*Ejemploe tti coleco diguitján  
(Lc. 15.3-7)*

<sup>10</sup> 'Xaxaonha ra ixin chojni que xa antoha jian ditticaon na janha jeha importante na. Ixin janha rrindattjo ra que ngajni cain ángel que tenda jehe na, cainxin tiempo te ángel mé ngattoxon con Nnodana que ttjen ngajni. <sup>11</sup> Ixin janha, tti Xí que joixin de ngajni, joihi para joicjenguijna tti chojni que otequininxin rrocji ngain infierno.

<sup>12</sup> 'Inchin si ná xí chonda xa cien coleco co ndasitján ná va, ¿quexén sinchehe xa? ¿Atsinttoeha xa tti noventa y nueve va ngagaha jna, co satsji xa sicjé xa coleco vitján? <sup>13</sup> Co si sittja xa va, seguro que icha rroché xa ngain coleco mé que ngain tti noventa y nueve coleco que vitjanha. <sup>14</sup> Jamé cai Nnodá na que ttjen ngajni rinaoha Ndo que sitján ni ná chojni que xa antoha jian ditticaon na janha.

*Quexén sinchetjañehe ni chojni que ditticaon  
Jesús  
(Lc. 17.3)*

<sup>15</sup> 'Si ná chojni que ditticaon na janha sinchehe ná cosa nchaoha nganji jaha, nichjehe jaho co jehe co ndache ixin jehe nchaoha joinchehe. Si jehe sinchehe caso tti jaha rrondache, nchao, ixin jaha ocjoenguijna jehe para que jehe rrochonda parte ngain tti ttetonha Dios. <sup>16</sup> Pero si sincheha caso tti jaha rrondache, cottimeja ttjé ná o yó chojni para ttjiho dinichjehe ra jehe que tti joinchehe nchaoha jí, co jehe cayoi chojni mé sintte na de testigo de quehe rrondache chó ra. <sup>17</sup> Co si jehe xa sincheha caso masqui cjoiho cayoi chojni mé, cottimeja jaha dindache cain chojni ngain nihngo. Co si chojni

mé ʒa sincheha caso tti rrondačo cain chojni ngain nihngo, cottimeja cain ra dantsjenda ra chojni mé inchin tti chojni que ditticaonha Dios o inchin ná chojni jianha.

<sup>18</sup> Janha rrindattjo ra seguro que cain tti tsia ra nttihi ngataha nontte, Dios ocoia cosa mé nttiha ngajni. Co cain tti jaha ra tsonxindanguehe ra nttihi ngataha nontte, Dios oconxindanguehe cosa mé nttiha ngajni.

<sup>19</sup> Cai rrindattjo ra que si yó de jaha ra sintte ra de acuerdo nttihi ngataha nontte de sanchia ra čhonja are tenchecoanxinhi ra Nnodana que ttjen ngajni, seguro que jehe Ndo rrochjá ra Ndo. <sup>20</sup> Ixin tti te yó o ní chojni que tenichja na conixin nombrena janha, janha nttiha rrihi ngayehe na.

<sup>21</sup> Cottimeja Pedro cjo joi joanchianguihi Jesús co ndačo:

—¿Quejanhi nttiha chonda janha que sinttatjañá ná tti sinchehe jianha nganji na janha? ¿Achonda que sinttatjañá hasta yáto nttiha?

<sup>22</sup> Jesús ndačo ngain Pedro:

—Janha rrindattjoha que hasta yáto nttiha, sino que hasta yáto de tti setenta nttiha.

*Ejemploe ná tti nchehe ʒa que čhoha joinchet-jañehe ná xicompañeroe*

<sup>23</sup> Mexinxin rrondattjo ra quežén tti ttetonha Nnodana que ttjen ngajni. Mé inchin ná rey que joinchechjienhe cuenté cain ninchehe ʒé ixin quejanhi teca na cada na. <sup>24</sup> Jehe mero coexinhi jinchechjian cuenta mé are joiaho na ngain rey mé ná tti nchehe ʒa que jica tsje millones. <sup>25</sup> Pero ixin tti nchehe ʒa mé chondaha quehe

tsjengaxin hna, mexinxin coetonha rey mé que rrojinhecji na tti nchehe xa mé ngain iná xinajni conixin čihi co xenhe co cain cosa que jehe vechonda para rroxengaxin hna tti jehe jica ngain rey. <sup>26</sup> Cottimeja jehe tti nchehe xa mé vettoxin nttajochjihi ngain rey co ndačo: “Ntatsanha ñao chonna na nchion co tsengaha hna cainxin tti rricaha.” <sup>27</sup> Rey coiaconoehe tti nchehe xa mé co joinchetjañehe cain tomi que veca co coančjanda sacjoi. <sup>28</sup> Pero are jehe tti nchehe xa mé vačje para sacjoi, nttiha vetanxin iná tti nchehe xa, xicompañeroe. Co jehe mé veca nchion tomi ngain tti sajittji. Co jehe tti sajittji mé tse co tsenguihi ttosin xicompeñeroe co coejehe tté xa, co ndache chó: “¡Ttjengana hna tti rricana na!” <sup>29</sup> Cottimeja jehe tti veca vettoxin nttajochjihi co ndačo: “Nttatsanha ñao chonna na, co tsjengaha hna cain tti rricaha.” <sup>30</sup> Pero tti sajittji čoha, sino que sajoicao coiaxinhi ngain cárcel hasta que rrocjengaja hna tti jica. <sup>31</sup> Co are icha ninchehe xa vicon na jihi, anto vinttechín na co cjo na joindačo na cain jihi ngain xinajní na, jehe tti rey mé. <sup>32</sup> Cottimeja jehe rey mé rroanha joajna para joičacoa tti cjoaya, co ndačo ngain: “¡Jaha ná ninchehe xa anto jianha! Janha jointtatjañaha jaha cain tti joaricana na ixin joinchetsena ñaho na. <sup>33</sup> Jaha cai rrochonda que rroquiaconoehe xicompañeroa, jañá inchin janha coiaconoaha jaha.” <sup>34</sup> Co jehe rey mé anto coñao co coetonha para que sayé castigo jehe tti nchehe xa mé hasta que tsjengaja hna cain tti jica.

<sup>35</sup> Co are ojoexin ndačo Jesús cain yá jehe

ndaĉho:

—Cai jańá sinchehe Ndodana que ttjen ngajni nganji ra, si jaha ra sinchetjańeha ra icha chojni tti nchaoha que sinchehe na nganji ra.

## 19

*Jesús ndaĉho de ixin xí que daĉhjendehe ĉhihi  
(Mr. 10.1-12; Lc. 16.18)*

<sup>1</sup> Después que Jesús ndaĉho cain cosa yá, jehe sacjoixn de Galilea co joiĵi ngain tti parte de region Judea que jí lado ĉinxin nchanho de río Jordán. <sup>2</sup> Anto tsje chojni rroé na Jesús, co nttiha jehe joinchexingamehe tsje chojni nihi.

<sup>3</sup> Cottimeja canxion xifariseo vintteconchienne xa ngain Jesús para rrojinchenichja xa Jesús ná cosa nchaoha para que nchao rrocjanguihi xa. Joanchiangui xa ngain jehe co ndaĉho xa:

—¿Anchao ná ni saĉhjendehe ni ĉhihi ni de ixin quexeho cosa que jehe ni isincheĵoxinha ni?

<sup>4</sup> Jesús ndaĉho ngain xa:

—¿Atsjeha ra tti jítaxin Palabré Dios? Nttiha jítaxin ixin Dios tti joinchechjian chojni are saho. Co jehe mé joinchechjian xí co nĉhí. <sup>5</sup> Cai jítaxin nttiha: “Mexinxin xí saĉhjendehe xa ndodé xa co janné xa para secaho xa jého ĉhihi xa, co cayoixin na sintte na inchin nacoaxinxon chojni.” <sup>6</sup> Co jańá ijeha yó chojni, sino que nacoaxinxon chojni. Mexinxin xí ĉhoha saĉhjendehe xa ĉhihi xa ixin Dios joinchechjian cayoi jehe na nacoa chojni.

<sup>7</sup> Cottimeja vinttendaĉho jehe xa:

—¿Quedonda diquetonha Moisés que nchao sanjo ni ngain nĉha ná ĵón que jítaxin que

jehe ni ondavačhjenjehe ni čihi ni, co jamé ondatsinttohe ni ncha?

<sup>8</sup> Jesús ndačo:

—Moisés ndačo jañá ixin jaha ra atto cha ansean ra, mexinxin jehe joanjo joachaxin yá de sachjendehe ra nchičhiha ra, pero are icha saho jeha jañá coetonhe Dios. <sup>9</sup> Co janha rrindattjo ra, que tti dačhjenjehe nchičhihi (co jeha de ixin vittjaxin ncha tajijoacaho ncha iná xí), co jehe decaho iná nchi, jehe nchehe jianha xajeho como si rrochonda yó nchi. Co tti decaho ná nchi que digachjendehe xixihi, cai chojni mé jianha nchehe, xajeho inchin rrochonda nchičhihi iná xí.

<sup>10</sup> Cottimeja chojni que vacao Jesús ndačo na ngain:

—Si jañá jí remé de ixin xí co nchi, icha jian sinttecaoha chó ni.

<sup>11</sup> Jesús ndačo ngain na:

—Pero jeha cain chojni nchao sintte na jeho na, sino que jeho tti chojni que Dios ndačo para que sintte na jeho na. <sup>12</sup> Jí tsje razón para que xí dinttecaoha xa nchi. Te xí deporsín desde are toncjihhi xa cuerpoe xa rinaoha nchi, co icanxin xí čhoaha sinttecao xa nchi ixin chojni joinchexoeneha xa ngain tti parte jima de cain xí, co icanxin xí rinaoha xa dinttecao xa nchi ixin icha rinao xa nchehe xa inchin ttetonha Dios que ttjen ngajni. Co xo rinaoha ra sinttecho ra nchi ixin sinchehe ra inchin ttetonha Dios, nchao nchehe ra.

*Jesús joinchenaon xannchinnchinchjan  
(Mr. 10.13-16; Lc. 18.15-17)*

<sup>13</sup> Cottimeja joiaoe na Jesús canxion xannchinnchinchjan para que Jesús rroquín rá

ngataha já xan co sinchetsenhe ñao Dios ixin sinchençaon xan. Pero chojni que vacao Jesús coexinhi na joinchesattehe na cain tti chojni que joicao cain chjan mé. <sup>14</sup> Pero Jesús ndačo ngain chojni que vacao:

—Tančhanda ra que xannchinnchinchjan tsí xan nganji na janha, cayacoenha ra xan ixin ngain tti ttetonha Ndodana, nttiha para cain chojni inchin jehe xan.

<sup>15</sup> Co Jesús coín rá ngataha cain xannchinnchinchjan mé co joinchetsenhe ñao Dios ixin sinchençaon xan, cottimeja Jesús sacjoixin de nttiha.

*Ná xanxí anto rico cjoao xan Jesús*

*(Mr. 10.17-31; Lc. 18.18-30)*

<sup>16</sup> Ná xanxí cjoí xan joitsjehe xan Jesús, co joanchiangui xan co ndačo xan:

—Maestro, soixin que anto jian, ¿quehe icha cosa jian chonda janha que sinttaha para que janha rrochonda iná vida nroaxin que xonhi tiempo tsjexin?

<sup>17</sup> Jesús ndačo ngain xanxí mé:

—¿Quedonda nchequinhi na janha jian? xonhi iná tti icha jian, jeho nacoaxinxon, co mé jehe Dios. Pero si jaha rinao rrochonda iná vida nroaxin, ditticaon co nchehe cain tti coetonha Dios.

<sup>18</sup> Xanxí mé ndačo xan:

—¿Quecá?

Co Jesús ndačo ngain xan:

—Dantsjeha vidé iná chojni; xonhi nchí ncheyehe; xonhi cosé iná chojni ttehe; ndačoaha cosa ndoaha de iná chojni; <sup>19</sup> ttjiho respeto ngain

ndodá co ngain janná; co rinao cain chojni inchin rinao cuerpoa.

<sup>20</sup> Xanxí mé ndačo xan ngain Jesús:

—Cain yá rrinttaha desde are xa nchín na, ¿quehe xa ditján sinttaha?

<sup>21</sup> Jesús ndačo ngain xan:

—Si jaha rinao sarihi chojni jian ndoa, ttji co nchecji cainxin tti chonda co tonchjeyehe chojni noa tomi, cottimeja ngajni jaha rrochonda cosa icha rentte, cottimeja sihi para sacjin na tti sacji janha.

<sup>22</sup> Pero are xanxí mé coinhi xan yá, anto vechín xan co sacjoi xan ixin anto rico vehe xan.

<sup>23</sup> Cottimeja Jesús ndačo ngain chojni que vacao:

—Atto seguro rrindattjo ra que atto tangui para que chojni rico rrochonda na parte ngain tti tte-tonha Ndodana que ttjen ngajni. <sup>24</sup> Icha tanguiha para ná cocamello sattoxinhi va ttoechjenhe ná nttachiehe manta que para chojni rico rrochonda na parte ngain tti tte-tonha Dios.

<sup>25</sup> Are chojni que vacao Jesús coinhi na yá, anto vinttegoan na admirado co joanchianguihi chó na co ndačo na:

—¿Mexinxin quensen nchao rrochonda iná vida naroaxin remé?

<sup>26</sup> Jesús tavetsjehe ngain na co ndačo:

—Chojni nttihi čhoha sinchehe na jamé, pero Dios nchao sinchehe cainxin.

<sup>27</sup> Cottimeja Pedro ndačo ngain Jesús:

—Janha na cointtoa na cain tti joichonda na, para que jai nchao čhjin na nganji soixin. Mexinxin, ¿quehe rrochonda na janha na?

<sup>28</sup> Jesús ndačo ngain na:

—Atto seguro tti rrindattjo ra, que ngain tti tiempo que tsí, are cainxin rrocjan naroaxin, are mé janha, tti Xí que joixin de ngajni, sarihi ngain tti lugar que chonda gloria, co jaha ra que čhjin na jai cai sintte ra ngain tteyó lugar de joachaxin para que sinchejuzguehe ra tti tteyó grupoe chojni Israel. <sup>29</sup> Co cain chojni que ttinttohe na nchian-doha na, o xanchó na, o ndodé na, o janné na, o čihi na, o xenhe na, o jnguihi na para tenchehe na xana janha, chojni mé sayé na cien nttiha icha tsje co cai sayé na iná vida naroaxin que xonhi tiempo tsjexin. <sup>30</sup> Pero tsje chojni que jai xaxaon na ixin jehe na anto importante na, pero are mé, xonhi rentte na. Co tsje chojni que jai xaxaon na ixin jehe na jeha importante na, pero are mé jehe na nisintte icha importante.

## 20

### *Ejemploe ninchehe xa*

<sup>1</sup> Cai ndačo Jesús:

—Tti ttetonha Dios ngajni, mé inchin joinchehe ná xí que vechonda jie jngui. Xí mé vačhje xa ndoyo para joicjé xa ninchehe xa para sinchehe na xa ngain nttauva. <sup>2</sup> Jehe xí mé ndačo xa ngain na que tsjenguehe xa na hna tti jiquininxin dacha ni ngoi ná nchanho, co jehe na vittoexin na. Mexinxin jehe xa rroanha xa na para ngain jnguihi xa joinchehe na xa. <sup>3</sup> Cottimeja jehe xa vačhje xa iná xa jidacao inchin las nueve co vit-tja xa icanxin chojni ngain ndásin que xonhi xa tenchehe. <sup>4</sup> Jehe xa ndačo xa ngain na: “Cai

jaha ra ttji ra dinchehe ra xana ngain jnguihna, co tsjengaha ra hna inchin jiquininxin.” Co chojni mé vinttecji na. <sup>5</sup> Cottimeja jehe xí mé vačhje xa iná inchin chonguixin co cai iná inchin ní hora tsocjin, co joinchehe xa xajeho. <sup>6</sup> Co inchin naho hora tsocjin cjan vačhje xí mé iná para ngain ndásin, co vittja xa icanxin chojni que xonhi xa tenchehe na cai, co jehe xa ndačo xa ngain na: “¿Quedonda ntthi tate jaha ra ngoixin nchanho co xonhi xa tenchehe ra?” <sup>7</sup> Jehe na vinttendačo na: “Ixin xonhi chojni chjana na xa.” Cottimeja jehe xa ndačo xa ngain na: “Cai jaha ra ttji ra dinchehe ra xana ngain jnguihna, co tsjengaha ra hna inchin jiquininxin.” <sup>8</sup> Co are ondaconttie, jehe xa ndačo xa ngain tti jinda xa mé: “Dayehe cain ninchehe xa co ttjenguehe na hna. Ttexinxin ngain tti chojni que joixinhi después, co ttjaxin ngain tti nijoixinhi icha saho.” <sup>9</sup> Cottimeja vintteconchienhe tti chojni que coexinhi joinchehe xa inchin naho hora tsocjin, co cada na xenguehe na hna lo de ngoixin nchanho. <sup>10</sup> Cottimeja are xenguehe hna tti chojni que joixinhi joinchehe xa icha saho, jehe na xaxaon na que rroxenguehe na hna icha tsje, pero cai xenguehe na hna jehho tti ná nchanho. <sup>11</sup> Are xenguehe na hna tti nijoixinhi joinchehe xa icha saho, jehe na coexinhi na ndačo na ixin jianha joinchehe tti jnguihi. <sup>12</sup> Jehe na ndačo na ngain xinajni mé: “Cain chojni tehe que joinchehe na xa jehho nacoa hora co cjoenguehe na hna xajeho que janha na que jointtaha na xa ngoixin nchanho ngandaohe soa.” <sup>13</sup> Pero jehe xinajni mé ndačo xa ngain ná na:

“Amigo, janha xonhi ni ná cosa jianha rrinttaha nganji ra. ¿Acjoanha na ixin tsjengaha ra hna lo de ná nchanho? <sup>14</sup> Jaxon dayehe tomia co sat-tji. Janha rinaho tsjengá chojni tehe hna xajeho inchin rrittjengaha ra hna jaha ra. <sup>15</sup> ¿Apoco janha chondaha derecho de sinttaha tti janha rinaho ngain tomia? ¿O ani jaha ra tonchjoaha ra ixin janha danjoncoa tomia?” <sup>16</sup> Mexinxin jihi rrocho ixin tti chojni que jai xaxaon na ixin jehe na jaha importante na, pero are mé jehe na nisintte icha importante. Co tti chojni que jai xaxaon na ixin jehe na anto importante na, pero are mé xonhi tsorentte na. Ixin janha nichjá anto tsje chojni pero cainxinha na rinao na na janha.

*Jesús cjan ndacho iná ixin jehe ndasenhe  
(Mr. 10.32-34; Lc. 18.31-34)*

<sup>17</sup> Are Jesús ojittji ngatja nttiha para Jerusalén, jehe joantsjenda tti tteyó chojni que vacao co ndacho ngain na:

<sup>18</sup> —Jaha ra tedicon ra que jaxon satettjin na para Jerusalén. Nttiha janha, tti Xí que joixin de ngajni, sinchecchienhe na na ngain xidána que ttonha ngain icha xidána co ngain ximaestroe ley Israel, co nimé ni rrondacho que ixin janha nasenxon na. <sup>19</sup> Co sanjo na na janha ngain xí de ojé nontte para que nimé tsjanao na na janha, co rroxanguihna na cuarta de roa, co sinchecrucificá na na. Pero ngain nchanho ninxin janha rroxechon na.

*Tti joanchia janné Jacobo co Juan  
(Mr. 10.35-45)*

<sup>20</sup> Cottimeja conchienne ngaca Jesús, janné Jacobo co Juan, cayoi nimé xenhe Zebedeo. Co jehe janné na conixin cayoi jehe na vintteconchienne na ngain Jesús. Co jehe jan vettoxin nttajochjihi jan ngain Jesús para joanchia jan ná joatotsenhe ñao jan ngain Jesús. <sup>21</sup> Jesús ndačo ngain naníta mé:

—¿Quehe rinao?

Naníta ndačo:

—Ttetonha soixin que are soixin tsetonha cainxin cosa, ná de xanhna tehe sehe lado jian de soixin co iná xan sehe xan ngain lado cjon de soixin.

<sup>22</sup> Pero Jesús ndačo ngain Jacobo co Juan:

—Jaha ra noaha ra tti danchia ra. ¿Anchao tsonha ra tti anto tangui que janha tsonna, co anchao ndasenne ra inchin janha ndasenne na?

Jehe na vinttendačo na:

—Ján nchao.

<sup>23</sup> Jesús ndačo ngain na:

—Ján ndoa que jaha ra tangui tsonha ra, co senhe ra inchin janha senhe na, pero de tti sintte ra lado jian na co lado cjon na, jeha janha tti danjo joachaxin mé, sino que Ndodana Ndo nohe quensen sintte nttiha.

<sup>24</sup> Co are tti itte chojni que vacao Jesús coinhi na yá, coñao na ngain Jacobo co Juan. <sup>25</sup> Pero Jesús vayé na, co ndačo ngain na:

—Jaha ra noha ra que cain xí que ttetonha ngain nación, ttetonha xa inchin rinao xa, co cai icha xí que chonda joachaxin nttiha anto ttetonha xa ngain chojni. <sup>26</sup> Pero jeha jamé tsonhe ngayaha jaha ra, sino que tti rinao icha tsetonha ngayaha

ra, pero mé chonda que icha tsjenguijna icha chojni. <sup>27</sup> Co quexeho de jaha ra xo rinao ra icha tsetonha ra, pero cai chonda que sintte ra inchin esclavo para icha chojni. <sup>28</sup> Janhi inchin janha, tti Xí que joixin de ngajni, joiha para que chojni tsjenguijna na janha, sino que janha joihi para joicjenguijna chojni co para que janha sanjo vidana para tsjenga hna tti teca tsje chojni.

*Jesús joinchexingamehe yó tti chejo*  
(Mr. 10.46-52; Lc. 18.35-43)

<sup>29</sup> Are Jesús conixin tti tteyó chojni que vacao vačhjexin na de ciudad de Jericó, anto tsje chojni rroé Jesús. <sup>30</sup> Ngandehe nttiha mé tate yó tti xí chejo, co are vinttequinhi xa que Jesús jidatto nttiha, jehe xa ndačo xa sén:

—¡Soixin, razé David, ttiaconoana ni ra janha na!

<sup>31</sup> Cain chojni que tettji nttiha joinchesattehe na cayoi xí mé para que rrotenco xa, pero jehe xa icha coyao xa co ndačo xa:

—¡Soixin, razé David, ttiaconoana ni ra janha na!

<sup>32</sup> Cottimeja Jesús tavengattjen, co vayé cayoi tti chejo mé co joanchiangui ngain co ndačo:

—¿Quehe rinao ra sinttaha janha nganji ra?

<sup>33</sup> Cayoi tti chejo mé vinttendačo:

—Janha na rinaho na sicon na.

<sup>34</sup> Cottimeja Jesús coiaconoeha cayoi xí mé co cattehe jmacon xa. Co ngain rato mé cayoi tti chejo mé onchao vicon, co cayoi sacjoi conixin Jesús.

## 21

*Jesús joigaha ciudad de Jerusalén*  
(Mr. 11.1-11; Lc. 19.28-40; Jn. 12.12-19)

<sup>1</sup> Are joihi na ngain rajna Betfagé, chiaon ngaca Jerusalén, co ngaca tti jnanchjan que dinhi Nttao-livo, Jesús rroanha yó de tti chojni que vacao. <sup>2</sup> Co ndačo ngain na:

—Ttji ra ngain rajnanchjan jimé. Yá sinchí ra ná colochó jíchó va co nttiha jí colochochjenhe va. Toxindanguehe ra va co sicohna ra cayoi va nttihi. <sup>3</sup> Co si čhonja chojni rrondattjo ra čhonja, jaha ra ndache ra que ximaestrosa ra rrongondehe xa va co toin sicán ra va iná.

<sup>4</sup> Jihi conhe para que joiconhe tti dindačo profeta are diquentaxin janhi:

<sup>5</sup> Ndache ra ciudad de Jerusalén:

“Tsjenxin, tti Rey de jaha joí nganji, co jehe joí inchin ná chojni que jeha importante, co jitaha ná colochó,  
que mé colochochjan nchín, xenhe ná colochó que otame va.”

<sup>6</sup> Cottimeja cayoi chojni mé sacjoi na co joinchehe na inchin coetonha Jesús. <sup>7</sup> Joiaho na colochó mé conixin xenhe va, co manta que tetsá na cjoajinhi na colochochjan para Jesús vetaha va. <sup>8</sup> Co tti anto tsje chojni que joichonhe na Jesús, toha na coingo na ngá nttiha tti manta que tetsá na, co icanxin na cončhinji na ramé nttá para coingo na ngá nttiha. <sup>9</sup> Co cain chojni que tetaon nttiha co cain chojni que terroé coexinhi na ndačo na:

—¡Gloria para ixin xí jihi ixin jehe xa razé rey David co chonda xa joachaxin que vechonda rey David! ¡Anto jian jehe tti joí conixin nombré Dios! ¡Gloria ngain Dios!

<sup>10</sup> Are Jesús joixinhi ciudad de Jerusalén, cainxin chojni que te nttiha xatte na ngain ixin anto ché na, co tsje na joanchiangui na co ndačo na:

—¿Quensen jiji?

<sup>11</sup> Co icha chojni ndačo na:

—Jiji tti profeta que dinhi Jesús, tti joixin de ngain rajna Nazaret ngain nonttehe Galilea.

*Jesús joincheroa nihngo icha importante*

*(Mr. 11.15-19; Lc. 19.45-48; Jn. 2.13-22)*

<sup>12</sup> Después Jesús joixinhi patioe nihngo icha importante para ixin Dios, co nttiha vengui cain chojni que tettehna co tenchecji. Concjamangui cain mesé tti chojni que tedasinguixinhi icha chojni tomi para rrochondaxin na suelto, co concjangan-gui nttaxintaoen cain nitenchecji conttoanajni.

<sup>13</sup> Co ndačo ngain na:

—Ngain tti jitaxin Palabré Dios jindačo: “Nchiania sehe nchia para sinchecoanxinna na janha”, pero jaha ra ndadinchecjjan ra nchia ná lugar tti xatte xichehe.

<sup>14</sup> Co nttiha ngain nihngo mé canxion tti chejo co canxion tti rrengo conchienne na ngain Jesús, co Jesús joinchexingamehe cain chojni mé. <sup>15</sup> Pero xidána que vaquetonha ngain cain icha xidána co ximaestroey ley Israel are vintteguicon xa cain milagro que jehe Jesús jinchehe co are vinttequinhi xa quexén cain chjan ngaxinhi nihngo ndačo xan sén: “¡Gloria para ixin xí jiji ixin jehe xa razé rey David co chonda xa joachaxin que vechonda rey David!” Are vinttequinhi xa yá vinttegoñao xa

<sup>16</sup> co vinttendačo xa ngain Jesús:

—¿Arrittinhi tti tendačo chjan taha?

Co Jesús ndačho ngain xa:

—Ján, rrittian. Pero jaha ra ¿aša tsjeha ra ngain tti jítaxin Palabré Dios? Nttiha jítaxin de ixin jihi ixin ndačho janhi:

Dios joinchecoenhe cain chjan hasta xan nandá toncjihí para nchesayehe xan jehe jian.

<sup>17</sup> Cottimeja jehe xa nttiha vintteguittohe xa co Jesús sacjoixin de ngain ciudad de Jerusalén co sacjoi para ngain rajna Betania co nttiha vattoxin ttie mé.

*Are Jesús nichja ngain nttahigo que xonhi ttochjoin jiyá*

*(Mr. 11.12-14, 20-26)*

<sup>18</sup> Ndoexin dacao are Jesús cjan para ngain Jerusalén iná, jehe venhe jintta. <sup>19</sup> Ngandehe nttiha mé Jesús vicon ná nttahigo co jehe conchienhe ngain ntta, pero xonhi ttochjoin vittja ngain ntta, jehó qué ntta chonda ntta. Cottimeja Jesús ndačho ngain ntta:

—¡Xonhi tiempo jaha rrocjan sinchechjian ttochjoin!

Co ngain rato mé ndaxema nttahigo mé. <sup>20</sup> Are chojni que vacao Jesús vicon na yá, vinttegoan na admirado, co joanchiangui na ngain Jesús co ndačho na:

—¿Quexén ndaxemanxin nttahigo yá anto daca?

<sup>21</sup> Jesús ndačho ngain na:

—Atto seguro tti rrindattjo ra que si seguro ditticaon ra co xaxaonha ra que ixin čhoha tsonhe, jeoha sinchehe ra jihi, tti janha jointtaha ngain nttahigo yá, sino que jaha ra nchao rrondache ra jna jiha: “Sattjixin de yá co digaritsiahngui

ndachaon”, co jamé tsonhe. <sup>22</sup> Co cain tti sanchia ra ngain Dios, co si ditticaon ra que sayehe ra, ján sayehe ra.

*Tti joachaxin que chonda Jesús*

*(Mr. 11.27-33; Lc. 20.1-8)*

<sup>23</sup> Cottimeja Jesús joixinhi ngaxinhi tti nihngo icha importante, co are jehe jindache cain chojni nttiha de ixin Dios, conchienne ngain jehe canxion xidána que vaquetonha ngain cain icha xidána conixin icanxin xittetonha ngain nihngo mé, co vinttejanghanguí xa ngain Jesús co ndačo xa:

—¿Quehe joachaxin chonda jaha para nchehe cain cosa jihi? ¿Quensen chjá joachaxin jihi?

<sup>24</sup> Jesús ndačo ngain xa:

—Janha cai sanchianguiha ra ná cosa jaha ra, co si jaha ra rrondachjenji ni ra tti janha sanchianguiha ra, cottimeja janha rrondattjo ra quexehe joachaxin nttaxin janha cain cosa jihi. <sup>25</sup> ¿Quensen rroanha Juan para joincheguitte chojni? ¿A Dios, o ani chojni?

Cottimeja coexinhi xa joanchianguihi chó xa co ndačo xa:

—Si rrondačo na que Dios tti rroanha Juan, xí jihi nchao rrondattjo na xa: “¿Quedonda vitticaonha ra remé?” <sup>26</sup> Co si rrondačo na que chojni tti rroanha Juan, pero ján na xagoen na chojni ixin cainxin chojni ditticaon na que Juan vanichja joajna que vagayé de ngain Dios.

<sup>27</sup> Co mexinxin vinttendačoxin xa ngain Jesús:

—Nonaha na.

Cottimeja Jesús ndačo ngain xa:

—Mexinxin ni janha rrondattjoha ra cai quexehe joachaxin nttaxin janha cain cosa jihi.

### *Ejemploe tti yó xanxí*

<sup>28</sup> Jesús ndačo ngain xa:

—¿Quexén xaxaon ra de ixin ejemplo jihi? Ná xí vechonda xa yó xenhe xa xanxí, co ndache xa xansaho: “Ttji jai dinchehe xa ngain nttauva.”

<sup>29</sup> Co jehe xan ndačo xan: “Rinaoha tsji.” Pero después xaxaon xan ojé co ján, cjoí xan joinchehe xan xa. <sup>30</sup> Cottimeja tti xí mé joitsjehe xanyoxin co ndačo xa xajeho ngain xan mé, co xan mé ndačo xan: “Ján tsji.” Pero jehe xan cjoíha xan. <sup>31</sup> ¿Quexehe de cayoi xan joinchehe xan inchin joinao ndodé xan?

Jehe xa vinttendačo xa:

—Xansaho.

Cottimeja Jesús ndačo ngain xa:

—Atto seguro tti rrindattjo ra, que cain xicobrador de impuesto, co cain nchí que vanchecji cuerpoe ngain icha xí, nimé ni icha saho rrochonda parte ngain tti ttetonha Dios que jaha ra. <sup>32</sup> Ixin Juan, tti vancheguitte chojni, jehe joí para joindattjo ra quexén chonda ra que sintte ra ngain vidá ra, co jaha ra vitticaonha ra tti ndačo jehe Juan. Pero xicobrador de impuesto co nchí que vanchecji cuerpoe ngain icha xí, cain nimé vitticaon na tti ndačo Juan. Pero jaha ra masqui vicon ra jamé, coentoxinha ra vidá ra para rroguitticaon ra tti ndačo Juan.

### *Ejemploe ninchehe xa jianha*

(Mr. 12.1-12; Lc. 20.9-19)

<sup>33</sup> Ttinhí ra iná ejemplo jihi: Ná tti vechonda jie jngui ngoixin jngui cjoenga nttauva co ngoixin jngui coendanji cerco, co joinchechjian ná tanque

tti vagueninxin na ttouva, co joinchechjian ná torre para siconxin tti senda ngoixin jngui de nttattochjoin mé.

'Cottimeja tti xí mé joanjo xa nttattochjoin media ngain canxion tti nchehe ꝥa co jehe xa sacjoi xa cjin. <sup>34</sup> Co are ojoí tiempo de cosecha, jehe xí mé rroanha xa canxion ninchehe ꝥé xa ngain tti nicoá nttattochjoin media para joiganchia na tti parte de cosecha que jiquininxin sayé xinajni mé. <sup>35</sup> Pero jehe tti nicoá nttattochjoin media tse na jehe tti ninchehe ꝥé xinajni mé; ná coaxin na nttá, ná nagoenxon na, co iná coaxin na ꝥo. <sup>36</sup> Jehe xinajni mé cjan rroanha icha tsje ninchehe ꝥé iná para joiganchia na tti parte de cosecha que jiquininxin sayé xinajni. Pero jehe tti nicoá nttattochjoin mé media, cjoaya na iná, co joinchehe na ꝥajeho inchin joinchehe na ngain tti nicjoi icha saho.

<sup>37</sup> Ultimo jehe xinajni mé rroanha xenhe xanxí, ixin jehe ꝥaxaon: “Chonda na que sicao na respeto ngain xanhna.” <sup>38</sup> Pero are vicon tti nicoá nttattochjoin media que joihi xenhe jehe xinajni, jehe na ndache chó na: “Jihi tti sayé ngoi nontte jihhi de nttattochjoin. Nasoenxon na jehe para que ján na sittoá na ngoixin jngui de nttattochjoin.” <sup>39</sup> Co jamé joinchehe na; tse na xan, joantsjegaxin na xan de ngain nttattochjoin mé co nagoenxon na xan.

<sup>40</sup> Cottimeja Jesús joanchiangui ngain xa co ndačo:

—Are tsí tti jnguihi mé, ꝥquehe sinchehe ngain tti nicoá nttattochjoin mé media?

<sup>41</sup> Jehe xa vinttendačo xa:

—Jehe xinajni mé sincheniha xa para nasoenxon xa cain tti nchehe xa jianha que coá nttattochjoin media co jehe sanjo nttattochjoín media ngain ojé chojni, que sanjo na ngain jian tiempo tti parte de cosecha que jiquininxin sayé xinajni.

<sup>42</sup> Cottimeja Jesús ndačo ngain xa:

—¿Axonhi tiempo tsjehe ra jaha ra tti jitaxin Palabré Dios? Ndačo janhi:

Tti xo que joinchegondaha xittette nchia, pero xo mé tti xo joiguehe esquiné nchia.

Co jiji joinchehe Dios,

co para ixin ján na cosa jiji anto chjoin.

<sup>43</sup> Mexinxin janha ndattjo ra que jaha ra sachjaha ra parte ngain tti ttetonha Dios, co sayé tti chojni que sinchehe inchin jiquininxin ngain tti ttetonha Dios. <sup>44</sup> Co para tti xo que rrindattjo ra, quexeho chojni que tsonntenguixin xo jiji, tsonchjian pedazo cuerpoe na. Co si xo jiji setsinga xo ngataha quexeho chojni, rrocjan cuerpoe chojni mé polvo.

<sup>45</sup> Are cain xidána que vaquetonha ngain icha xidána co cain xifariseo vinttequinhi xa cain ejemplo que ndačo Jesús, coinxin xa que ixin jinichja de ixin jehe xa. <sup>46</sup> Mexinxin joínao xa are mé rrotse xa Jesús, pero xa joincheha xa ixin xagoen xa chojni que te nttiha ixin cain chojni vaguitticaon na que Jesús vanichja palabré Dios.

## 22

*Ejemploe tti quiai are tottehe na*

<sup>1</sup> Jesús coexinhi ndaĉho iná ngain na de ixin ejemplo, co ndaĉho:

<sup>2</sup> —Tti ttetonha Dios ngajni, mé inchin joinchehe ná rey que coín ná vandango are cottehe xitsihi. <sup>3</sup> Jehe rey mé coetonhe cain xinchehe xé para joindache xa cain chojni que ovinnte invitado para sijine na ngain vandango mé, pero cain chojni mé ĉho na cjoí na. <sup>4</sup> Jehe rey mé cjan rroanha icha ninchehe xé, co ndaĉho ngain na: “Ndache ra cain chojni que ote invitado que otsí na sine na ixin onchao jí comida. Ndache ra na ixin janha ocoetonha para venhe coxinttahná co cain coxigo que janha jointtantao, co cainxin onchao jí. Ndache ra na que tsí na ngain vandango jihi.” <sup>5</sup> Pero cain tti chojni que ovinnte invitado ĉho na cjoí na. Ná de jehe na sacjoí na ngataon jnguihi na, co iná na ngain negocioe na, <sup>6</sup> co icanxin na tse na jehe ninchehe xé rey mé, co feo joinchehe na ngain na hasta nagoenxon na na. <sup>7</sup> Cottimeja rey mé anto coñao, co rroanha cain xisoldadoe para nagoenxon xa cain jehe tti chojni que cjoaya co cjoaga xa rajné na. <sup>8</sup> Cottimeja ndaĉho rey mé ngain ninchehe xé: “Vandango onchao jí, pero cain chojni que jointtainvitá rrojine na tequininxinha na para rroquí na. <sup>9</sup> Jai ttji ngain cain nttiha yeye co ndache ra cain chojni que setan ra que tsí na sine na.” <sup>10</sup> Cain ninchehe xé rey mé vaĉhje na ngain cain nttiha, co joatse na cain chojni que vetan na, tti jian co tti jianha; co jamé hasta caon nchia mé de chojni.

<sup>11</sup> Cottimeja jehe rey mé joixinhi para joitsjehe

cain chojni que tejine, co jehe vicon nttiha ná xí, pero diguitoxinha xa inchin ná chojni que tti ngain ná vandango. <sup>12</sup> Jehe rey ndačo ngain tti xí mé: “Amigo, ¿quedonda joixinxin jaha nttihi que ditoxinha para ngain vandango jihí?” Pero jehe tti mé tencoa. <sup>13</sup> Cottimeja rey mé ndačo ngain tti nitedayá láto ngain mesa: “Ttia ra xí yá de rotté xa co de rá xa co diganca ra xa ndoja ngain tti naxin xehe tti rrotsjanga xa co sinetaon neno xa.” <sup>14</sup> Ixin janha nichjá anto tsje chojni, pero cainxinha na rinao na na janha.

*Tti rroxenga hna ngain impuesto  
(Mr. 12.13-17; Lc. 20.20-26)*

<sup>15</sup> Cottimeja xifariseo savinttecji xa, co vinttecjao chó xa quexén sinchehe xa para sinchenichja xa Jesús ná cosa nchaoha para mé tsjanguixin xa Jesús. <sup>16</sup> Mexinxin rroanha xa canxion chojni xa, conixin canxion chojni Herodes para joindačo na ngain Jesús:

—Maestro, janha na nona na que soixin ndačo tti ndoa, co soixin ndoa nchecoenhe chojni de ixin Dios, co ncheha caso tti nichja icha chojni ixin soixin ncheha juzgado chojni rico ojé que chojni noa. <sup>17</sup> Ndachjenji ni ra: ¿Anchao jí tsjenga na hna impuesto ngain xiemperador, o ani nahi?

<sup>18</sup> Pero Jesús oconohe de tti jianha que jehe xa teřaxaon xa de ixin jehe, co jehe ndačo ngain xa:

—¡Jaha ra řo ncheha ra tti ndačo ra! ¿Quedonda rinao ra sincheyana ra? <sup>19</sup> Tjagohna ra ná tomi que ttjengaxin ra hna impuesto.

Co jehe na cjoagoe na Jesús ná tomi de plata que vanchegonda chojni tiempo mé. <sup>20</sup> Are vícon Jesús tomi mé joanchiangui ngain na co ndačo:

—¿Quensen con jinganito jihi, co quensen nombré jitaxin jihi?

<sup>21</sup> Jehe xa vinttendačo xa:

—Con xiemperador co nombré xa.

Cottimeja Jesús ndačo ngain xa:

—Chjehe ra xiemperador tti jiquininxin xa co danjo ra ngain Dios tti jiquininxin sayé jehe.

<sup>22</sup> Are vinttequinhi xa jihi, jehe xa vinttegoan xa admirado; co nttiha cointtohe xa Jesús co jehe xa savinttecji xa.

*Canxion chojni joanchiangui queXén tti rroxechon ni*

*(Mr. 12.18-27; Lc. 20.27-40)*

<sup>23</sup> Ngain nchanho mé canxion xisaduceo cjoí xa para joitsjehe xa Jesús. Xisaduceo vaguitticaon xa que chojni que ndadenhe irroxechonha na; mexinxin joanchiangui xa ngain Jesús co ndačo xa:

<sup>24</sup> —Maestro, ley que vayé Moisés jitaxin que si ná xí que jicao xa čihi xa ndasenhe xa co xonhi chjan tsinttohe xa, chonda que ná xanchó xa xanxí secoo nčhiganha mé co rrochonda na chjan para que chjan mé sehe xan inchin xenhe tti ndavenhe. <sup>25</sup> Nttihi ngayehna janha na vintte yáto xanxí, cain xanchó xan. Xansaho vecao xan čihi xan pero ndavenhe xan, co ixin xonhi chjan cointtohe xan, nčhiganha mé vecao nča xanchó tti ndavenhe, xanyoxin. <sup>26</sup> Xajeho jamé conhe ngain xanyoxin cai, co después vecao nča xanninxin, pero xajeho jamé conhe, co hasta vecao nča tti

xanyatoxin co xonhi chjan joichonda ncha. <sup>27</sup> Co después de cain mé, cai jehe ncha ndavenhe ncha. <sup>28</sup> Mexinxin ndachjenji ni ra, are rroxechon cain ni yá, ¿quexehe de tti yáto xanchó mé sehe mero xixihi jehe nchí mé ixin cain xan vinttecao xan xajeho nchí mé?

<sup>29</sup> Jesús ndacho:

—Jaha ra noaha ra quehe tendacho ra ixin noaha ra tti jitaxin ngain Palabré Dios, ni noaha ra tti joachaxin que chonda Dios. <sup>30</sup> Ixin cain chojni que ondavenhe, are rroxechon na, isinttecaoha chó na de xí co ni de nchí, ixin are mé sintte na inchin cain ángel de Dios que te ngajni. <sup>31</sup> Pero de tti jaha ra danchianguina ra de ixin tti chojni que ndadenhe, ¿atsjeha jaha ra tti jindattjo ra Dios mismo? Jehe dindacho janhi: <sup>32</sup> “Janha tti Dios de Abraham co Isaac co Jacob.” Dios jeha Dios de tti nindadiguenhe, sino que Dios de chojni que techon.

<sup>33</sup> Cain chojni que te nttiha, are vinttequinhi na yá, cain na vinttegoan na admirado de ixin tti nichja Jesús.

### *Tti icha importante que ttetonha Dios*

*(Mr. 12.28-34)*

<sup>34</sup> Are xifariseo conohe xa que Jesús nda-joinchetencoa xisaduceo, jehe xifariseo xatte xa ngain Jesús. <sup>35</sup> Co ná de jehe xa que vehe xa maestroe ley Israel joinao xa rrojinchenichja xa Jesús ná cosa nchaoha; mexinxin joanchiangui xa ngain Jesús co ndacho xa:

<sup>36</sup> —Maestro, ¿quexehe tti icha importante que ttetonha Dios sinchehe ni?

<sup>37</sup> Jesús ndacho:

—“Rinao Dios, ngain ansean, conixin ngain almá, conixin ngain joarrixaoan.” <sup>38</sup> Jihi tti icha importante, co tti saho que ttetonha Dios sinchehe ni. <sup>39</sup> Co tti yoxin chiaon xajeho ixin ndačo: “Rinao cain chojni inchin rinao cuerpoa.” <sup>40</sup> Jehe cayoi cosa yá tti icha importante de ngain ley que vayé Moisés co de cain tti ndačo cain profeté Dios.

*Tti dindačo David de ixin Jesucristo  
(Mr. 12.35-37; Lc. 20.41-44)*

<sup>41</sup> Are cain xifariseo xa tate xa nttiha, <sup>42</sup> Jesús joanchiangui ngain xa co ndačo:

—¿Quehe xaxaon ra de ixin Cristo? ¿Quensen mé? Jehe xa vinttendačo xa:

—Mé tsixin de ngain razé rey David.

<sup>43</sup> Cottimeja ndačo Jesús:

—Mexinxin ¿quedonda Espíritu Santo joinchenichja David, co David joincheguinihi Cristo, soixin? Ixin David dindačo:

<sup>44</sup> Tti Ttetonha cainxin cosa ndačo ngain tti Ttetonna janha:

“Darihi ngain lado jian na hasta que janha sinttagacha jaha de ngain cain tti ningaonha.”

<sup>45</sup> Mexinxin, ¿queén que Cristo jehe ná xanntí David si jehe David mismo ndačo que Cristo tti ttetonha ngain jehe?

<sup>46</sup> Co ni ná xa ixonhi ndačo xa ngain Jesús, co desde ngain nchanho mé ni ná xa ixonhi joanchianguihi xa Jesús.

## 23

*Jesús joinchesattehe xifariseo co ximaestroe ley  
(Mr. 12.38-40; Lc. 11.37-54; 20.45-47)*

<sup>1</sup> Cottimeja Jesús ndaĉho ngain cain chojni que te nttiha co ngain chojni que vacao:

<sup>2</sup>—Cain ximaestroe ley Israel co cain xifariseo chonda xa joachaxin de nchecoenhe xa chojni cain tti coetonha ley que vayé Moisés. <sup>3</sup> Mexinxin jaha ra ditticaon ra co nchehe ra cain tti rrondattjo ra xa, pero ncheha ra inchin jehe xa tenchehe xa ixin jehe xa dinttendaĉho xa ná cosa co dinttenchehe xa ojé. <sup>4</sup> Ndache xa chojni que sinchehe na tti anto tangui que jehe xa ttetonha xa, que ni jehe xa ĉhoĉa ni rinaoĉa xa nchehe xa cain mé.

<sup>5</sup> Jehe xa nchehe xa cosa jian pero jeho para que icha chojni dicon, co para xaxaon na que jehe xa anto jian xa. Co jehe xa ttianito xa nttattjen xa co rá xa cajachjan de roa tti jingá rioho xón que jixaxin canxion parte de Palabré Dios, co dinttengá xa lontto icha jinjini que icha chojni. <sup>6</sup> Co anto nchexoxinhi xa ttji xa ngain vandango co dintte xa ngain tti lugar icha importante. Co are dinttecji xa ngain nihngo dintte xa ngain nttaxintaon icha importante. <sup>7</sup> Co are rridintte xa ngain nttiha, rinao xa que chojni sanjo na joajna ngain xa conixin anto tsje respeto, co sincheguinha na xa maestro.

<sup>8</sup> 'Pero jaha ra dittoaxinha ra que chojni sinttaguinhi ra na maestro, ixin cain jaha ra inchin chó ra cainxin ra co chonda ra jeho nacoaxinxon Maestro, que mé Cristo. <sup>9</sup> Co nttihi ngataha nontte ni ná chojni ncheguinha ra padre, ixin chonda ra jeho nacoaxinxon Ndodá ra que ttjen ngajni. <sup>10</sup> Ni

dittoaxinha ra que chojni rronhattjo ra na ixin jaha ra anto importante ra ixin Cristo jehó mé tti icha importante para ixin jaha ra. <sup>11</sup> Tti chojni que ttjenguijna icha chojni, mé tti icha importante de cain jaha ra. <sup>12</sup> Ixin tti chojni que tonóhe ixin jehe tti anto importante, mé settoxin nttajochjihi nganji ra co tti chojni que jai tonóhe que jehe jaha importante, chojni mé tti sehe icha importante.

<sup>13</sup> 'iPobre de jaha ra, ximaestroey ley co jaha ra chojni fariseo, xo ncheha ra tti ndačo ra! Ixin jaha ra tecayacoenhe ra chojni para que jehe na čoha rrochonda na parte ngain tti ttetonha Dios que ttjen ngajni. Ni jaha ra mismo rinaoha ra rrochonda ra parte ngain tti ttetonha Dios, ni tančjandaha ra icha chojni para rrochonda na parte nttiha.

<sup>14</sup> 'iPobre de jaha ra, ximaestroey ley co jaha ra chojni fariseo, xo ncheha ra tti ndačo ra! Ixin jaha ra dantsjehe ra nchiandoha nčhiganha ixin ittixinha nča ttjenga nča hna contribución, cottimeja para que xonhi chojni rroxaxaon tti jaha ra tenchehe ra, anto sé ncheoanxinhi ra Dios. Mexinxin jaha ra sayehe ra icha jie castigo que icha chojni.

<sup>15</sup> 'iPobre de jaha ra ximaestroey ley co jaha ra chojni fariseo, xo ncheha ra tti ndačo ra! Ixin jaha ra anto ttingaria ra para que ttjé ra chojni que sitticaon xajeho inchin jaha ra co are odinchí ra chojni mé, masqui jehó nacoa, jaha ra nchenchehe ra chojni mé cosa que jiquininxinha para que jehe icha jiquininxin tsji ngain infierno que jaha ra mismo.

16 '¡Pobre de jaha ra, xo tenchecanttjen ra icha chojni que noeha. Ixin ndačo ra que are ná chojni ndačo sinchehe ná cosa, co sinchejurá de ixin ningoe Dios, juramento mé xonhi xé; pero si sinchejurá de ixin tti oro que jixinhi nihngo, juramento mé nchoe jian. 17 ¡Jaha ra tonto ra co chejo ra! ¿Quexehe tti icha importante, aoro o nihngo que jinchejian oro mé? 18 Co cai ndačo ra que are ná chojni ndačo sinchehe ná cosa, co sinchejurá de ixin altar que jixinhi nihngo, juramento mé xonhi xé; pero si sinchejurá de ixin cain tti jí ngataha altar, juramento mé ján jian. 19 ¡Jaha ra tonto ra co chejo ra! ¿Quexehe tti icha importante, a tti jí ngataha altar o jehe altar que jinchejian cain cosa mé? 20 Ixin tti chojni que nchejurá de ixin altar, chojni mé jinchejuraha de ixin jeho altar, sino que de ixin cain cosa que jí ngataha. 21 Co tti chojni que nchejurá de ixin nihngo, chojni mé jinchejuraha de ixin jeho nihngo, sino que cai de ixin Dios que jí ngaxinhi nttiha. 22 Cai tti chojni que nchejurá de ixin ngajni, chojni mé cai jinchejurá de ixin tti jitaha Dios co cai de ixin jehe Dios mismo, ixin jehe tti jí nttiha.

23 '¡Pobre de jaha ra ximaestroe ley co jaha ra chojni fariseo, xo ncheha ra tti ndačo ra! Jaha ra danjo ra para ixin Dios tti ttexin parte de ca inchin cañanchoni, co de anís, co de comino, pero ncheha ra tti icha importante de cain tti coetonha Dios, inchin de tti sinchehe ra jian ngain vidá ra, co tti tsiaconoehe ra icha chojni, co tti sitticaon ra jian de ixin Dios. Cain yá tti chonda ra que sinchehe ra cain nchanho, co cai nchehe ra sigue danjo ra

tti ttexin parte de ca mé. <sup>24</sup> ¡Jaha ra tenchecanttjen ra icha chojni que noeha! ¡Jaha ra nchecanguihi ra ná coxisenchjan de ngain vasoa ra pero dinga ra nchejio ná cocamello!

<sup>25</sup> ¡Pobre de jaha ra ximaestroe ley co jaha ra chojni fariseo, ŋo ncheha ra tti ndaĉho ra! Jaha ra inchin vaso co láto que chojni ncheroa de ngama, pero de ngaxinhi ansean ra anto ttjoaha ra ixin ŋa teca ra de cain cosa que diquehe ra co de puro rinao ra que jaho ra rrochonda ra cainxin cosa. <sup>26</sup> Jaha ra ŋo fariseo chejo. Saho ncheroa ra ansean ra co jamé cai tsoroa ngama ra, inchin nchehe ra ngain vaso co láto.

<sup>27</sup> ¡Pobre de jaha ra, ximaestroe ley co jaha ra chojni fariseo, ŋo ncheha ra tti ndaĉho ra! Ixin jaha ra inchin cueva tti texinhi cuerpoe chojni que ndadiguenhe ixin cueva mé ĉhjoin te ixin diguinxin nttéso ndojaxin, pero ngaxinxin tecaon de loroe chojni co cain cosa que ttjoaha. <sup>28</sup> Jamé te ra jaha ra; de ndojaxin ŋago ra ixin jian ra ngain chojni, pero de ngaxinhi ansean ra tecaon ra de cosa jianha.

<sup>29</sup> ¡Pobre de jaha ra ximaestroe ley co jaha ra chojni fariseo, ŋo ncheha ra tti ndaĉho ra! Ixin jaha ra nchechjian ra monumento anto ĉhjoin ngataha tti teŋavá cuerpoe cain profeta que ndavenhe are saho co nchetsonji ra monumento cain tti chojni que cjoi jian. <sup>30</sup> Cottimeja ndaĉho ra: “Si janha na rroguinttechon na ngain tti tiempo que vinttechon nindogoelitoa na ŋanĉhjen, janha na rrocjenguijnaha na na para narrogoenxon na cain profeta que goen jehe na.” <sup>31</sup> Conixin yá jaha ra

mismo datsoan ra que jaha ra xanntí tti chojni que nagoenxon cain profeta que venhe. <sup>32</sup> ¡Janché jaha ra nchejexin ra tti coexinxin joinchehe nindogoelitoa ra xančhjen!

<sup>33</sup> ¡Jaha ra te ra inchin conché, co inchin razé conché ra! Jaha ra chonda ra que tsji ra ngain infierno. <sup>34</sup> Mexinxin janha rrorroanha profeta nganji ra, co xí que Espíritu Santo joinchenohe, co xí que sinttacoanha ra de ixin Dios. Pero jaha ra nasoenxon ra na co sinchecrucificá ra canxion na co icanxin na rroxanguihi ra na nttá o tton ngaxinhi nihngo, co rrorroehe ra na de rajna co rajna ngoi tti jehe na sacji na para feo sinchehe ra ngain na. <sup>35</sup> Mexinxin jaha ra tti teca ra vidé cainxin chojni jian que vintteguenhe, desde Abel, tti cjoí xí jian para ngain Dios, hasta Zacarías, xenhe Berequías tti nindogoelitoa ra nagoenxon na ngain lugar entre nihngo co altar. <sup>36</sup> Atto seguro tti janha rrindattjo ra, que cain chojni judío que techon jai, nijihi, niteca cain yá.

*Jesús tsjanga por ixin Jerusalén  
(Lc. 13.34-35)*

<sup>37</sup> Cottimeja ndačo Jesús iná:

—¡Chojni de Jerusalén, jaha ra que nadoenxon ra profeté Dios co xanguihi ra xo tti chojni que ttiaho joajna que Dios rroanha nganji ra; anto tsje nttiha janha joinaho rrogatse ra inchin ná cochia datse va xenhe va nganguihi nenehe va, pero jaha ra joinaoha ra! <sup>38</sup> Tsjenxin ra; nchiandoi ra ndasit-tohe nchia jeho nchia, <sup>39</sup> ixin janha rrindattjo ra que irrocjanha ra sicon ni ra janha hasta que tsija

tti tiempo que jaha ra rrondaço ra: “Anto jian tti joí de ngain nombré Dios.”

## 24

*Jesús ndaço que nihngo icha importante rroxantte*

*(Mr. 13.1-2; Lc. 21.5-6)*

<sup>1</sup> Jesús vaçhjexin de nihngo icha importante co sajittji are chojni que vacao conchienne na ngain co ndaço na ixin rrotsjehe Jesús ngoixin nihngo mé. <sup>2</sup> Pero Jesús ndaço ngain na:

—¿Adicon jaha ra cain yá? Atto seguro tti rrindattjo ra que yá sittoeha ni ná ðo ngataha iná ðo; cainxin rroxantte.

*Quehe tsonhe icha saho que mundo ndatsjexin*

*(Mr. 13.3-23; Lc. 21.7-24; 17.22-24)*

<sup>3</sup> Cottimeja savinttecji na ngain tti jnanchjan que dinhi Nttaolivo, co are Jesús tavehe nttiha, chojni que vacao conchienne na co joindaço na ngain jimaio:

—Rinahó na que rrondachjenji ni ra quesá tsonhe yá, ¿Quehe señá rroçago are soixin rrocjan sihi iná, co are ondatsjexin mundo jihi?

<sup>4</sup> Cottimeja Jesús ndaço ngain na:

—Ttjiho ra cuidado que ðonhi chojni sinttayaha ra. <sup>5</sup> Ixin atto tsje chojni tsí co sinchegonda na nombrena rrondaço na: “Janha tti Cristo na”; co sincheyehe na tsje chojni. <sup>6</sup> Jaha ra tsinhi ra que sehe guerra nttihi co ngain icha lugar, pero ðaonha ra ixin jamé chonda que tsonhe; pero ða jeha tti nchanho que ndatsjexin mundo. <sup>7</sup> Ixin ná

nación tsetocaho iná nación, co ná región tsetocaho iná región. Co ngain tsje parte de nontte sehe jintta, co chin, co tsingui nontte. <sup>8</sup> Cain yá nandá tsexinxin tsonhe tti anto tanguí que tsonhe chojni.

<sup>9</sup> 'Cottimeja sinttachienhe ra na jaha ra ngain chojni que ningaconha ra para feo sinchehe na nganji ra, co nasoenxon na jaha ra, co ngoixin mundo rroningaconha ra chojni ixin ditticaon ni ra janha. <sup>10</sup> Ngain tiempo mé tsje chojni isincheha na sigue sitticaon na nganji na janha co rroningaconhe chó na co jehó na sinchechienhe chó na ngain tti ningaconna janha. <sup>11</sup> Are mé tsononxin tsje tti rronichja cosa ndoaha, co jehe na rrondačo na que jehe na tenichja na joajné Dios, co sincheyehe na tsje chojni. <sup>12</sup> Co anto tsje cosa jianha sehe, que hasta tsje chojni isinaoha chó na. <sup>13</sup> Pero tti chojni que sinchehe sigue sitticaon na janha hasta ndasenhe, chojni mé rrochonda iná vida naroaxin. <sup>14</sup> Co tti jian joajna de quežén ttetonha Dios, jiji tsonohe chojni ngoixin mundo para que chojni ngain cainxin nación tsonohe na tti jian joajna jiji. Are tsjexin cain yá, cottimeja ndasitján mundo jiji.

<sup>15</sup> 'Profeta Daniel diquentaxin de ixin tti cosa que icha jianha de cainxin cosa. Co are jaha ra sicon ra que cosa mé siguehe ngain tti lugar santo de ngain nihngo icha importante, (tti tsjehe xón jiji chonda que tsinxin), <sup>16</sup> cottimeja tti chojni que te Judea rrochonda na que satsinga na ngagaha jna. <sup>17</sup> Co tti sintte ngataha techoe nchiandoha, are jehe sania, rrochjeha tiempo para sicao cosé de ngaxinhi nchia ixin anto daca satsinga. <sup>18</sup> Co

tti sintte ngataon jngui, chondaha que rrocjan ni para sirroé lonttoe ngain nchiandoha. <sup>19</sup> ¡Pobre de cain nchí que sintteyá chjan co cain nchí que rrochonda chjan que tetai ngain nchanho mé! <sup>20</sup> Nchetsenhe ra ñao Dios que jaha ra rrochondaha ra que satsinga ra mero ngain tiempoe quin, ni ngain tti nchanho que nchejogaha ni, <sup>21</sup> ixin are mé anto tangui tsonhe, que xa xonhi tiempo tonhe jamé ni desde are coexinhi vehe nontte jihi, ni tsonhe después. <sup>22</sup> Co si Dios rrojinchenchinha tiempo mé, xonhi chojni rroxehé, pero Dios sinchenchín tiempo mé ixin jehe anto rinao cain tti chojni que jehe coinchiehe.

<sup>23</sup> Si are mé chonja chojni rrondattjo ra: “Nttihi jí Cristo”, o “Nojiha jí”, jaha ra ditticaonha ra. <sup>24</sup> Ixin are mé tsí tsje chojni que sincheyehe tsje chojni ixin rrondačo na que jehe na ni Cristo co tsí chojni que rrondačo ixin jehe na dayé na joajné Dios. Co sinchehe na tsje señal co milagro para sincheyexin na tsje chojni, co si nchao hasta tti chojni que Dios mismo coinchiehe sincheyehe na. <sup>25</sup> Janha ondattjo ra cain yá desde jaxon. <sup>26</sup> Mexinxin si rrondattjo ra na: “Cristo cjan jói co jehe jí ngagaha jna tti xonhi chojni jí”, jaha ra ttjiha ra ditsjehe ra nttiha, o si rrondattjo ra na: “Cristo nttihi jí ngaxinhi ná cuarto”, jaha ra ditticaonha ra. <sup>27</sup> Ixin janha, tti Xí que joixin de ngajni, are sihi iná, janha tsononxin na inchin are tonguixin anto daca dattoa xohi ngajni desde tti chinxin nchanho hasta tti diataonxin nchanho. <sup>28</sup> Co tti sarihi janha, nttiha rroxatte cain chojnina.

*Quexén tsí tti Xí que joixin de ngajni  
(Mr. 13.24-37; Lc. 21.25-33; 17.26-30, 34-36)*

<sup>29</sup> Ntthi tsjexin satto cain tti nchanho que anto tangui mé, cottimeja nchanho isinchengasanha nchaon, co conittjao co conotse sinttjixin va de ngajni, co hasta cainxin cosa que jí ngajni, rrožanga. <sup>30</sup> Cottimeja sicononxin ngajni señal de janha, tti Xí que joixin de ngajni, co ngain cainxin rajna de ngoixin mundo rrotsjanga chojni, co sicon na na janha, tti Xí que joixin de ngajni, sihi are mé ngacjan ttjoi de ngajni conixin anto tsje joachaxin co gloria. <sup>31</sup> Co janha rrorroanha cain angelna para que are tsoyao trompeta, jehe satse cainxin chojni que janha coinchiá de cainxin parte de ngoixin mundo.

<sup>32</sup> Tangui ra ejemploe nttahigo: Are xesan ramé nnta co čhinhi qué nnta, jaha ra onoha ra que ojoiconchian tiempoe čhin. <sup>33</sup> Xajeho jamé cai, are jaha ra sicon ra que cain cosa yá tsexinhi tsonhe, jaha ra onoha ra que janha ochiaon rrocjan na sihi iná. <sup>34</sup> Atto seguro tti rrindattjo ra que cain yá tsonhe icha saho que generación jihi sitján. <sup>35</sup> Ngajni co nontte ndasitján, pero tti janha ndačhjan sitjanha ixin chonda que tsonhe cain tti ndačhjan.

<sup>36</sup> Pero nchanho co hora que tsonhe mé, ni ná chojni noeha, ni cain ángel que te ngajni, ni janha tti Xenhe Dios nonaha. Jeho Dios Ndodá na tti nohe quesa co quehe hora.

<sup>37</sup> Jañá inchin conhe ngain tiempoe Noé cai jamé tsonhe are sihi janha, tti Xí que joixin de ngajni. <sup>38</sup> Ngain tiempo mé are icha saho que

vitjanxin na jinda, cain chojni vanchehe sigue vanchehe na inchin costumbré na; vajine na co vaguihi na, vacottehe na co vaganjo na n̄hichehe na para vacottehe n̄cha. Jañá hasta ngain tti nchanho que Noé joixinhi para ngaxinhi tti arca que jehe joinchexjian. <sup>39</sup> Co coinxinha na que ixin ndarroguitján mundo hasta que joí jinda co ndagoen cainxin na. Jamé tsonhe cai are sihi janha, tti Xí que joixin de ngajni. <sup>40</sup> Ngain rato mé si yó xí tenchehe ʒa ngataon jngui, ná rrochonda iná vida naroaxin co ná nahi. <sup>41</sup> Co si yó n̄chí tedaho, ná n̄cha sayá n̄cha co iná n̄cha nahi.

<sup>42</sup> 'Jaha ra cain nchanho dintte ra listo ixin noaha ra quesa sihi janha tti chonda cain joachaxin. <sup>43</sup> Pero ttettexin ñao ra jihi, que si xinajní ná nchia rroconohe xa quehe hora rroquí xichehe are ttie, xinajni rroquejoaha xa; jehe xa rroguenda xa nchiandoha xa para rrocanchjandaha xa xichehe rroguixinhi xa rroqué xa. <sup>44</sup> Mexinxin jaha ra cai dintte ra listo ixin noaha ra quesa janha, tti Xí que joixin de ngajni, sihi iná.

*Ná tti nchehe ʒa jian co ná tti nchehe ʒa jianha  
(Lc. 12.41-48)*

<sup>45</sup> 'Tti nchehe ʒa que ditticaon nchehe cain tti ditonhe co chonxin tti jian; xinajni chonda xa confianza ngain chojni mé para que jehe dittoehe icha ninchehe ʒé xa para danjo jine na hora que denhe na jintta. <sup>46</sup> Anto ʒhjoin para ixin jehe tti nchehe ʒa si jehe jinchehe cain tti vitonhe are tsí xinajní. <sup>47</sup> Atto seguro tti rrindattjo ra, que xinajní rrochjé xa joachaxin para que jehe senda cainxin

cosa que jehe xa chonda xa. <sup>48</sup> Pero si tti nchehe x̄a mé jianha, co rroḡaxaon que xinajní tsiha xa toin, <sup>49</sup> co si jehe tsexinhi sinchesattehe icha ninchehe x̄é xa, co sehe sinecaho co sicaho cain tti dicoan, <sup>50</sup> pero cottimeja xinajní tsí xa ngain ná nchanho que ni jehe rroḡaxaonha, co ngain ná hora que ni jehe noeha. <sup>51</sup> Co rrochjé xa ná castigo anto tangui, que x̄ajeho inchin castigo que sayé cain chojni que ncheha na tti jehe na ndaḡho na. Cottimeja nttiha jehe rrotsjanga co sinetaon neno.

## 25

### *Ejemploe tti tte xannḡhí*

<sup>1</sup> Cai ndaḡho Jesús:

—Jihi ná ejemploe queḡén ttetonha Dios que ttjen ngajni. Mé inchin ná xanxí que tsottehe. Co tte xannḡhí vinttecji xan ngain vandango mé co joicao xan lámpara de aceite para joichoexin xan xinovio ngatja nttiha. <sup>2</sup> Naho de jehe xan lista xan co naho xan x̄axaonha xan jian. <sup>3</sup> Tti xan x̄axaonha jian joicaoha xan icha aceite para rroquequia xan lamparé xan iná. <sup>4</sup> Co tti xan lista joicao xan icanxin x̄oḡao de aciete aparte de lamparé xan. <sup>5</sup> Co ixin xinovio dacaha joí xa, cain xannḡhí mé tse xan cottaḡhin co tavinttejoa xan. <sup>6</sup> Cottimeja inchin ngosine ttie, coinhi xan coyao ná tti ndaḡho: “¡Ojoí xinovio, daḡhje ra dichoexin ra xa ngatja nttiha!” <sup>7</sup> Cain xannḡhí mé vintteguingattjen xan, para vinttenchegacaon xan lamparé xan. <sup>8</sup> Cottimeja tti xan naho que x̄axaonha jian vinttendaḡho xan ngain tti xan naho que vintte lista: “Chjana ni ra nchion aceite

ixin lamparana na ndatedanga lampara.” <sup>9</sup> Pero tti xan naho que vintte lista vinttendačo xan: “Nahi, ixin sittjaha aceite para ixin janha na co jaha ra. Icha jian ttji ra tti tochji aceite, co nttiha ttehna ra aceite para ixin jaha ra.” <sup>10</sup> Pero are tti naho xannčí mé joiqehna xan aceite, xinovio ojoí xa. Co cain tti xannčí que tedacaon lamparé joixincaho xan xinovio ngaxinhi nchia tti jí vandango co coejé na puerta. <sup>11</sup> Cottimeja vinttequí tti inaho xannčí co vinttendačo xan: “Nttatsanha ra ñao danttjena ni ra puerta.” <sup>12</sup> Pero xinovio ndačo xa: “Chonxinha quensen jaha ra.”

<sup>13</sup> Cottimeja Jesús ndačo:

—Dintte ra listo cain nchanho ixin noaha ra quesa ni quehe hora rrocjan na sihi janha, tti Xí que joixin de ngajni.

### *Ejemploe tomi*

<sup>14</sup> Jihi iná ejemploe quexén ttetonha Dios que ttjen ngajni. Mé inchin na xinajni que sajittji para ngain iná nación. Pero icha saho que jehe xa sacjoi xa, vayé xa cain ninchehe xé xa co ndačo xa ngain na: “Nttihi cada ra tsinttoaha ra tomina.”

<sup>15</sup> Ngain ná de jehe na joanjo xa inchin naho mil de tomi mé, co ngain iná na joanjo xa inchin yó mil, co ngain iná na inchin ná mil. Cada na vayé na tomi inchin jehe na nohe na nchenchehe na tomi xa. Cottimeja jehe xinajni mé sacjoi xa cjin. <sup>16</sup> Tti nchehe xa que vayé tti naho mil de tomi mé, jehe joinchegonda tomi mé co joacha iná naho mil. <sup>17</sup> Co jamé joinchehe tti vayé tti yó mil, co joacha iná yó mil. <sup>18</sup> Pero tti vayé ná mil, mé ngue co cjoavá tomí xinajní.

<sup>19</sup> Vatto tsje tiempo, cottimeja cjan xinajní cain ninchehe xa mé para joitse xa cuenta ngain na.

<sup>20</sup> Saho conchienne tti vayé naho mil, co joanjo iná naho mil, co ndačo ngain xa: “Chjana naho mil, co nttihi dayehe iná naho mil que joacha janha.”

<sup>21</sup> Xinajni mé ndačo xa ngain: “Atto nchao jí; jaha ná ninchehe xa atto jian co nchehe cain tti ditonha. Jaha ojoinchehe jian ngain tti tomi que chjaha masqui tsjeha, mexinxin jai rrochjaha icha tsje. xacoi dixinhi nchiania para rrochaha conixin janha.”

<sup>22</sup> Cottimeja conchienne tti nchehe xa que vayé tti yó mil, co ndačo: “Chjana yó mil, co nttihi dayehe iná yó mil que joacha janha.”

<sup>23</sup> Xinajní ndačo xa ngain: “Atto nchao jí; jaha ná ninchehe xa atto jian, co nchehe cain tti ditonha. Jaha ojoinchehe jian ngain tti tomi que chjaha masqui tsjeha, mexinxin jai rrochjaha icha tsje. xacoi dixinhi nchiania para rrochaha conixin janha.”

<sup>24</sup> Pero are conchienne tti nchehe xa que vayé tti mil, ndačo ngain xinajní: “Janha nona que soixin anto soji ansean que dantsjehe chojni tti soixin danjoha co jamé tsinhi cosecha tti soixin ttengaha.

<sup>25</sup> Mexinxin janha xaon na nganji co joiquema tomia, joicjavá tomi. Pero nttihi dayehe tti tomia que chjana.”

<sup>26</sup> Xinajni ndačo xa: “Jaha ná ninchehe xa jianha, co atto saha. Si onoha que janha dantsjá chojni tti janha danjoha, co jamé janha tsinhi cosecha tti janha coengaha,

<sup>27</sup> mexinxin icha jian si jaha rrojicán tomina ngain ná banco, co are janha rrocjan na rrojihí, rrogayá tomina conixin tti rrogacha tomi.”

<sup>28</sup> Co ndačo xa ngain nite nttiha: “Dantsjehe ra xa tti mil que

jichonda xa co danjo ra ngain tti jichonda tte mil.  
<sup>29</sup> Ixin tti chonda, sayé icha, co rrochonda hasta rroxehé. Co tti xonhi chonda, sachjehe hasta cain tti chonda masqui tsjeha chonda. <sup>30</sup> Co tti nchehe xa que xonhi xé jiji, dehngui ra ndoja tti naxin xehe, nttiha tti rrotsjanga jehe co sinetaon neno.”

*QueXén soenhe juzgado cain nación*

<sup>31</sup> Janha, tti Xí que joixin de ngajni, are janha sihi inchin ná Rey, conixin cain angelna, are mé sarihi ngain lugar de joachaxin. <sup>32</sup> Chojni de cainxin nación rroxatte na ngattoxon con, co janha santsjenda na cada na inchin tti ttingaria coleco dantsjenda coleco de ngayehe cottentso. <sup>33</sup> Janha tsín coleco lado jian na co cottentso lado cjon na. <sup>34</sup> Cottimeja janha, tti Rey na, rrondattjan tti chojni que te lado jian na: “xacoi ra, jaha ra xo ojointtanchaon ra Ndodana, co dayehe ra tti lugar que jichjian para ixin jaha ra desde que are Ndodana joinchechjian Ndo nontte. <sup>35</sup> Ixin janha venhe na jintta, co jaha ra chjana ra tti joine; co venhe na jinda co jaha ra chjana ra tti vihi; janha vacji inchin chojni de oje nontte co jaha ra chjana ra nchia tti janha joarihi. <sup>36</sup> Janha xonhi lontto joarichonda, co jaha ra chjana ra lontto que joaringaha; janha conina co jaha ra joasotsjena ra; janha viaxinna ngain cárcel, co jaha ra joasotsjena ra.” <sup>37</sup> Cottimeja tti chojni jian rrondaço na: “¿Quesa vicon na que soixin venhe jintta, co janha na ján chjaha ra tti jointte? ¿O quesá vicon na que soixin venhe jinda co janha na ján chjaha ra tti vihi? <sup>38</sup> ¿O quesá vicon na que soixin vacji inchin chojni de oje nontte, co janha na ján chjaha ra

nchia tti joarihi? ¿O quesa joarichondaha lonto co janha na ján chjaha ra lonto? <sup>39</sup> ¿O quesa vicon na janha na que soixin coniha o joarihi ngaxinhi cárcel co janha na ján joasotsjaha ra soixin?” <sup>40</sup> Co janha tti Rey na rrondačhjan: “Atto seguro tti rrindattjo ra que cain tti jian que joinchehe ra ngain chojni tehe que ditticaon na, masqui chojni mé anto importanteha na, pero rročo ixin nganji na janha tti joinchehe ra mé.”

<sup>41</sup> ‘Cottimeja janha tti Rey na rrondattjan tti chojni que te lado cjon na: “Sattjixin ra de nganji na janha, jaha ra chojni jianha. Sattji ra ngain infierno tti xonhi tiempo danga xohi, que mé conchjian para ixin inchínji conixin cain ángel de jehe. <sup>42</sup> Ixin janha venhe na jintta co jaha ra chjanaha ra tti joine; venhe na jinda co chjanaha ra tti vihi. <sup>43</sup> Janha vacji inchin chojni de ojé nontte, co jaha ra chjanaha ra nchia tti joarihi. Janha ivechondaha lonttona, co jaha ra chjanaha ra lonto. Janha conina, cottimeja viaxinna ngain cárcel, co jaha ra joasotsjenaha ra.” <sup>44</sup> Cottimeja jehe na rrondačo na: “¿Quesa vicon na que soixin venhe jintta o venhe jinda, o inchin chojni de ojé nontte, o quesa vicon na que soixin ijoarichondaha lontoa, o quesa que soixin coniha, o viaxinha ngain cárcel co janha na cjoenguijnaha ra soixin?” <sup>45</sup> Co janha tti Rey na rrondattjan na: “Atto seguro tti rrindattjo ra que cada nttiha que čoha ra cjoenguijna ra chojni tehe que ditticaon na janha masqui chojni mé anto importanteha na, ngain rato mé rročo ixin jaha ra cjoenguijnaha ni ra janha.” <sup>46</sup> Cottimeja cain chojni jihi satsji na

ngain infierno tti xonhi tiempo danga xohi, co tti chojni jian satsji na tti rrochonda na iná vidé na naroaxin que xonhi tiempo tsjexin.

## 26

*Quexén xaxaon na para tse na Jesús  
(Mr. 14.1-2; Lc. 22.1-2; Jn. 11.45-53)*

<sup>1</sup> Are Jesús joexin ndačo cain yá, jehe ndačo ngain chojni que vacao:

<sup>2</sup> —Inchin jaha ra onoha ra, nttihi yó nchanho tsí tti quiai dinhi pascua co janha, tti Xí que joixin de ngajni, jehe na rrondačo na para rrotse na na co sinchecrucificá na na.

<sup>3</sup> Cai ngain xajeho nchanho mé cain xidána que ttetonha ngain icha xidána co cain ximaestroe ley Israel co cain xittetonha ngain nihngo, cain chojni mé xatte na ngain patioe palacioe Caifás, tti dána icha importante. <sup>4</sup> Nttiha cjoaxin na de ixin quexén sinchehe na para que sincheyehe na Jesús para rrotse na co nasoenxon na. <sup>5</sup> Pero vintendačo na:

—Sonttoha na ngain mero nchanho de quiai para que tsoñaoha chojni.

*Ná nchí cointtjitte aceite cuerpoe Jesús  
(Mr. 14.3-9; Jn. 12.1-8)*

<sup>6</sup> Ngain tiempo mé Jesús vehe ngain rajna Betania ngain nchiandoha Simón tti vancheguinhí na Leproso. <sup>7</sup> Co nttiha, are tene na ngain mesa conchienne ná nchí que joicao ná xožo de joxon marmol hasta jíche de aceite que anto xajni co anto rentte. Jehe ncha cointtjitte ncha aceite mé

ngataha já Jesús. <sup>8</sup> Are chojni que vacao Jesús vícon na yá, coñao na co coexinhi na ndačo na:

—¿Quedonda coxınca aceite yá? <sup>9</sup> Nchao rrocochji aceite yá conixin tsje tomi para rrocjenguijnaxin na chojni noa.

<sup>10</sup> Jesús coinhi mé, co jehe ndačo ngain na:

—¿Quedonda jañá tečo ra ixin nchí jihi? Tti jehe ncha joinchehe ncha nganji na janha; jihi ná cosa jian. <sup>11</sup> Ixin chojni noa cain tiempo sintte na ngayaha ra, pero janha cainxinha tiempo sar-  
ihi ngayaha ra. <sup>12</sup> Tti joinchehe nchí jihi, are jehe ncha cointtjitte ncha aceite cuerpona, jehe ncha ocoinga na ncha yá para are rroxavá na. <sup>13</sup> Atto seguro tti janha rrindattjo ra que cain tti rrondačo na tti jian joajna jihi ngoixin mundo, cai rrondačo na tti joinchehe nchí jihi para rroxaxaonxin na ncha.

### *Judas ndačo para rrotse na Jesús*

*(Mr. 14.10-11; Lc. 22.3-6)*

<sup>14</sup> Cottimeja ná de tti tteyó chojni que vacao Jesús, mé vinhi Judas Iscariote, cjoí para joic-  
jao canxion xidána que vaquetonha ngain icha xidána, <sup>15</sup> co ndačo ngain xa:

—¿Quejanhi tomi rrochjana ra si janha rrondattjo ra quexén sinchehe ra para rrotse ra Jesús?

Cottimeja jehe xa cjoenguehe xa hna treinta tomi de plata. <sup>16</sup> Co desde ngain rato mé Judas cjoé quexén sinchechienhe Jesús ngá rá xidána mé.

### *Are joincaho Jesús tti tteyó chojni que vacao*

*(Mr. 14.12-25; Lc. 22.7-23; Jn. 13.21-30; 1 Co. 11.23-26)*

<sup>17</sup> Saho nchanho de tti quiai que jine na niottja que chondaha levadura, tti tteyó chojni que vacao Jesús conchienne na ngain jehe co joanchiangui na co ndačo na:

—¿Quettinó sinttachjianxin na tti sintte soixin para ngain quiai pascua?

<sup>18</sup> Jesús ndačo ngain na:

—Ttji ra ngain Jerusalén ngain nchiandoha tti xí que jaha ra onoha ra co ndache ra que janha ndačhjan que ochian jói tiempo para janha ndasenne na co ngain nchiandoha jehe sinttasayaxin janha tti quiai pascua conixin chojnina que čhjinha.

<sup>19</sup> Chojni mé vitticaon na joinchehe na inchin coetonha Jesús, co nttiha joinchecjianxin na cain tti joine na ngain tti quiai pascua.

<sup>20</sup> Ngain ttie mé Jesús joinecaho tti tteyó chojni que vacao. <sup>21</sup> Co are cain na tatene na, jehe ndačo ngain na:

—Atto seguro rrindattjo ra que ná de jaha ra rrondache chojni quečén para rrotse na na janha.

<sup>22</sup> Cottimeja cain jehe na anto vinttechín na co coexinhi na, ná na co ná na joanchiangui na ngain Jesús co ndačo na:

—¿Apoco janha?

<sup>23</sup> Co Jesús ndačo ngain na:

—Ná tti rrinequina janha ngain lato jiji, mé tti rrondache chojni quečén para rrotse na na. <sup>24</sup> Ján ndoa janha, tti Xí que joixin de ngajni, senhe na inchin ndačo ngain tti jitaxin Palabré Dios, pero anto tangui tsonhe tti rrondache chojni quečén para rrotse na na. Icha jian para ixin jehe si rroconcjiha.

<sup>25</sup> Cottimeja nichja Judas, tti ndache chojni que xén para rrotse na Jesús, co jehe ndačo ngain Jesús:

—Maestro, ¿apoco janha?

Jesús ndačo ngain:

—Ján, jaha.

<sup>26</sup> Are tejine na, Jesús coá niottja co joanjo gracias ngain Dios, co váña nio. Cottimeja joanjo nio ngain chojni que vacao, co ndačo ngain na:

—Jintte ra, jihi rročo cuerpona janha.

<sup>27</sup> Cottimeja coá tti vaso de vino, co joanjo gracias ngain Dios. Cottimeja joanjo ngain na co ndačo:

—Dihi ra cainxin ra jaha ra vino jihi, <sup>28</sup> ixin jihi tti rročo jnina janha que sinchese gurá tti trato naroaxin. Co jnina singo jni para rroxengaxin hna tti jianha que nchehe tsje chojni. <sup>29</sup> Pero rrindattjo ra que janha irrocjanha na sihi vineo uva hasta tti nchanho que janha conixin jaha ra sonho na tti vino naroaxin ngain lugar tti ttetonha Ndodana ngajni.

*Jesús ndačo que Pedro rrondačo ixin jehe chonxinha Jesús*

*(Mr. 14.26-31; Lc. 22.31-34; Jn. 13.36-38)*

<sup>30</sup> Co vinttetsje na ná himno, cottimeja savinttecji na ngain jnanchjan que dinhi Nttaolivo.

<sup>31</sup> Cottimeja Jesús ndačo ngain na:

—Janha tti cain jaha ra sinttechinhi ra de ixin janha ngain ttie jihi, ixin ndačo ngain tti jitaxin Palabré Dios: “Dios nasoenxon tti ttingaria coleco, co cain coleco rrochjequé va.” <sup>32</sup> Pero después que

janha rroxechon na, janha saho tsji Galilea que jaha ra.

<sup>33</sup> Cottimeja Pedro ndačo ngain Jesús:

—Masqui cainxin na sinttechín na de ixin soixin, pero janha nahi.

<sup>34</sup> Cottimeja ndačo Jesús:

—Janha rrindattjo seguro que ngain ttie jiji, saho que rrotsje conttaxichia, jaha orrondačo ninxin nttiha que chonxinha na.

<sup>35</sup> Pedro ndačo:

—Masqui rrochonda que senxin na tti soixin senxin, pero rrondačhjanha ixin chonxinha soixin.

Co cain ni icha ndačo na xajeho cai.

*Are Jesús joichetsenhe ñao Dios ngain Getsemaní  
(Mr. 14.32-42; Lc. 22.39-46)*

<sup>36</sup> Cottimeja Jesús conixin tti chojni que vacao joihi na ngain ná lugar dinhi Getsemaní, co nttiha Jesús ndačo ngain na:

—Nttihi dintte ra co chonna ra ixin janha sinttatsán ñao Dios.

<sup>37</sup> Co Jesús sajoicao Pedro co cayoi xenhe Zebedeo, co jehe coexinhi conohe ná joachjaon anto soji ngain almé. <sup>38</sup> Cottimeja jehe ndačo:

—Janha tonona ngain almana ná joachjaon anto soji que hasta rinaho ndasenhe na. Dittoha jaha ra nttihi nganji na janha, co dinttechinha ra.

<sup>39</sup> Cottimeja Jesús sacjoi nchion icha cjín co nttiha vecjantaha nontte, co joinchetsenhe ñao Dios, co ndačo:

—Padre, si nchao, tančhjandaha na que janha sattoha ngain tti anto tangui que tsonna; pero

tsoenha inchin janha rinaho, sino que tsonhe inchin soixin rinao.

<sup>40</sup> Cottimeja cjan para ngain tti ní chojni que joicao, pero are jehe joiji nttiha, jehe na otatejoa na. Co jehe ndačo ngain Pedro:

—¿Acoixianha ra tavinttetsjehe ra ni ná hora para rroguinttenda ni ra? <sup>41</sup> Tadinttetsjehe ra co nchet-senhe ra ñao Dios, para que xonhi cosa jianha sinttatjanji ra. Ndoa que espiritua ra anto rinao sintte jian, pero cuerpoa ra sojiha.

<sup>42</sup> Yoxin nttiha jehe cjan para joinchetsenhe ñao Dios iná co ndačo:

—Padre, si čoha para que soixin tsančjandaha na janha satto ngain tti anto tangui jihi, que tsonhe inchin soixin rinao remé.

<sup>43</sup> Cottimeja jehe cjan co jehe na tatejoa na iná ixin jmacon na icoixinha de anto cottačhin.

<sup>44</sup> Jesús nttiha cointohe na co jehe sacjan para joinchetsenhe ñao Dios ninxin nttiha, co ndačo xajeho. <sup>45</sup> Cottimeja cjan ngain tti vittohe jehe tti ní chojni que joicao, co ndačo ngain na:

—Janché dinttečhin ra co nchejogaha ra. Hora ojoí que janha, tti Xí que joixin de ngajni, sinchechienhe na na ngá rá chojni jianha.

<sup>46</sup> Dingattjen ra sachjin na; ojoí tti ndačo quexén para rrotse na na janha.

### *Are tse na Jesús*

*(Mr. 14.43-50; Lc. 22.47-53; Jn. 18.2-11)*

<sup>47</sup> Jesús xa jindačo jañá are ojoí Judas, ná de tti tteyó chojni que vacao Jesús. Judas joiaho anto tsje chojni que teyá na espada co nttá. Xidána que vaquetonha ngain icha xidána co xittetonha ngain

nihngo, xí mé rroanha cain chojni mé. <sup>48</sup> Judas, tti joindache xa quexén para tse na Jesús, mé dindačo ngain cain chojni que joiaho:

—Tti janha tsetoxin para rrochjaha joajna, jehe mé. Tse ra co sattjiho ra.

<sup>49</sup> Cottimeja jehe Judas conchienne ngain Jesús co ndačo:

—¡Deo, Maestro!

Co coetoxin. <sup>50</sup> Jesús ndačo ngain Judas:

—Amigo, ¿quedonda joihi nttihi?

Cottimeja cain nicjoi conchienne na co tse na Jesús co sajoicao na.

<sup>51</sup> Ngain rato mé, ná de tti tteyó chojni que vacao Jesús joantsje espadé co cončhinjihi ndatsjoen ná xinchehe xé xidána icha importante. <sup>52</sup> Cottimeja ndačo Jesús ngain:

—Ttenchjinha espadá lugué espada. Ixin cain chojni que tjayaxin conixin espada, conixin espada senxin cai. <sup>53</sup> ¿Anoaha que janha nchao rronhattjan Ndodana co jehe Ndo jaxon rrorroanna Ndo icha que setenta mil ángel? <sup>54</sup> Pero si jamé rroconhe, ¿quexén para tsonhe tti ndačo ngain tti jitaxin Palabré Dios, que mé chonda que siconhe?

<sup>55</sup> Cottimeja Jesús ndačo ngain cain chojni que cjoi:

—¿Ajoihí jaha ra conixin espada co nttá para joitse ni ra como si janha rrocji ná xichehe? Cain nchanho vatto janha vagarihi ngayaha ra ngain nihngo icha importante para vanttacoanha ra de ixin Dios co xonhi tiempo tse ni ra. <sup>56</sup> Pero cain jihi tsonhe para que siconhe cain tti dindačo cain profeta ngain tti jitaxin Palabré Dios.

Cottimeja cain tti chojni que vacao Jesús nda-  
cointtohe na jeho Jesús nttiha co jehe na saccoinga  
na.

*Are Jesús ngain juzgadoe nihngo*

*(Mr. 14.53-65; Lc. 22.54-55, 63-71; Jn. 18.12-14,  
19-24)*

<sup>57</sup> Cain nijoitse Jesús sajoicao na para ngain  
nchiandoha Caifás, mé vehe xidána icha impor-  
tante, co nttiha tti dixatte cain ximaestroe ley co  
cain xittetonha ngain nihngo. <sup>58</sup> Co Pedro ta tti cjin  
jirroexin hasta joihi ngain patioe nchiandoha jehe  
Caifás. Nttiha joixinhi Pedro co tavehe ngayehe  
xipolicía que te nttiha para vicon quehe joinchehe  
ni icha ngain Jesús.

<sup>59</sup> Cain xidána que vaquetonha ngain icha  
xidána, co cain xittetonha ngain nihngo, co cain  
xittetonha ngain juzgadoe nihngo cjoé xa quehe  
sinchecaxin xa Jesús, masqui ndoaha joinchehe  
Jesús ná cosa jianha, jeho para ttjé xa para na-  
soenxon xa Jesús. <sup>60</sup> Pero xonhi cosa vittja xa  
masqui anto tsje chojni conchienne para ndačo  
na cosa ndoaha de ixin quehe joinchehe Jesús.  
Cottimeja vintteconchienne yó chojni testigo que  
nichja cosa ndoaha. <sup>61</sup> Chojni mé ndačo na:

—Xí jihi ndačo xa: “Janha nchao tsonxantte  
ningoe Dios, co rrocjan na sinttachjian nihngo iná  
ngain nincoa nchanho.”

<sup>62</sup> Cottimeja vingattjen xidána icha importante  
co ndačo xa ngain Jesús:

—¿Xonhi nichja jaha? ¿Andoa tti ndačo chojni  
tehe o ni nahi?

<sup>63</sup> Pero Jesús tencoa. Cottimeja ndačo xidána  
icha importante mé:

—Conixin joachaxín nombré Dios que jichon, janha rritetonha jaha que rrondachjenji na ndoa. Ndachjenji na si jaha tti Cristo, Xenhe Dios.

<sup>64</sup> Jesús ndačo:

—Ján, janha inchin jaha ndačo. Co cai rrondat-tjo ra jaha ra que sicon ni ra janha, tti Xí que joixin de ngajni, sarihi ngain lado jian de Dios que chonda cainxin joachaxin, co sicon ni ra sihi ngacjan ttjoi de ngajni.

<sup>65</sup> Cottimeja jehe xidána icha importante co-inchje xa lonttoe xa para ná señal que jehe xa anto coñao xa co ndačo xa:

—Xí jiji nichja xa jianha para ixin Dios. ¿Quehe rrogondá na icha testigo? Jaha ra coinhi ra tti jianha que ndačo xa. <sup>66</sup> ¿Quehe xaxaon ra?

Cain na ndačo na:

—Jiquininxin xa senhe xa.

<sup>67</sup> Cottimeja canxion na cjoatjo na nttatté na ngá con Jesús co xanguí na tton. Icanxin na xanguí na manazo ngá con Jesús. <sup>68</sup> Co ndačo na ngain:

—Jaha que Cristo, ¡datsoenhe quensen goen!

*Pedro ndačo que jehe chonxinha Jesús*

*(Mr. 14.66-72; Lc. 22.56-62; Jn. 18.15-18, 25-27)*

<sup>69</sup> De cain mé Pedro tají ndoja ngain patio, co conchienne ngain jehe ná nchimozé xidána icha importante co ndačo ncha:

—Jaha cai vacjiho Jesús, tti joixin nonttehe Galilea.

<sup>70</sup> Pero ngattoxon con cain nite nttiha, Pedro ndačo:

—Nonaha de quehe rrindachjenji na.

<sup>71</sup> Pedro are jehe sajittji ngain puerté patio are vicon iná nchimozé xidána mé, ndačo ncha ngain nite nttiha:

—Xí jiha cai vacao xa Jesús, tti rajné Nazaret.

<sup>72</sup> Pedro joinchejurá co ndačo:

—Janha chonxinha xí yá.

<sup>73</sup> Nchion después cain nite nttiha conchienne na ngain Pedro co ndačo na ngain:

—Ján ndoa, jaha cai ná de tti chojní Jesús ixin datsoan ni hasta de queñén nichja.

<sup>74</sup> Cottimeja Pedro joanchia ná castigo ngain Dios para ixin jehe ixin joinchejurá ngain Dios co ndačo:

—Dios nchao nasoenxon na janha si ndoaha tti rrindačhjan que janha choxinha xí yá.

Co ngain rato mé tsje ná conttaxichia.

<sup>75</sup> Cottimeja Pedro xaxaon tti ndačo Jesús ngain jehe: “Saho que conttaxichia rrotsje va, jaha orrondačo ninxin nttiha que ixin chonxinha na.” Cottimeja Pedro vačhjexin de nttiha co anto tsjanga.

## 27

### *Are joicao na Jesús ngain Pilato*

*(Mr. 15.1; Lc. 23.1-2; Jn. 18.28-32)*

<sup>1</sup> Are ovingasán cain xidána que vaquetonha ngain icha xidána co cain xittetonha ngain ningoe chojni judío cjoao na ixin queñén sinchehe na para nasoenxon na Jesús. <sup>2</sup> Cottimeja coia na Jesús co joicao na ngain Poncio Pilato, tti vehe xigobernador.

### *Are ndavenhe Judas*

<sup>3</sup> Judas, tti joindache xidána para tse na Jesús, are jehe conohe que nasoenxon na Jesús, jehe xaxaon que jianha joinchehe co anto feo conohe, co cjan cjoí ngain xidána que vaquetonha ngain icha xidána co xittetonha ngain nihngo para joiconcjan tti treinta tomi de plata, <sup>4</sup> co ndačo ngain xa:

—Janha jianha jointtaha ixin joindattjo ra quexén para tse ra ná xí que xonhi jica para que nasoenxon ra xa.

Pero jehe xa vinttendačo xa ngain Judas:

—Pero mé, ¿janha na quehe ndosenna na? ¡Yá problemá jaha!

<sup>5</sup> Cottimeja Judas cjoa tomi mé ngaxinhi nihngo nttiha, co sacjoi para joiquenttedonguihi ttosin ná jino jeho para ndavenhe.

<sup>6</sup> Jehe xidána que vaquetonha ngain icha xidána joatse xa tomi mé co ndačo xa:

—Choha tsín na tomi jihi ngain cajé tti tomi que danjo chojni ixin tomi jihi xengaxin hna jni.

<sup>7</sup> Cottimeja cjoao chó xa para que conixin tomi mé coenaxin xa tti nontte que dinhi Nonttehe tti Nchechjian Chi para que nttiha sehe ná lugar tti tsjavá na chojni que ttixin de iná nación. <sup>8</sup> Mexinxin jngui mé dinhi hasta jai, Jngui de Jni. <sup>9</sup> Jamé joiconhe tti dindačo profeta Jeremías: “Coá na tti treinta tomi de plata, (tti tomi que chojni Israel cjoenga hna para ixin jehe). <sup>10</sup> Conixin tomi mé coenaxin na tti jnguihi tti nchechjian chi, co jamé conhe inchin coetonna Dios.”

*Jesús ngain Pilato*

*(Mr. 15.2-5; Lc. 23.3-5; Jn. 18.33-38)*

<sup>11</sup> Joicao na Jesús ngain xigobernador que vinhi xa Pilato, co jehe xa joanchianguihi xa Jesús co ndačo xa:

—¿Ajaha tti Rey de chojni judío?

Jesús ndačo ngain xa:

—Ján janha jañá inchin jaha ndačo.

<sup>12</sup> Co are cain xidána que vaquetonha ngain icha xidána, co cain xittetonha ngain nihngo tenichja xa tti jeha ndoa de ixin Jesús, jehe xonhi ndačo.

<sup>13</sup> Cottimeja Pilato ndačo ngain Jesús:

—¿Attinha cain tti tendačo na de ixin jaha?

<sup>14</sup> Pero Jesús xonhi ndačo ngain Pilato; co jamé jehe xigobernador Pilato goan xa admirado co inoeha xa quehe rrojinchehe xa ngain rato mé.

*Are ndačo na ixin Jesús chonda que ndasenhe  
(Mr. 15.6-20; Lc. 23.13-25; Jn. 18.38—19.16)*

<sup>15</sup> Nchao remé, ngain cain quiai mé xigobernador vechonda xa costumbre de vacančjanda xa ná de tti teaxinhi para savacj. Jehe xa vacančjanda xa quexeho de tti chojni que vaquinchiehe jehe na. <sup>16</sup> Ngain tiempo mé nttiha vehe ngaxinhi cárcel ná tti vinhi Barrabás, co tsje chojni chonxin jehe mé. <sup>17</sup> Co are cainxin chojni xatte na nttiha, Pilato joanchiangui ngain na co ndačo:

—¿Quensen rinao ra tsančjanda janha para que jehe satsji; a Barrabás o ani Jesús, tti dinhi Cristo?

<sup>18</sup> Jamé ndačo Pilato ixin oconohe que cain xidána conchjoehe xa ngain Jesús ixin jehe cainxin jian vanchehe, mexinxin joinchechienxin xa Jesús nttiha.

<sup>19</sup> Ngain rato mé are Pilato tajitaha nttaxintaoen tti vanchejuzguexin chojni, nčičihi rroenhe

nĥa ná joajna que dindaĥo nĥa: “Dixintteha jaha ngain xí jian yá ixin are ttie, janha atto feo coxinanxin de ixin jehe xa.”

<sup>20</sup> Pero cain xidána que vaquetonha ngain icha xidána co xittetonha ngain nihngo ndache xa cain chojni que rrondaĥo na ixin Barrabás tti sachjexin cárcel, co ixin Jesús chonda que senhe.

<sup>21</sup> Jehe Pilato joanchiangui ngain na iná, co ndaĥo:

—¿Quexehe de cayoi xí tti rinao ra tsanĥjanda para que jehe satsji?

Co cain jehe na vinttendaĥo na:

—Barrabás.

<sup>22</sup> Pilato joanchiangui ngain na iná co ndaĥo:

—¿Co quehe sinttaha janha conixin Jesús, tti dinhi Cristo?

Cain na ndaĥo na:

—¡Nchecrucificá!

<sup>23</sup> Cottimeja Pilato ndaĥo ngain na:

—¿Quehe cosa jianha joinchehe?

Pero jehe na cjan na ndaĥo na sén iná:

—¡Nchecrucificá!

<sup>24</sup> Are Pilato vicon que ĥoha na para que Jesús sarrocji, sino que cain na anto tedoñao na, Pilato coetonha para que joí jinda, co contti rá ngattoxon con cainxin chojni nttiha, co ndaĥo ngain na:

—Janha ĥonhi sarica ixin ndasenhe xí jihi, ixin jehe xa ĥonhi cosa jianha joinchehe xa. Jaha ra tti sintteca ra yá.

<sup>25</sup> Co cainxin chojni ndaĥo na:

—¡Janha na conixin xanhna na, mé tti sintteca na ixin ndasenhe xí yá!

26 Cottimeja Pilato joantsje Barrabás para coančhanda sacjoi, co coetonha para que vicaon Jesús. Cottimeja Pilato joanjo Jesús para que goan crucificado.

27 Cottimeja xisoldadoe jehe Pilato joicao xa Jesús ngain palacio, co xatte cainxin xisoldado ngandanji Jesús. 28 Cottimeja joantsjehe xa lonttoe Jesús co joinchetsá xa ná lontto jatse. 29 Co joinchecjinga xa Jesús ná corona de joxon nttan-chaha, co joinchetse xa ná nttá ngain rá lado jian. Cottimeja vinttettoxin nttajochjihi xa ngatto con Jesús, co cjoanoa xa co ndačo xa ngain:

—¡Viva tti Rey de chojni judío!

30 Cai cjoatjo xa nttatté xa, co coá xa tti nttá que joinchetse xa Jesús para xanguí xa nttá já Jesús. 31 Cottimeja are joexin cjoanoa xa jañá, joantsjehe xa tti lontto jatse que joinchetsá xa co coengaha xa lonttoe. Cottimeja sajoicao xa para joinchecrucificá xa.

*Are joinchecrucificá xa Jesús*

*(Mr. 15.21-32; Lc. 23.26-43; Jn. 19.17-27)*

32 Co are tedačhjecaouxin xa Jesús de nttiha, vetan xa ná xí que vinhi Simón que joixin de ngain ciudad de Cirene; co joinchecame xa crue Jesús.

33 Co jamé joijicaho xa Jesús conixin Simón ngain ná lugar que dinhi Gólgota que rročo Lugué Nttalorojá Chojni. 34 Nttiha chjexin xa Jesús ná vino que jittecjan ná cosa anto tsja. Pero are Jesús joincheprobá vino mé, jehe čhoha vihi.

35 Co are ojoinchecrucificá xa Jesús, cain xisoldado mé joantsje xa suerte de lonttoe Jesús, para jamé chjeyehe xa lontto mé. Jañá conhe para

joiconhe tti dindačo profeta: “Joantsje na suerte para chjeyehe na lonttona.” <sup>36</sup> Cottimeja tavintte xa nttiha para vinttenda xa. <sup>37</sup> Co nganito cruz icha noi que já Jesús coín xa ná letra que ndačo quedonda chonda que ndavenhe. Co letra mé ndačo: “Xí jihi Jesús, tti Rey de chojni judío.”

<sup>38</sup> Cai yó xichehe goan xa crucificado conixin Jesús, ná xa vehe crue xa lado cjon Jesús, co iná xa lado jian de Jesús. <sup>39</sup> Co cain nivatto nttiha cjoanoa na Jesús co coenttjoinga rroha na. <sup>40</sup> co ndačo na ngain Jesús:

—Jaha que rrojinchexantte nihngo icha importante co nincoa nchanho ttjexinxin nchechjian nihngo iná, danianxin de cruz jaho, si ndoa jaha Xenhe Dios.

<sup>41</sup> Jamé cai cjoanoa cain xidána que vaquetonha ngain icha xidána, ximaestroe ley Israel, co xifariseo conixin cain xittetonha ngain nihngo, co ndache chó xa:

<sup>42</sup> —Jehe nchao cjoenguijna icha chojni, pero jehe čhoha tsjenguijna cuerpoe jehe mismo. Si ndoa jehe tti Rey para ixin ján na, socon na sanianxin de ngain cruz yá para que sotticaon na jehe.

<sup>43</sup> Jehe chonda confianza ngain Dios, mexinxin jai socon na si Dios tsančhjandaha para senhe, si ndoa Dios anto rinao jehe ixin jehe ndattjo na que jehe tti Xenhe Dios.

<sup>44</sup> Jamé ndačo chojni hasta tti cayoi xichehe que vintte crucificado nttiha ngaca jehe cjoanoa xa Jesús cai.

*Are ndavenhe Jesús*

*(Mr. 15.33-41; Lc. 23.44-49; Jn. 19.28-30)*

<sup>45</sup> Cottimeja ngoixin ngataha nontte ndaconaxin xehe desde ngosine nchanho hasta ní hora tsocjin. <sup>46</sup> Co inchin ní hora tsocjin Jesús coyao soji co ndačo:

—Elí, Elí ¿lama sabactani? —que rročo: Diona, Diona, ¿quedonda ndacointtona na janho?

<sup>47</sup> Canxion de tti xite nttiha coinhi xa mé co ndačo xa:

—Xí jihi jidayé xa tti profeta Elías.

<sup>48</sup> Ngain rato mé ná tti xite nttiha coinga xa joiroé xa ná esponja. (Cosa mé datse jinda inchin chjon algodón.) Co jehe xa řangui xa esponja mé ná vino anto san inchin vinagre co coencjin xa con ná nttá. Cottimeja tsín xa noi ngaca rroha Jesús para que jehe rroguihi. <sup>49</sup> Pero xi icha ndačo xa:

—Tančhjanda, socon na aco ndoa tsí Elías para tsjenguijna.

<sup>50</sup> Jesús cjan coyao soji iná, co ndavenhe.

<sup>51</sup> Ngain rato mé tti manta que vettoa ngaxinhi tti nihngo icha importante, hasta yó vichjenga manta mé de noi hasta tti nontte. Co coingui nontte hasta ttjao vichjenga. <sup>52</sup> Co tsje lugar tti řavá chojni xiré co tsje chojni que vaguitticaon na Dios, co ndavenhe na, are mé xechon na.

<sup>53</sup> Cottimeja vačhje cain chojni jihi de ngain tti řavá na, co después de xechon Jesús vinttecji na ngain ciudad de Jerusalén. Nttiha anto tsje chojni vicon jehe cain chojni mé que xechon.

<sup>54</sup> Are jehe xicapitán conixin cain xisoldadoe xa que tenda Jesús nttiha vintteguicon xa que coingui nontte co conaxin xehe co icha cosa que conhe, anto vintteřaon xa co vinttendačo xa:

—Ján ndoa que xí jihi Xenhe Dios.

<sup>55</sup> Co cjinha de ngain cruz nttiha tate canxion nchí que vacji conixin Jesús desde ngain Galilea co vagayaconhe ncha Jesús. <sup>56</sup> Nttiha vehe María Magdalena, co María tti janné Jacobo co José, co janné cain xenhe Zebedeo.

*Are Jesús xavá*

*(Mr. 15.42-47; Lc. 23.50-56; Jn. 19.38-42)*

<sup>57</sup> Are coexinhi conaxin xehe, joí ná xí anto rico que vinhi xa José, xí mé rajné xa Arimatea, co jehe xa cai vitticaon xa Jesús. <sup>58</sup> Jehe José mé cjoi joitsjehe Pilato para joanchiehe joachaxin de sasicao cuerpoe Jesús. Cottimeja Pilato coetonha que sanjo xa cuerpoe Jesús. <sup>59</sup> José joinchegania cuerpoe Jesús co coensiha ná manta anto roa. <sup>60</sup> Co joicán cuerpo ngain tti cueva que jehe José joinchexjian ngadoho ná ttjao para ixin jehe José o quexeho de nindoha que ndarroguenhe icha saho. Cottimeja jehe coejé cueva mé conixin ná xó jie co sacjoi. <sup>61</sup> Co nttiha tají María Magdalena, co tti iná María tate na ngandanguí jehe cueva mé.

*Tti venda lugar tti xavá Jesús*

<sup>62</sup> Ngain nchanho yoxin, rrocho sábado, cain xidána que vaquetonha ngain icha xidána co cain xifariseo vinttecji xa joitsjehe xa Pilato, <sup>63</sup> co vint-tendaço xa ngain:

—Janha na xaxanho na que tti xí ndavenhe que vanichja cosa ndoaha, jehe ndaço are xa vechon que ngain nchanho ninxin jehe rroxechon. <sup>64</sup> Mexinxin janha na rinaho na que soixin rroanha canxion xisoldado para sinttenda xa tti jehe jixavá hasta tti ngain nchanho ninxin para que chojni que vacao tsjiha na ngain ttie co siqué

na cuerpoe. Cottimeja rrondache na icha chojni que ixin jehe xechon. Co si jamé rrondačo na, icha feo tsonhe que are saho.

<sup>65</sup> Pilato ndačo ngain xa:

—Yá chonda ra canxion xisoldado. Jaha ra ttji ra co jian ttejehe ra cueva tti jiřavá.

<sup>66</sup> Cottimeja savinttecji na conixin xisoldado co coín na ná señal ngain tti řo que jijé cueva mé para que sicon na si řo mé tsingui řo. Co nttiha cointtohe na xisoldado para vinttenda xa.

## 28

### *Are xechon Jesús*

*(Mr. 16.1-8; Lc. 24.1-12; Jn. 20.1-10)*

<sup>1</sup> Are vatto tti nchanho que nchejogaha ni, co ojidingasán tti saho nchanho de semana, María Magdalena co tti iná María cjoí na joitsjehe na tti řavá Jesús. <sup>2</sup> Ngain rato mé coingui nontte anto soji. Are mé ná ángel de Dios xincanjinxin de ngajni co joí ngain cueva mé. Jehe vinttjia tti řo que jijé puerté cueva co tavehe ngataha řo mé. <sup>3</sup> Angel mé anto jitonguixima inchin tti řohi que xincanjinxin de ngajni, co lonttoe anto roa lontto inchin řhintta que jí ngataha jnanchaha. <sup>4</sup> Are tti xisoldado que tenda nttiha vicon xa mé, anto vintteřaon xa hasta ndavinttji xa de joařaon, řá ndavintteguenhe xa. <sup>5</sup> Cottimeja ángel mé ndačo ngain jehe yó nřhí que vinttecji:

—Řaonha ra. Janha nona que tettjé ra Jesús, tti joinchecrucificá na. <sup>6</sup> Jehe coha nttihi ixin jehe oxechon inchin jehe ndačo. řacoi ra sitsjehe ra tti lugar que jehe na coín na. <sup>7</sup> Jaicoa ttji ra co

dindache ra tti chojni que vacao: “Jehe ndavenhe pero jai jehe oxechon co jehe tsji Galilea icha saho que jaha ra. Nttiha siconxin ra.” Jeho yá tti chonda janha que joindattjo ra.

<sup>8</sup> Cottimeja jehe nchí mé jaicoa savinttecjixin ncha de nttiha. Jehe ncha vintteḡaon ncha co ḡajeho tiempo anto vintteché ncha cai. Co coinga ncha joindache ncha tti chojni que vacao Jesús. <sup>9</sup> Co are jehe ncha tettinga ncha, Jesús conchienne ngain ncha co joanjo joajna ngain ncha. Jehe ncha vintteconchienne ncha ngain Jesús co vinttettoxin nttajochjiji ncha co cjóa ncha rotté Jesús co joinchesayehe ncha. <sup>10</sup> Co jehe ndaḡo ngain ncha:

—Ḳaonha ra. Ttji ra dindache ra chojnina que jehe na chonda na que tsji na Galilea co nttiha siconxin na na janha.

*Tti coequin xisoldado que vinttenda tti ḡavá Jesús*

<sup>11</sup> Are nchí mé savintteguicao ncha joajna mé, canxion xisoldado que vinttenda lugar tti ḡavá Jesús vinttecji xa joindache xa xidána que vaquetonha ngain icha xidána cain tti conhe. <sup>12</sup> Co xí mé jaicoa joindache xa cain xittetonha ngain nihngo para que cjoao chó xa queḡén sinttenchehe xa. Cottimeja vintteganjo xa anto tsje tomi ngain tti xisoldado que vinttenda lugar tti ḡavá Jesús, <sup>13</sup> co vinttendaḡo xa ngain xisoldado mé:

—Jaha ra ndaḡo ra que are jaha ra tateḡhin ra ttie, cjoi tti chojni que vacao Jesús co coé na cuerpo. <sup>14</sup> Co si xigobernador tsonohe xa jiji, janha na sicjao na xa co jaha ra ḡonhi tsonha ra.

<sup>15</sup> Cottimeja cain xisoldado mé vittioexin xa vinttegayé xa tomi mé, co vinttecji xa co vinttendačo xa inchin vitonhe xa. Co jamé ttequin chojni judío hasta jai.

*Tti coetonhe Jesús nirepresentaté jehe  
(Mr. 16.14-18; Lc. 24.36-49; Jn. 20.19-23)*

<sup>16</sup> Jamé tti ttejngo chojni que vacao Jesús savinttecji na para Galilea ngain tti jna que Jesús coetonhe na. <sup>17</sup> Co are vintteguicon na Jesús, jehe na joinchesayehe na Jesús, masqui ittoha na řa vitticaonha na ixin jehe Jesús. <sup>18</sup> Cottimeja Jesús conchienne ngain na co ndačo:

—Janha ovayá cainxin joachaxin de ngajni co de nttihi ngataha nontte. <sup>19</sup> Jai jaha ra ttji ra ngain chojni de cainxin nación co ndache ra na que sitticaon na na janha co sintte na chojnina, co nchegutte ra na conixin joachaxín nombré Ndodana co joachaxín nombrena janha tti Xenhe Ndo conixin joachaxín nombré Espíritu Santo, <sup>20</sup> co nchecoenhe ra na sitticaon na sinchehe na cainxin tti janha coetonha ra. Co noha ra que janha rrihi nganji ra cainxin nchanho hasta are tsjexin mundo. Amén.

## **Tti jian joajné Jesucristo** **New Testament in Popoloca, San Marcos Tlalcoyalco**

copyright © 1982 Wycliffe Bible Translators, Inc.

Language: San Marcos Tlalcoyalco Popoloca (Popoloca, San Marcos Tlalcoyalco)

Translation by: Wycliffe Bible Translators, Inc.

Popoloca, Tlalcoyalco [pls], Mexico

### **Copyright Information**

© 1982, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

### **The New Testament**

in Popoloca, San Marcos Tlalcoyalco

**© 1982, Wycliffe Bible Translators, Inc.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

cxl

2018-11-16

---

PDF generated using Haiola and XeLaTeX on 11 Nov 2022 from source files  
dated 29 Jan 2022

a23ba35e-b016-5f67-a705-694e460cf18a